

## Insait

Lukautim  
gut ol  
diwai na  
busgraun...  
Pes 2

Pangu, PPP  
na NP  
kisim tok  
stia... Pes 3

Pes 8....  
Toktok  
bilong ol  
Bisop long  
Ista

P 28-29..  
Lukim ol  
NRL ripot

# Somare gavman bilip long stap inap 2007

### ... Somare i gat namba

#### Yakam Kelo i raitim

PRAIM Minista Sir Michael Somare i tokaut pinis olsem em i no surik long vot i nogat bilip sapos i kamap long gavman bilong em bikos em i gat inap namba bilong winim dispela vot na holim gavman yet inap 2007..

Sir Michael Somare i bin mekim dispela nek taim em i bin bekim toktok bilong Ombudsmen Komisin long las mun we Ombudsmen i tok gavman i wok long kamapim bikpela holide long 6-pela mun olgeta long surikim taim na abrusim vot i nogat long gavman bilong em.

Ombudsmen Komisin i tok gavman i brukim lo bilong palamen long kisim 6-pela mun holide we palamen inap long abrusim 63 de bilong palamen i sindaun insait long wanpela yia.

Tasol Somare wantaim lida bilong gavman bisnis Peter O'Niell i tok ol i mekim samting bihainim mak na ol bai kamapim stret 63 de bilong palamen i sindaun long dispela yia. Tasol tingting bilong abrusim vot i nogat bilip em i no tru ol i tok.

Long Epril 18 bai palamen i kam bek sindaun gen na toktok wanpela bikpela bisnis em vot i nogat bilip bikos 18 mun marimari long gavman i pinis. Gavman i bin laik surukim dispela 18 mun i go long tripela yia tasol i nogat 73 vot bilong mekim i kamap lo.

Ol pati long gavman tude em, Nesenel Alaiens (NA), Pipels Nesenel Kongres (PNC), Pipels Eksen Pati (PAC) Nesenel Pati, Pangu na hap Pipels Progres Pati (PPP), hap Yunaitet Risoses Pati (URP), Melanesian Alaiens pati (MA) Yunaitet pati na ol liklik pati bilong Peter Yama, Luther Wenge, Dokta Banare Bun na arapela moa.

Long Oposisen em PNG pati wantaim hap Yunaitet Risos Pati na hap lain bilong PPP na indepen-

den.

Sans bilong kamapim vot i nogat bilip tu bai i hat liklik bikos nau yet sampela memba bilong Yunaitet Risos pati i no wanbel wantaim lida bilong ol Tim Neville. Gavana bilong Wes Nu Briten Clement Nakmai wantaim tripela memba i no amamas na i laik go sanap wantaim olpela lida bilong pati em Sam Akotai husat i Minista bilong Maining na i stap long sait bilong Gavman.

As bilong dispela bruk em olsem, Tim Neville i wok long tromoi ol kainkain toktok i go antap long Somare gavman long mani bilong hailans haiwe rot na tu i salensim lidasip bilong Somare. Tasol Mista Nakmai i tok pati bilong ol i no wanbel pastaim long mausman bilong ol i ken tromoi kain toktok. Tim Neville i tromoi kain toktok we i no

makim laik na tingting bilong ol pati membas na tu em ino soim rispek long ol arapela olsem ol tu i lida na ol i tokaut long tingting bilong ol long ol bikpela toktok na hevi bilong kantri, Mista Nakmai i tok. Olsem na ol i laik peim membasip fi bilong ol na go bek joinim Sam Akotai long gavman sait. Dispela piksa i soim olsem Somare gavman bai sanap strong yet wantaim inap namba bilong ol memba.

Ol lain bilong Moses Maladina i amamas long kisim namba tu Praim Minista na ol bikpela wok ministri olsem Woks na Trensport na arapela moa.

Ol lain bilong PNC aninit long lida Peter O'Niell tu i amamas long kisim ministri bilong pablik sevis, spika bilong palamen na arapela moa.

Ol lain bilong Sir Moi Avei long Melanesian Alaiens tu i amamas long wok ol i holim na ol i sanap klostu olgeta taim long helpim gav-

man i ron i go het wantaim ol wok bilong em. Ol em Ledi Carol Kidu, Sir Moi Avei na Anderson Vele.

Ol lain bilong Peter Yama i no mekim wanpela nois tumas taim Somare i rausim posisen bilong Leba na Emploimen long Peter Yama. Ol i stap isi tasol.

Tupela man tasol i wok long toktok long sensisim gavman em Gavana bilong Milen Be provins Tim Neville na Gavana bilong Morobe Luther Wenge tu i bin mekim sampela kain tok hat agensim gavman long kisim ol Australia wokmanmeri i kam.

Memba bilong Makam Andrew Baing i bin tromoi sampela nek agensim gavman tu tasol i nogat wanpela strongpela bung na grup i soim wanpela kain sain bilong salensim Somare gavman.

Palamen bai bung long Epril 18 dispela mun na vot i nogat bilip em wanpela bisnis bilong traime long dispela taim.



**Pait i bruk gen long Irak** 12-pela Amerika soldia i dai na 6i4 Irak i dai. Pait i go bikpela long dispela wik tasol long bik siti ol i kolim Fallujah.

## Niupela!



## Smel bilong Apple!

POLIS RIPOT

Kerema:

POLIS i holim pasim pinis tripela man husat i bin kilim dai wanpela lapun man Kerema long mun Janueri bilong dispela yia.

Ol i holim pasim na sasim tripela man long kilim dai John Souve i gat 73 kribmas bilong ples Moveave insait long Malalaua Distrik bilong Galp provins. Tripela saspek i bin kilim dai lapun man bihainim kros long graun.

Bos bilong ol polis long Sauten rijen Inspekta John Marru i tok ol saspek ya i bilong ples Moveave yet. Ol i stap nau long polis sel long Kerema wetim kot bilong ol.

NCD:

WANPELA man Australia i wok long orait nau long haus sik long Australia bihain long em i bin kisim birua long motobaik bilong em las wiken.

Polis i tokaut long nem bilong man olsem Nick Thomas.

birua i bin kamap long em long Sarere bikmoning m em i ronim motobaik bilong em long Poreporena Friwe.

Long dispela birua, Mista Thomas i bin kisim bagarap long hankais, solda, lek na bel.

Plis ripot i tok birua i bin kamap long Mista Thomas taim em i draiv bihainim Poreporena Friwe long bikmoning las Sarere.

Em i wok long go bek long haus bihain long i go aut long pati samting.

Motobaik bilong em i bin i abrusim rot na pun-daun i go 100 mita long rot.

Em i wok long kamap orait long haus sik long Australia.

Ol PNG pipel lainim tokples Bahasa

Joe Ivaharia i raitim

EMBASI bilong Indonesia long Pot Mosbi i wok long skulim ol sumatin wantaim ol wok manmeri long lainim tokples bilong ol Indonesia em 'Bahasa'.

Skul i kamap long Embesi bilong Indonesia opis long Waigani.

Wanpela instrakta o tisa bilong skul em Nico Jakarimilana i bin tokim Wantok Niuspepa olsem ol sumatin i bin salim ol aplikesen bilong ol i kam long embasi we ol i bin makim na kisim ol long mekim dispela kos o skul.

Em i tok tu olsem dispela kos bai i ron long sikspela mun olgeta na nau i gat moa long

180 sumatin i stap long lainim tokples Bahasa.


I gat tripela grup we ol i brukim long mekim skul wok i isi.

Wanpela klas i save stat long 8.30am na pinis long 12 kilok belotaim.

Narapela i save stat long 12.30pm i go 3.45pm na laspela long 4.30pm i go 6.30pm long apinun.

Nico i tok ol i laik helpim ol pipel bilong Papua Niugini long lainim tokples Bahasa we taim ol i go raun o wok na skul long Indonesia em bai isi long ol i ken tokples wantaim ol pipel long.

Dispela i wanpela gutpela program we bai strongim prensip namel long ol tupela kantri.



Ol sumatin lainim Bahasa tokples bilong Indonesia i stap long 6-pela mun long Hai Komisn bilong Indonesia. Foto: JOE IVAHARIA.

Wari long ol diwai na busgraun

...Program bilong planim bek diwai mas kamap strong

Fay Duega i raitim

TOK lukaut long PNG em sapos em i no was gut, ol diwai na bus samting bilong em bai pinis long sotpela taim. Long wankain taim tu, gavman i kamapim polisi program long helpim daunim dispela hevi.

Minista bilong Fores Patrick Pruaitch i wokim dispela tok lukaut long dispela samting taim em i bin opim tupela de woksop long Fores Rises Institut long Lae tupela wik i go pinis.

Long dispela taim, mak long katim ol diwai na bus samting long PNG em 120,000 hekta bilong ol diwai na busgraun. Ol rot we ol i wok long karim ol diwai long en em long ol loging kampani na ol arapela liklik somil i katim ol diwai, ol man i katim long salim na tu, long klinim na katim busgraun na diwai long lenskep o kirapim nupela ples na planim ol samting long mekim ples i luknais.

"Wantaim dispela mak, bai ol fores risos bilong yumi olsem ol diwai, bus na ol arapela samting bai pinis long sotpela taim. Na i no long long-

pela taim planti man i bilip long en.

"Long etresim dispela samting, gavman i tingting long kamapim ol polisi long planim bek ol diwai bilong kisim ples long ol dispela we ol i katim long ol.

"Na program ol bai wokim dispela long en em long Riaforestresen na Aforestresen Program," Mista Pruaitch i tok.

"Mipela i wok long bihainim selektiv loging sistem i min olsem katim na havestim ol diwai ol i makim long ol na wok long planim bek ol diwai mipela i makim aninit long program i mas go het," Minista i bin tok.

Em i tok forestri sekta i wanpela eria we i kamapim bikpela mani i kam insait long kantri, kamapim moa wok na ol infrastraksa olsem ol rot, bris, skul, haus sik na ol arapela developmen sevis long ol komyuniti i stap longwe na kantri.

Em i tok Forestri sekta i wok long helpim tru polisi bilong gavman na dispela em long daunim pasin we ol pipel i sot long samting (poveti) na

strongim ol pipel long kamapim gut laip na sindaun bilong ol.

Em bin tok tu olsem tingting bilong gavman em long i mas gat ol strongpela stia i sut long forestri na long dispela, em i wokim ol nupela (polisi) long strongim ol lain long dispela sekta long kontribut na lukautim gut ol diwai, bus na graun samting.

Em bin tokaut long Riaforestresen program i sut long ol dispela eria olsem: planim bek ol diwai bikos loging i wok long pinisim ol diwai, bus na graun, laik bilong wol timba maket we nau ol i wok long laikim ol fores prodak ol i wokim long ol diwai ol i planim long ol plantesen moa long ol diwai i gro nating long bus.

Dispela i wok long kamapim wari bihain taim bilong forestry prodak bilong PNG, kamapim ol wok long nau na bihain taim long kantri, sot long paiawut long ol eria i gat planti moa pipel long en na polisi bilong gavman long helpim kamapim gut ol busgraun na em i ken

wokim dispela long putim banis long sampela bus eria.

Mist Pruaitch i tok forestri em i bikpela eria tasol ol samting we yumi yusim em yumi ken planim bek long yusim long bihain taim gen na yumi mas menesim na lukautim gut wantaim ol gutpela polisi.

Em bin tok PNG i gat ol gutpela diwai bilong em yet ol timba kampani na Nesenel Fores sevis i yusim long plantesen program bilong ol. Na em i luksave long gavman bilong Australia i wok aninit long ACIAR (Australia Centre for International Agriculture Research) i putim mani long karimatu rises long planim long ol plantesen ol diwai bilong PNG yet ol i yusim long wokim timba na yusim long bilding bisnis, wokim ol fenitja na salim i go ovasis.

Em bin tokim ol lain i sindaun long semina olsem em i bilip dispela woksop i helpim ol long skruim save na helpim long riaforestresen we bai sevim ol diwai bilong yumi bikos rot we yumi yusim nau i ken mekim na ol bai pinis.

TRAIN FOR SUCCESS!

Gain professional skills and accredited qualifications with expert British Training, for a great career. Fees include all you need to succeed!

Your own CIC Diploma - your path to success!

Accredited British Training approved by the Papua New Guinea Ministry of Labour & Employment

Certificates & Diplomas (£130 or US\$260)

- \* Accounts, Hotels, Tourism, Computers
\* Administration, Office, Insurance, Marketing
\* English, Secretarial, Purchasing, Stores
\* Business, Management, Personnel, Trade
Advanced, Honours and MBA Diplomas
\* Business, Finance, Marketing, Personnel

For a FREE Information Book contact: CAMBRIDGE INTERNATIONAL

Box 53, Southampton, SO14 0JY, Britain

Email: info@cambridgetraining.com

Web: www.cambridgecollege.co.uk

Fax: +44 2380337200

Name: \_\_\_\_\_

Address: \_\_\_\_\_

Age: \_\_\_\_\_

Cambridge - your KEY to success!

TR Too comic strip panels with dialogue in Tok Pisin. Panel 1: TORO WANTAIM OL BOIS BILONG EM SPAK RAUN LONG KAR... TORO HOLIM STIA... Panel 2: BAGA NOGUT GIVIM SIKST STRET, EM WOK LONG SENISIM GIA KLOSTU, KLOSTU... Panel 3: NAU EM LUKIM WANPELA KAR LONG FRAN I SLO TRU NA TORO TINGTING LONG OVA-TEK... Panel 4: BAGA OVA-TEKIM NA LAIK GO LONG FRAN... TASOL NOGAT, WANPELA TRAIPELA TIPA TRAK I KAM LONG NARAPELA SAIT... Panel 5: MAN, TAIM TORO I LUKIM TRAK I KAM, EM SUTIM KAR I GO STRET LONG BARET... AAA EEE YAAAH!! HAI HAI HAI I GAT MOA! OGETA PLAI TASOL I KAM AUT LONG WINSKRIN...



### Hap Hap Nius

#### Mobail telepon bai go long ENB



Sir Rabbie.

OL MANMERI bilong Is Nu Briten bai inap long kisim sevis bilong ol mobail telepon klostu.

Dispela em i tok promis bilong Memba bilong Kokopo, Sir Rabbie Namaliu.

Em i tok olsem ol mobail sevis inap long go pinis long provins, tasol em i no go het bikos Independent Public Business Corporation (IPBC) i wok long painim wanpela nupela patna bilong putim mani i go insait long Telikom aninit long hap praivetaisesin progrem bilong gavman.

Sir Rabbie i tok olsem pastaim long mobail sevis i go kamap long Niugini Ailans, ol bai i mas senisim telepon sistem long enalog (analogue) i go long dijitel sistem.

#### Niugini Ailans bai kisim taim long bikpela ren

OL manmeri i stap insait long Niugini Ailans rison bai i mas lukaut long ol bikpela ren we bai i kamap long NGI long tripela mun i kam.

Ol saveman bilong Nesanel Weather Opis i tokaut long las wik olsem ol manmeri i mas go long taim bikpela ren i pundaun bikos em inap long kamapim bikpela taitwara.

Sinia klaimatolojis (climateologist) long Nesanel Weather Opis, Sammuel Maiha i tok ol provins olsem Not Solomons (Bogenvil), Is Nu Briten na sampela hap bilong Nu Ailan bai inap long kisim taim long taitwara sapos bikpela ren tru i pundaun.

Mista Maiha i tok olsem nau em i taim bilong kantri long bungim bikpela ren, tasol i no save lukim kain ren olsem nau we i nogat malolo bilong em.

Dispela kain bikpela ren i wok long kamap long Momase na Hailans rison.

Em i tok Niugini Ailans bai kisim bikpela ren tru long mun Mei, Jun na Julai we ol bikpela win i wok long karim i kam long kantri.


#### Haus sik kisim helpim

LORENGAU haus sik long Manus i kisim K33,000 helpim long Manus provinsel gavman bilong stretim ol hevi bilong nogat wara.

Helpim i kam bihain long provinsel edministresin i bin singaut long Gavana Jacob Jumogot bilong givim sampela mani bilong helpim Lorengau haus sik.

Provinsel Edministreta Wep Kanawi i tok olsem hevi bilong wara long haus sik i wok long bagarapim sindaun bilong planti sik manmeri insait long provins.

Em i tok taim bod bilong haus sik i bin tokim edministresin bilong em long ol hevi bilong wara, ol i bin askim Water Board bilong pamim wara i stap insait long tupela 1.5 milien lita tang wara i go long ol tang long Manus hai skul bihain bai hai skul inap long pamim wara i go long haus sik.



Malagan ya! Sapos yu save laik lukim pasin tumbuna bilong ol arapela hap long kantri, orait stretim rot bilong yu long i go long Kokopo, Is Nu Briten long lukim Nesanel Mask Festival we bai i kamap long Julai 14-17. Dispela bikpela festival bai soim ol kain kain mask insait long kantri olsem ol bilong ol Malagan bilong Nu Ailan. FAIL POTO

## Raskol kilim Kavieng bisnisman

### Neville Choi i raitim

FAIVPELA stilman i bin brukim wanpela stua long Kavieng taun na kilim dai menesa bilong stoa wantaim gan long Mande moning long dispela wik.

James Hana, wanpela man bilong Tasman ailan long Bogenvil wantaim meri bilong em i bin menesim Crystal Trading supamakot, wanpela stua long namel long Kavieng taun.

Kavieng polis i tok olsem ol man nogut i bin go insait long stua long baksait long 9 kilok long moning na ol i bin holdap long meri bilong Mista Hana na wanpela arapela wokman bilong em taim Mista Hana i kam daun na lukim ol. Taim em i kam daun man husat i holim gan i sutim em.

Ripot i kam long Kavieng i tok bihain long ol i sutim em, ol i stilim sampela mani na ronawe i go ausait long taun.

Tasol ol manmeri i stap raun long taun i harim olsem ol man nogut i holdap na ol i ronim ol na holim pas tupela long ol. Bihain long ol man long taun i holim pasim tupela man ya ol i katim lek bilong wanpela wantaim busnaip.

Kavieng polis i tok olsem man we ol i katim lek bilong em i silip i stap long haus sik.

Narapela man nogut em ol polis i holim em i stap.

Ol i tok ol stilman i no bilong Nu Ailan.

Bihain long dispela samting i kamap na ol i kilim i dai Mista Hana, olgeta stua insait long Kavieng taun i bin pasim dua bilong ol. Tupela stua, Andersons Supamakot na Tongs Supamakot i bin op long Mande.

Dispela kain bikpela hevi olsem i no save kamap tumas long Kavieng. Planti manmeri long taun i kirap nogut long dispela kain pasin i kamap insait long taun stret.

Las wik tasol sampela manki bilong Mongol viles klostu long Kavieng taun i bin traim long stil long Crystal Trading na wanpela bikpela pait i bin bruk.

Memba bilong Kavieng, Martin Aini i no wanbel long dai bilong Mista Hana.

Em i tok olsem Mista Hana i bin wanpela man bilong wok hat tru.

Mista Aini i tok tu olsem lo na oda insait long Kavieng distrik i wok long bagarap nau na em i singaut long Nesanel Gavman long lukluk long daunim ol hevi bilong lo na oda insait long Kavieng.

"Provins i nogat inap wokman na mani bilong daunim ol dispela kain hevi. Ol

polisman husat i wok i stap long Kavieng i mas go wok long narapela hap na ol nupela polisman i mas kam wok long wanem ol polisman i stap long taim long Kavieng i poromanim ol manmeri na ol i no inap long mekim gut wok bilong ol," Mista Aini i tok.

Em i tok Kavieng i no gutpela ples bilong stap na wok nau long wanem ol dispela kain hevi i wok long kamap bikpela.

Mista Aini i laikim bai Minista bilong Polis i salim ol polisman bilong Kavieng i go aut long wok long narapela hap na senisim ol wantaim ol nupela polisman.

Em i tok long tupela wik i go pinis, Kavieng i lukim tupela man i dai na planti holdap i wok long kamap.

"Yu lukim ol man i dring bia long ol bas stop, ol stua na long maket. Yu inap long lukim ol man i karim ol samting bilong pait. Na em i wok bilong ol polisman bilong stopim ol dispela kain pasin nogut.

Ol dispela kain samting i wok long kamap long ai bilong ol polisman tasol ol i no mekim wanpela samting. Ol i save sanap na lukluk tasol," Mista Aini i tok.

Ol pipel i amamas long ol lain husat i holim pasim ol nogut man.

## Jimbede rausim notis long risain

E K T I N G Administreta bilong Wes Nu Briten, Kingston Jimbede, i rausim bek long em bai pinis wok bihain long ol divisinel edvaisa i bung na askim em long noken pinis long wok.

Ol edvaisa bilong wan wan divisen insait Administreta long

long provinsel gavman i bin bung na pasim tok long askim Mista Jimbede long stap bek olsem Ekting Administreta.

Ol i tok olsem ol i laikim Mista Jimbede long stap bek na holim wok bilong Ekting Administreta long

wanem ol i skelim sapos em i lusim dispela wok, planti divelopmen insait long provins bai i no inap long go het.

Wanpela bikpela samting em ol i rausim tambu long benk Tras Fan bilong New Britain Palm Oil (NBPOL).

## Dion sutim tok long ol olupela gavman

GAVANA bilong Is Nu Briten, Leo Dion i sutim tok long ol olupela provinsel gavman long lus tingting long ol rot insait long Is Nu Briten.

Em i tok stat long namel long 1990s ol i no bin gat inap mani long stretim ol rot na bris bilong wanem rovinisel gavman i bin lusim pawa bilong em long kisim takis.

Ol i no bin kisim sels takis na i no bin gat inap mani i go long stretim rot sistem insait long provins.

Mista Dion i bin mekim dispela tok-tok taim em i go lukim lonsing bilong apgreding wok long rot namel long Kokopo na Warongoi long Balfora long las wik Sarere.

"Wanpela bikpela samting bilong ekonomik divelopmen em gutpela transpot infrastraksa," em i tok.

"Pastaim long maunten paia i bin pairap long 1994 na ol provinsel gav-

man rifoms, Gazelle Peninsula i bin gat namba wan infrastraksa o rot insait long kantri.

"Ekstensen, apgreding na mentenens wok long rot ol i save plenim gut, i bin gat inap mani long wan wan yia bilong mekim na i bin gat mani i kam long ol takis na invesmen bilong stretim rot."

Mista Dion i tok olsem jas yia, mak bilong mani ol kisim bilong ol rot i no stap long mak em i bin stap 10-pela yia i go pinis.

Mani bilong stretim ol rot long wan wan yia bipo i stap long K6 milien. Nau mani ol i kisim long nesanel gavman i sanap long mak bilong K800,000 tasol.

Em i tok tenkyu long ol dona kantri na ejensi olsem Wol Benk na gavman bilong Australia long helpim bilong ol long stretim rot sistem.



## Hap Hap Nius

### Bris kampani i laik lusim Makam bris

I gat ripot i kamap olsem bris kampani ol i kolim Marbey & Johnson i no inap mekim wok long Makam bris we i bruk long las mun long Lae bikos long sait bilong kontrak em i laik traim long kisim long gavman.

I gat luksave olsem narapela kampani tu em Nawae Construction i soim pepa bilong em long mekim wok long dispela bris we em i laik surukim ain aninit long hap we i bruk na i go tro-moi antap long hap sait we i no bruk.

Marbey & Johnson i save sanapim ol nupela bris ol i kolim Compact 2000.

### Planti bikhet pasin long Lae skul

Sampela skul long Lae siti i wok long bungim hevi long ol sumatin i save pait na mekim ol kainkain trabel o bikhet pasin.

I bin gat bikpela pait i kamap na sampela sumatin i save kisim bagarap. Siaman bilong wanpela skul i tok bod bilong em i bin rausim sampela sumatin long kamapim ol trabel tasol Provinsal Edukesen Bod i kirap na putim ol long narapela skul gen.

Dispela hevi i mekim na ol bikman bilong Morobe provinsal edministresen i bin raun sindaun na toktok wantaim ol het masta na ol bikman bilong skul long toktok long ol dispela hevi na kamap wantaim rot bilong stretim na daunim dispela hevi.

### I no stret long rausim setelmen long 2 mail

Nesenel Kot long Waigani i tokaut olsem dispela eksen bilong rausim ol setelmen long 2 mail long Lae siti long yia 2002 em i brukim lo na i no stret.

Jas Moses Jalina i tokaut olsem dispela eksen bilong Lae Eben Lokol Level Gavman Kaunsil na Morobe provinsal gavman i no stret long wanem em i mekim pasin nogut tru long ol pipel bilong dispela hap setelmen.

Insait long dispela wok bilong rausim ol setelmen long 2 mail, ol atoriti i rausim na brukim ol blok we planti haus i kos bikpela mani tru long sanapim, ol diwai kaikai olsem kokonas na buai, ol abus olsem pik na dok na ol arapela samting olsem ol kago bilong ol manmeri tu i bagarap olgeta.

Dispela em wanpela long ol arapela wok bilong rausim setelmen insait long Lae siti we i bin kamap bipo long arapela setelmen long Papuan Kompaun eria na maket eria na arapela moa.

PRAIM Minista Sir Michael Somare i opim bai ileksen bilong Yanagoru Sausia long Trinde las wik long Is Sepik provins.

Kendidet bilong Somare em Peter Wawaru em namba wan man long putim nem bilong em o nomet long resis long dispela sit bilong Yangoru Sausia.

Taim Sir Michael i opim dispela bai ileksen em i tokim ol pipel bilong Yangoru olsem dispela namba 4 taim bilong dispela ilektoret long go insait long bai ileksen na dispela i no gutpela tru taim ilektoret i nogat lida long foapela taim olgeta olsem.

Kot bilong ol lida ol i kolim Lidasip Traibunel i bin rausim ol lida bilong

Yangoru Sausia bikos long ol sas bilong rekot bilong mani bilong ilektoret i no go stret, o lida i no mekim stret wok long opis na arapela sas moa ol lida i tambu long mekim insait long pablik opis.

Sir Michael i tok ol dispela Lidasip Traibunel kot i rausim ol lida bilong Yangoru Sausia na ol pipel i bin nogat lida long makim ol na ol pipel i no bin kisim gut sevis na developmen long wanem i nogat lida bilong makim ol pipel na kisim ol samting i kam long nem bilong ilektoret. Olsem na ol pipel i mas luksave long dispela na makim gutpela lida nau.

Sir Michael i tok sampela taim em i bin holim wok olsem ekting memba bilong

Yangoru Sausia na em i no laikim dispela bikos em yet i gat bikpela wok long mekim olsem rijinol memba bilong Is Sepik. Olsem na ol pipel i mas luksave long dispela na mekim gutpela disisen long makim gutpela lida bilong ol.

Ol kendidet bilong Yangoru Sausia bai ileksen em:

John Paul Hombomia, Greg Mais Maisen, Peter Saria, John Wasori Hulanjifua, Sali Wafi, Peter Wararu Waranaka, Simon Warie Maninare, Alfred Gura, Philip Sambaga Aki, John Jaminan, Louis Koinduo, Robert Pohori, Patrick Harricknen, Vitus Wafi Wohiengu na Gabriel John Klero Dusava.

## Ol Amele pipel i karimaut mentenens long rot bilong ol

LAS wik moa long 1000 manmeri bilong Amele eria insait long Madang provins i karim aut mentenens wok long rot bilong ol. Dispela rot em i stat long 4 Mail na i go pinis long Mawan.

Ol pipel i stap namel long 4 Mail na Mawan i helpim tasol

long yusim ol samting bilong ol yet long klinim rot. Ol katim gras, dikim baret, pulumapim pot hols wantaim ston na graun.

Wanpela komyuniti lida long dispela eria we em i no laik autim nem bilong em long *Wantok Nius* i tok ol pipel

bilong Amele i no wanbel wan-taim Madang Provinsal Gavman long wanem gavman i no helpim ol long stretim na opim rot long ol risoses mipela i gat long em.

Em i tok ol pipel bilong mi save wok hat tru long planim vanila, kakao, na tu mipela i

save sevisim ol pipel long Madang taun long ol gaden kaikai mipela i laikim gutpela rot bai mipela i ken salim ol vanila, kakao na gaden kaikai bilong mipela na kisim mani long peim skul fi bilong ol pikinini bilong mipela na baim ol arapela samting tu.

## Bikpela ren i bagarapim Saidor Distrik

LAS wik bikpela ren i pundaun na bagarapim rot we i bungim Saidor na Madang. Rot i bagarap olsem na ol pipel i yusim spit bod long i go i kam long Madang.

Dispela bikpela ren i bagarapim tru ples

*Hevi ren i mekim na bikpela tait wara i kamap na wasim ol gaden kaikai, banis pik na kakaruk.*

Lalok we em i stap insait long Astrolobe Be eria insait long Madang provins.

Hevi ren i mekim na bikpela tait wara i kamap na wasim ol gaden kaikai, banis pik na kakaruk. Nogat haus na ol manmeri i no

kisim bagarap. Bagarap i kamapim bikpela hevi namel long ol pipel we tait wara i bagarapim ol vanila, kakao na kokonas.

Ol dispela kes krop em mipela i save kisim mani long em long peim skul fi bilong ol pikinini bilong mipela na ol arapela samting, Wod Seven Kaunsela bilong Astrolobe Bay LLG Mista Tiang Sangi i tok.

Mista Sangi i tok dispela hevi ren i kamapim bikpela tait long Minzang Wara we i bruk na kamapim tupela sait long ron strong tru na i bagarapim ol samting long ples.

Ol opisal bilong Disasta Opis long Madang i sekim dispela hap na askim ol pipel long lukautim ol yet long taim nogut na boilim wara long dring na kukim kaikai nogut ol i kisim sik long dispela hevi we i kamap.

## Madang kamapim kos bilong turis bisnis

### Michael Novingu i raitim

MOA long twenti (20) manmeri i bin kamap long wanpela trening we Turisim Promosen Atoriti i bin ranim long rot bilong lukautim ol turis taim ol i kam insait long kantri bilong yumi. Dispela trening i bin kamap long Coast Watchers Hotel long Madang inap long wanpela wik olgeta.

Ol manmeri i kam long ol bikpela hotel, ol viles ges haus, ol haia kar kampani, ol balus kampani na ol arapela hap we ol i save karimaut ol sevis na ol wok bilong lukautim ol turis taim ol i kam insait long PNG.

Dispela trening ol i ranim em, fran lain i go pas long en. Namba wan hap trening em ol i kisim pinis na tupela hap bai ol i kisim long mun Mei na Julai long dispela yia.

Bosman bilong haus tumbuna long Madang Mista Taba Silau i tokim *Wantok* olsem dispela trening em bilong helpim na surukim save bilong wok na tingting bilong ol long wok bilong ol long hospitality indastri long Madang. Ol i mas save gut long we bilong lukautim gut ol kastoma bilong ol na ol turis taim ol i kam insait long kantri bilong yumi.

Long wankain taim Mis Grace Gvudi tisa bilong Divine Word Yunivesiti Turisim na Hospitaliti Dipatmen i tok tru nem bilong kantri bilong mipela PNG i bagarap pinis long kainkain raskol pasin i kamap we yumi save lukim long niuspepa, televisen na harim long radio we i pretim ol turis long arapela kantri i no inap kam long PNG.

Tasol em i tok PNG em i namba wan ples we ol kalsa na pasin tumbuna bilong mipela istap yet, toktok tasol i save kamap bikpela na bagarapim nem bilong mipela tasol yu yet yu kam na lukim dispela kantri i naispela tru na ol pipel bai amamas na ol bai lukautim yu gut long stap bilong yu long PNG.

Em i go moa na i askim ol lain long kos long yusim gut save ol i kisim long helpim na kamapim gutpela sevis long wanem hap yu wok long en.

Long wankain taim wanpela kos man Mista Naphatu Kobis i tok tenkyu long ol tisa na ol lain i sponsorim dispela trening na i tok em festaim bilong em long kisim trening na save em i kisim bai helpim em long menesim gut wok bilong em.

# Cat® Work Crew



## Toughest on Earth.

## Hastings Deering



PORT MORESBY  
Phone: 300 8300  
Fax: 325 0141

LAE  
Phone: 472 2355  
Fax: 472 1477

TABUBIL  
Phone: 548 9045  
Fax: 548 9155

RABAUL  
Phone: 982 1244  
Fax: 982 1129

**Hap Hap Nius**

**Ol Hagen laik tok sori long famili long Australia**

OL PIPEL bilong Westen Hailans provins i laik mekim tok sori i go long famili bilong Australia pailot we ol raskol i bin kilim em wantaim sotgan long Hagen siti long las mun.

Dispela pailot em kepten Alan Mourilyan na em i save ronim balus long PNG klostu 8-pela mun olgeta.

Man i go pas long kamapim dispela sikan na tok sori long famili bilong dispela pailot em Tom Watinga na em i olsem siaman bilong wanpela komiti i go pas long mekim kamap dispela wok.

Mista Watinga i tok dispela pasin ol man nogut ya i bin mekim long kilim dai dispela waitman i bin mekim kamap nem nogut long Westen Hailans provins. Bipo em provins i nogat kain nem nogut na ol pipel i save raun fri na amamas. Tasol nau lo na oda i pundaun, em i tok.

Mista Watinga i tok i no olgeta pipel bilong Westen Hailans provins i trabel lain. Em wanwan liklik lain tasol i wok long bagarapim nem bilong olgeta pipel na provins olsem na ol i kamapim dispela komiti long bungim olgeta pipel na autim bel hevi na wari bilong ol na sem taim salim tok sori bilong ol i go long famili bilong dispela pailot.

Em i tok ol i laik stretim dispela pasin wantaim famili bilong man Australia ya long kastom na tumbuna pasin bilong ol long wei bilong tok sori na kamapim bel isi.

**Tari Pori sit go long kot**

MEMBA bilong Tari Pori Tom Tomiape bai go bek long kot bihain long Nesenel Kot i tokaut olsem bai kot i sindaun na glasim gut ol toktok i sut long rausim ol balot pepa bilong wanpela balot bokis insait long Tari Pori saplimentri ileksen long 2003 las yia.

Kendidet husat i bin kamap namba tu long dispela ileksen bilong Tari Pori em James Marabe i tok wanpela balot bokis 0257 long Painamu namba 2 viles insait long Tebi lokol level gavman eria i gat asua long en.

Mista Marabe i askim kot long tokaut olsem ol vot insait long ol dispela bokis i gat bikpela asua long em olsem na kot i mas stopim dispela bokis.

Em i go het long kot bikos em i ting long taim bilong dispela saplimentri ileksen, sampela pasin bilong bihainim long karimaut ileksen i no stret na i brukim lo.

Mista Marabe i tok em i nogat kros o bel nogut long wanpela man. Bikpela samting em em i laik soim olsem rot stret bilong bihainim na winim ileksen i no bin kamap. Olsem na em i askim ol sapota bilong em long sindaun isi na larim kot yet i go pas long wok bilong em long glasim na skelim ol evidens na ol ripot i stap na mekim gut disisen bilong em.

Tari Pori i bin go long saplimentri ileksen las yia long wanem i bin gat planti trabel na hevi long 2002 jenerel ileksen na ilektorel Komisnin i stopim olgeta risal bilong 2002 ileksen long ol ilektoret long Sauten hailans provins.



**Wanpela famili i amamas long pinisim skul bilong ol wantaim ol digri pepa bilong edukesen. Dispela lain famili i pinisim skul bilong ol long Goroka Yunivesiti long las mun. Poto: SAPE METTA.**

**Kot i painim Nali i asua**

MEMBA bilong Mendi Michael Nali i asua long 4-pela eria bilong mani bilong pablik na ol rot em i bihainim long yusim mani bilong ilektoret.

Kot bilong Lidasip Traibunel (kot bilong ol lida) i bin sindaun long las wik Fraide na painimaut olsem Mista Nali i brukim lo long 4-pela eria we i no stret long ai bilong dispela kot.

Mista Nali em memba bilong Mendi longpela taim i kam na dispela em namba tu taim bilong em long kisim sas aninit long kot bilong Lidasip Traibunel. Namba wan sas em, em i peim fain na go bek holim wok bilong em olsem memba bilong palamen na i bin kamap minista long sampela wok minista tu.

**Hagen mejistret kisim taim long haus**

SIEF Mejistret bilong Papua Niugini John Numapo i no amamas long Nesenel Hausing Kopresen i rausim wanpela sinia mejistret long haus slip bilong em long Hagen. Dispela mejistret nem bilong em Sari Seneka na em i sinia mejistret bilong Mt Hagen.

Mista Numapo i tok em i no amamas tru long pasin Hausing Komisnin i mekim long salim dispela haus aninit long Give Away Skim (GSA) bilong gavman.

Aninit long dispela GSA program, ol pablik sevan i mas baim ol haus we dispela mejistret i gat dispela rait long baim dispela haus long wanem em i stap

aninit long pablik sevis, em i tok.

Tasol kirap nogut Nesenel Hausing Kopresen i go het na salim dispela haus long wanpela pasto husat i no wanpela pablik sevis na dispela i no stret olgeta long dispela sinia mejistret bilong Hagen, em i tok.

Mista Numapo i tok ol mejistret i wok long bungim hevi long haus tude bikos ol i sot long haus na planti i save slip wantaim ol wantok na sampela i save slip nabaut long ol setelmen na go long wok.

Em i askim gavman long sekim dispela pasin Nesenel Hausing Kopresen i

mekim long salim dispela haus i go long wanpela ausait man long pablik sevis. Em i ting i gat paul na hait pasin i stap insait long dispela.

Ol haus NHC i givim long ol wokmanmeri bilong kot em ol i kirap salim i go gen long ol lain husat i no wok long pablik sevis. Insait long tripela mun ol i salim tripela haus na mi ting i gat hait na krangki pasin long dispela, Mista Numapo i tok.

Em i singaut nau long bikpela wok painimaut i mas kamap na sekim gut ol haus NHC i bin salim long ol taun olsem Hagen, Wabeg na Manus.

**Simbu i redi long resis bilong rijonol sit**

SIMBU provins i kamapim pinis nem bilong ol kendidet husat bai resis long bai ileksen bilong Simbu rijonol sit long dispela yia.

Dispela sit i bin stap nating bihain long olpela rijonol memba na Gavana bilong provins Pater Louis Ambane i kisim sik na dai long las yia.

Long las wik em ol dispela nem bilong ol kendidet i bin

kamap long Simbu ilektorel opis.

Ol kendidet em Daundo Tokam (Independen), Joe Mek Teine (Nesenel Pati), Aiwa Olmi (PNG Pati) Mark Paul (Independen), Joe Kupo (Independen), Vincent Bundo (URP), Rufinus Komba Waim (Independen), Dokta John Kola (Pangu), John Rubi Bore (Independen), Thomas

Tumun (PPP), Apa Kure Mogia (Independen), Joe Wal (Independen), Peter Igi (PAP), James Mini Tala (CDP), Pater John Garia (Nesenel Alaiens), Herman Kagl (Independen), Ludger Mond (Independen), Noah Kool Yalba (PLP), Bill Ginabul Ninkama (Independen), Peter Launa (PNG Resource Pati), John Kamb

(Independen); William Onglo (Independen) na Mark Roy (Independen).

Dispela em ol nem bilong resis long rijonol sit bilong Simbu provins.

Sampela olpela, nem em yumi ken lukim i kamap olsem Ludger Mond olpela memba bilong Sinasina Yongumugl na John Kamb olpela memba bilong Kerowagi.



RAD-TEL (PNG) LIMITED  
GOROA STREET, GORDONS  
PO Box 43, Waigani, NCD,  
Papua New Guinea  
Phone: 325 2555; Fax: 325 0872  
Email: radtel@radtel.com.pg  
Website: WWW.radtel.com.pg

**LAE Phone: 472 6203  
Fax: 472 7577**



**THE BETTER QUALITY GSM DIGITAL MOBILE PHONES**

1. It s the Sambung True Colour Screen Display. **Model, SGH-T400 Dual.**  
65000-Colour TFT LCD. 40 Polyphonic Ringtones & Wallpaper.  
Mobile Internet (WAP - 1.2)  
Voice dialing, Voice Command, Voice Memo, Two Original Batteries, Color Games.

**Accessories**  
¥ Hand set  
¥ Travel Adaptor  
¥ Portable handsfree.

1. It s the LG - G5300 True Colour Screen Display.  
**Model, G5300 GPRS Phones**  
65000-Colour LCD (128\* 128 Pixel)  
EMS/Ringtone & Picture Down-Load Support  
16-Poly-Midi Sound  
Colour wall paper & Screen saver  
WAP Browser VER. 1.2.1  
Up Grade Internet Access

**Accessories** Hand set, Standard Battery, Neckstrap, Card, User s manual, Travel Adaptor, Portable handsfree & the Data Kit/Cd



## Hap Hap Nius

## Fly i gat atoriti bilong bosim ol spak dring

FLY RIVA Kabinet i tok orait pinis long kamapim wanpela Provinsel Lika Laisensing Atoriti.

Gavana Bob Danaya i tok dispela atoriti bai i gat pawa long bosim salim bilong lika o ol spak dring long provins.

Provinsel Eksekutiv Kaunsil i bin bung long Kiunga na i bin tok orait long sampela ol arapela disisen tu olsem.

## Ol tisa i greduet

MEMBA bilong Mosbi Saut, Ledi Carol Kidu, i amamas long ol 33 pri-skul tisa husat i bin greduet bihain long wanpela 3 wik kos las Fraide.

Ol dispela tisa i kam long 54 Komyuniti Developmen Komiti long elektoret bilong em an yet i bin givim mani long kamapim dispela kos.

Dispela ol tisa bai i ken helpim gut tru ol liklik meri na manki long ol komyuniti bilong ol na lainim ol long planti nupela samting.

## Presiden mas lusim wok - ol NCD meri

OL MEMBA bilong Nesenel Kepitel Distrik Wimens Kaunsil i singaut long presiden bilong ol long risain o lusim wok insait long 7-pela de long wanem ol i tok i gat sampela hevi long sait bilong fainens o mani na etministresen.

Mis Jennifer Kivia, husat i tok em i makim maus bilong 200 memba long Pot Mosbi, i tok las wik olsem Maria Andrews i mas lusim wok insait long 7-pela de o ol bai karim ol dispela hevi i go long kot long stretim.

Em i tok Mis Andrews i no bin soim ol memba ol fainensel ripot bilong moa long K10,000 ol i bin kisim bilong Not Wes Wimens Kaunsil long 2002 bilong wanpela projek.

Long dispela taim Mis Andrews i bin vais presiden, Mis Kivia i tok.

Em i tok olsem i gat sampela askim tu long we Mis Andrew na ol arapela lida i bin yusim K143,000 long 2002.

Ms Andrews i tok olsem dispela K10,000 i bin wanpela lon projek na em i wok long karim kaikai.

Aninit long dispela projek ol memba i ken kisim ol lon o dinau mani long statim ol liklik bisnis olsem salim buai na ais blok.

"Nau ol i wok long lukim kaikai bilong dispela projek na i wok long baim bek ol lon ol i bin kisim," Mis Andrew i tok.

## Baha'i lotu amamasim bikpela de bilong ol

OL KAIN lotu long wol i gat ol bikpela de ol i luksave long ol na ol i save holim ol selebresen taim ol dispela bikpela de i kamap. Sampela ol bikpela de em planti ol arapela sios tu i luksave long em. Em long Krismas na Ista.

Long Sande Mas 21, olgeta lotu Baha'i lain long wol i bin selebretim Nau-Ruz bilong ol. Nau Ruz i min olsem Nu Yia long sios kalenda bilong ol. Long dispela de, ol i kisim kaikai bihain long ol i bin wokim sakrifais long i no kisim gut kaikai long 19 pela de. Taim we ol bin wokim fasting o i no kisim kaikai i bin stat long Mas 1 inap long Mas 19. Dispela em 19 de olgeta.

Long dispela taim, ol Baha'i memba i save kisim kaikai bipo san i kam antap long bikmoning, stap nating wantaim nogat kaikai inap long san i go daun long apinun gen. Long dispela taim tu, ol i glasim laip long spirituel na fisikel o bodi sait na sapos i gat sampela eria we ol i laik kamapim senis long en, em ol i wokim.

Ol i makim dispela taim tu long wokim Nau-Ruz bikos em



Dispela grup bilong Rigo insait long Sentrel provins i danis long amamasim Nau-Ruz long Hohola Baha'i Senta long Pot Mosbi. Foto: VERONICA HATUTASI.

i stat bilong Spring na dispela i makim nupela laip, taim bilong amamas, gutpela smel long ol flawa we ol i karim ol naispela purpur i gat ol naispela smel long dispela taim.

Namba wan selebresen bilong Nau-Ruz i bin kamap long Iran long taim bilong ol olpela king. Dispela em i winim 2,000 krismas i go pinis. Long

dispela taim, ol musik grup i save go aut long ol wanwan hap long kantri na pilai musik long mekim ol pipel i amamas. Na ol pikinini na ol bikpela manmeri i save amamas na danis singsing wantaim na stap insait long ol selebresen long wanem em i stat bilong nupela laip na i stat long taim bilong spring. Na em i taim we

spirituel laip bilong ol em i senis na i kamap klinpela na nupela gen.

Orait, long PNG, ol Baha'i komyuniti tu i bin bung, wokim lotu na bihain long em, kamapim ol ektiviti na las long en em ol bin serim kaikai long makim pinis bilong pasim kaikai.

Ol wan wan grup i makim ol komyuniti we ol i save bung na lotu long em i bin kamapim ol ektiviti olsem tumbuna danis na singsing, pilai drama long famili laip na laip na stap bilong ol yangpela pipel tude na moa.

Long dispela taim tu, wanpela stail manki hap bilas ples na Hula i bin putim kamap danis bilong biknem musik man em Michael Jackson. Dispela em taim musik na ol singsing bilong em i pilai.

Long apinun olsem tu kilok samting taim ol pilai i pinis, olgeta i bin sindaun serim kaikai bipo bung i bruk na ol i go bek long ol wan wan haus bilong ol.

Lotu bilong Baha'i isi isi i wok long kamap bikpela long PNG.

## Manki kalabus long katim het bilong kandre

WANPELA manki i gat 15 krismas husat i katim het bilong ankol o kandre bilong em i kisim oda long Nesenel Kot long Milen Be provins long kalabus long inap long 18 yia.

Kubala Nubenube bilong Utalowta ples long Bolubolu hap bilong Goodenough Ailan, i bin kisim dispela oda long Jastis Panuel Mogish bihain long em i bin painim olsem em i bin rong long katim het bilong kandre bilong em, Nelson Daniel Kulodidi long Julai las yia.

Nubenube em i

namba wan pikinini long famili bilong em. Em i gat 3-pela liklik brata na susa na marit bilong papamama i bin bruk. Em i no bin go long skul.

Kot i harim olsem Nubenube i bin hait i kam baksait long kandre bilong em long Julai 30 las yia na paitim em long baksait bilong nek bilong em wantaim busnaip we i sap tru, na katim na rausim het olgeta long bodi bilong em.

Nubenube i tokim kot olsem em i bin gat sampela wari long dispela taim na het bilong em i

paul na em i bin kilim kandre bilong em long wanem kandre bilong em i no save mekim gut long em.

*"Kande bilong mi i no save mekim gut long mi."*

"Dispela em i wanpela dai we i kamap insait long wanpela famili, wanpela manki i katim nek na rausim het bilong kandre bilong em wantaim busnaip.

"Dispela i wanpela bikpela rong na wan-

pela strongpela mekim-save i mas i go long dispela manki," Jastis Mogish i tok.

Long arapela nius, wanpela man Milen Be husat i kilim tupela pipel wantaim busnaip na i kisim oda long kot long kalabus inap long 20 yia.

Jastis Mogish gen i bin harim dispela kot na em i givim strongpela mekimsave long dispela man.

Dispela man, Steven Gill, husat i gat 40 krismas na i bilong Erapepe ples long Rabaraba distrik i bin kilim Paul Libai na Esmie Dagibobo taim

ol i wok long kisim kokonas stap long gaden bilong ol.

Em i bin askim kot long lusim em i go long gud bihavia bond o wanbel namel long kot na man olsem sapos em i mekim kain samting olsem komyuniti sevis na i no mekim wanpela trabel gen, na kam long kot long ripot long ol de kot i makim, orait dispela em i mekimsave bilong em na em i no nid long go long kalabus.

Tasol Jastis Mogish i no bin wanbel long askim bilong em na salim em i go long kalabus.

Hino

King of the Road!

Ela Motors  
TRUCKSQuality  
Endorsed  
Company  
HINO IS YOUR  
Standard Partner

HINO GT3HFKA 4x4

4m<sup>3</sup> DUMP BODY · EX-STOCK LAE

K185,499

Drive Away!

POM : Errol McKinnon : Ph 3229467 Fax 3217268

Email : emckinnon@elamotors.com.pg

LAE : Tokana Hasavi : Ph 4781800 Fax 4722463

Email : laeadmin@elamotors.com.pg

AVAILABLE  
FOR IMMEDIATE  
DELIVERY

OFFER EXPIRES : 13/03/2004

Ol toktok bilong ol bisop long taim yumi go bungim Ista na amamasim dai na kirap bek bilong Jisas Kraism

# Yu lukim Bikpela pinis?

**Bishop Wesley Kigasung Evangelical Lutheran Church of Papua New Guinea**

LONG Gutnius bilong Jon Sapta20; yes 24-29 yumi lukim tok bilong ol disaipel bilong Jisas i lukim Jisas. Toktok i kamap namel long ol arapela i lukim pinis Jisas na Tomas husat i no bin stap taim Jisas i kamap long ol arapela disaipel. Ol disaipel husat i bin lukim Jisas ol i tokim Tomas:

"Mipela i lukim Bikpela pinis" (Jon 2: 25a)

Tomas i bin tubel long dispela tok na em i tokim ol wanlain bilong em olsem: Sapos mi no lukim mak bilong ol nil ol i bin putim long han bilong em, na sapos mi no putim han bilong mi i go long sait bilong em, orait mi no ken bilip. Nogat tru (Jon 20: 25b)

Bihain Jisas i kamap gen long ol disaipel na long dispela taim Tomas i stap wantaim. Na long dispela taim Jisas i givim bel isi long ol na bihain em i tokim Tomas long kam na putim pinga bilong em long ples bilong nil na long sait bilong em olsem em yet i bin tok. Jisas i mekim strongpela tok tu long Tomas olsem: "Maski long tubel long bilip yu mas bilip tasol"

Tomas i bekim tok long Bikpela bilong em olsem; 'Yu Bikpela bilong mi, Yu God bilong mi'. (Jon 20: 28). Na bihain long dispela tok bilong Tomas, Jisas i tokim em: "Yu lukim mi pinis na yu bilip a? Ol man i no lukim mi na ol bilip, ol dispela man i ken amamas." (JON 20: 29)

Long olgeta yia yumi save tingim dispela de bilong Ista na yumi save autim dispela bilip olsem, Jisas i kirap bek pinis; em I tru! Ol disaipel ol i lukim Jisas na ol i tokaut olsem Jisas i kirap bek. Ol i tokim ol arapela olsem: "Mipela i lukim Bikpela pinis". Ol i no tubel na Jisas yet i stretim dispela tubel bilong ol long strongpela stia. Jisas i tok: "Maski long tubel long bilip. Yumas bilip tasol". Bihainim dispela tok tasol yumi lukim dispela bikpela tok Jisas i mekim na dispela tok inap givim bel isi na strong long yumi long luksave long dai na kirap bek bilong Jisas. Jisas i bin tokim Tomas; "Ol man i no lukim mi na ol i bilip, ol dispela kain man i ken amamas." (Jon 20: 29)

Long planti yia i kam Kristen manmeri long olgeta hap graun, long kain kain tokples i sanap long dispela luksave na bilip long dai na kirap bek bilong Jisas,

Kristen manmeri i no tubel long autim dispela bilip, nogat. Oltaim Kristen bilip man meri i amamas long autim dispela bilip long Jisas i bin dai long sin bilong ol na i kirap bek pinis no i givim dispela nupela bilip na strongim promis bilong laip i stap oltaim.

Ol disaipel lukim Jisas na dispela i strongim promis bilong Jisas na strongim bilip bilong ol disaipel. Yumi no lukim Jisas long ai tasol long ai bilong bilip yumi luksave long dispela bikpela samting God i mekim long givim yumi laip i stap oltaim. Tok bilong God i soim yumi long dispela dai na kirap bek bilong Jisas na em i no wanpela stori nating, nogat. Dispela em Gutnius bilong sori na marimari bilong God em i soim yumi long wok na dai na kirap bek bilong Jisas. Insait long dispela Gutnius yumi luksave long Jisas. Insait long Gutnius yumi luksave long Jisas em i Bikpela bilong yumi. Na long Gutnius Bikpela i kam long yumi na stap klostu wantaim yumi. Long bilip yumi save long Jisas, na yumi lukim Jisas na yumi luksave long wok bilong em long laip bilong yumi.

Wanpela taim gen long dispela Ista mi prea long olgeta Kristen man meri i ken kisim

taim long tingim dai na kirap bek bilong Kisas na yu wan wan i ken lukim Jisas insait long dispela stori bilong Ista. Mi prea long wan wan Kirsten i ken painim mining tru bilong Ista na dispela i ken givim yu mining long laip bilong yu na strongim yu long bilip. Planti taim kain kain amamas bilong dispela graun na kain kain pen na hevi na wari bilong laip i save daunim yumi na kamapim tubel na pasim ai bilong yumi long lukim Jisas. Mi askim long yumi no ken tingim de bilong Ista long het tasol, nogat. Dispela Ista yumi ken larim Holi Spirit bilong Bikpela i ken helpim yumi na stiaim yumi long harim dispela Gutnius bilong dai na kirap bek bilong Jisas long nupela luksave. Mi laik bai yu inap lukim Bikpela bilong yu i kirap bek na i stap laip na i stap Wasman bilong yu na Poroman bilong yu long laip na wok na wokabaut bilong yu.

God i stap wantaim yupela olgeta long dispela Ista na Spirit bilong Bikpela i ken stiaim na strongim bilip bilong yupela na yupela i ken amamas long lukim Bikpela bilong yupela i kirap bek na i stap laip na i stap klostu wantaim yupela wan wan.

**"Tru tumas Bikpela i kirap bek"**

# Laip em wanem samting?

**Bishop Sir Brian Barnes, Katolik Asbisop bilong Pot Mosbi**

WANPELA samting yumi save toktok long en planti taim; em laip. Yumi save tok long laip bilong graun, na laip bilong bodi, long laipman na daiman, long laip oltaim na nupela laip. Wanpela singsing i save tok long "wara i gat laip". Ol kot ol inap makim laip, olsem bai man i stap kalabus inap olgeta laip bilong en. Yumi save tok olsem: blut em i laip, na ol narapela toktok moa.

Sapos yumi stap isi na tingting i stap, yumi ken traim tingting na askim yumi yet olsem: laip em i wanem samting tru? Yumi ken luksave long ol mak bilong laip, na long ol mak i soim olsem, laip i no moa stap. Yumi save makim wanem taim laip em i save stat, na wanem taim laip i pinis, olsem taim man idai. Tasol, "laip" em i wanem samting? Em i hat long tok, long anem, laip em ino wanpela samting yumi inap holim, o lukim long ai bilong yumi. Yumi ken save olsem yumi gat laip, long wanem, sapos yumi inap tingting tasol long ispela, em i soim olsem yumi stap laip. Yumi no inap lukim laip long ai bilong yumi, tasol laip em i samting tru ya!

Yumi save tok olsem: Laip em i bikpela samting. Olsem na yumi save tingting planti na pilim nogut taim yumi harim nius, o ol stori, long ol sampela, namel long yumi, ol i save kilim narapela man o meri, kilim nating, i nogat as, mekim wantu tasol, nogat tingting long mekim, na mekim yet. Ol i mekim olsem, na i luk olsem ol i no sori ol i mekim pinis. Long ol kain olsem, i luk olsem laip em i samting nating.

Planti taim Jisas i bin toktok long laip. Em i tok: "Mi kam

bilong ol i ken kisim laip, na laip i ken pulap tru long ol." (Jn 10:10). Em i tok tu olsem: "Laip em i win long kaikai." (Mt 6:25), na "Mi yet, mi bret bilong laip." (Jn 6:35), na "laip, em mi yet." (Jn 11:25). Jisas i tok: "em i kam bilong givim laip bilong em bilong baim bek planti manmeri." (Mt 20:28), na "bai yupela i ken bilip long Jisas Kraism, em i pikinini bilong God. Na sapos yupela i bilip, orait bai yupela i kisim laip long nem bilong em." (Jn 20:31).

Long Ista yumi amamasim kirap bilong Jisas long indai. Jisas i dai na i kirap gen, em i bikpela samting long bilip bilong yumi. Paul i bin tok olsem: "Sapos i tru God i no bin kirapim Kraism, orait dispela tok mipela i save autim, em i samting nating, na bilip bilong yupela em tu i samting nating. Tasol i no olsem. Nogat. Kraism i dai pinis, na tru tumas God i bin kirapim em bek. Em i kirap paslain long ol man i dai pinis, olsem namba wan kaikai i redi long gaden." (1 Cor. 15:14, 20). Pestode bilong Ista em bilong laip, bilong amamasim laip, em long Jisas yet i Laip, em i givim laip bilong em, bai yumi tu i gat laip, laip tru bilong oltaim.

Yumi givim tok tenkyu long Bikpela long presen bilong laip, na yumi pre bai yumi gat save inap long luksave olsem, laip bilong yumi i sotpela tasol. I gat toktok olsem long wanpela bilong ol Sam: "Laip bilong yumi manmeri i sotpela tru olsem gras. Yumi stap sotpela taim olsem plaua bilong gras na yumi dai. Win i naisim plaua na em i pundaun, na ol man i no moa lukim plaua i stap." (Ps 103: 15-16). Laip i sot, na long planti bilong yumi long PNG, laip em i hat tu. Long ol taun na siti, planti lain ol i save painim hat tru long painim kaikai inap long wan wan de.

## PABLIK NOTIS HIH INSURANCE (PNG) LTD

Ol Dairekta bilong HIH Insurance (PNG) Limited ("HIH PNG") (pastaim ol i save kolim MBf Assurance Limited na FAI Insurance (PNG) Limited) i laik toksave olsem Kampani i no mo ronim insurens bisnis na i klostu nau long pinisim ol wok bilong em insait long PNG. Olsem tasol, HIH PNG (wantaim MBf Assurance Limited na FAI Insurance (PNG) Limited) i askim sapos husait man o meri i bilip olsem em i gat kleim we kampani i no stretim yet, orait em i mas salim kleim o wari blong em i kam long dispela adres; HIH Insurance (PNG) Limited, Level 2, Mogoru Moto Building, Champion Parade, Port Moresby, P O Box 507, Port Moresby o long Fax namba 321 2780 o long email kpmgpng@kpmg.com.pg.

HIH PNG i laik tok klia olsem dispela toksave em blong ol general insurens na wokus kompensesen kleim tasol na i no karamapim ol laip insurens kleim na polisi aninit long laip insurens bisnis blong HIH PNG. Sapos wanpela man o meri i gat kleim o wari long laip insurens polisi o seavings blong em orait em i mas go lukim o salim pas long Workers Mutual Insurance (PNG) Limited, Gabaka Street, Gordons, P O Box 292, Jacksons, National Capital District o salim fex long 323 2992 o ringim telepon 323 2929.

Bod of Direktas blong HIH PNG  
i autoraisim

**kpmg**  
Private Business  
Service Taxation

P.O. Box 507  
Port Moresby  
tel: 321 2022  
Fax: 321 2780  
e-mail: kpmg@kpmg.com.pg

# Matmat i nogat dai man

**Rait Reveren Peter Fox, Angliken Bisop bilong Pot Mosbi**

YU INAP long lukim matmat bilong Jisas Kraism sapos yu go raun long dispela hap. Em long olpela siti bilong Jerusalem, insait long Sios bilong Holi Sepuichre. Matmat tru tru em i no stap moa. Ol i bin brukim long taim i go pinis na antap long en ol i mekim wanpela bikpela haus lotu.

Tasol yu ken sanap long lain na go insait long wanpela liklik sapel em i sanap stret antap long dispela hap we Joseph bilong Arimathea, i putim bodi bilong Jisas bihain long em i kisim i kam daun long kruse.

Mi bin mekim dispela. Mi bin brukim skru arere long dispela sapel. Na mi pilim olsem wanem? Mi pilim olsem wanpela ples we i nogat samting o manmeri. Taim mi tok nogat samting mi no min olsem i nogat samting. I bin i gat kainkain samting i stap. I gat ol lam i hangamap i kam daun na ol liklik kabot na ol srain o stetyu o piksa bilong man ol i wokim long graun sanapim pas long ol wol. Tasol bai yu gat dispela kain tingting olsem yu i lus.

Mi yet mi no pilim olsem dispela hap em i holl, o ai op na aigris. Wanpela samting tasol mi pilim em bel guria.

Mi pilim olsem mi mas pilim sampela kain samting moa bilong wanem mi brukim skru long hap we ol i bin putim bodi bilong Jisas.

Mi wok long askim mi yet bilong wanem mi pilim olsem mi lus na dispela bekim i kam insait long tingting bilong mi. "Bilong wanem yu painim man i stap laip yet long ples bilong ol daiman? Em i no stap long hia. Em i kirap pinis." Luk 24:5

Em stret, matmat i nogat bodi. Matmat em ples bilong ol daiman na Jisas em i no dai.

Mi lusim dispela liklik sapel na i go lukluk raun long ol arapela hap bilong dispela bikpela haus lotu. Mausman bilong olgeta Kristen Sios bilong wol i bin stap long hap na ol turis olsem mi i lukluk raun na kisim piksa bilong ol kain stail ol i mekim haus lotu. Long dispela taim, planti nois tru i wok long pairap long dispela hap na mi lusim dispela hap na go long mi yet long tingting long matmat i nogat bodi long en na mi kamap long narapela sapel.

Dispela sapel i nogat ol kainkain bilas olsem narapela ya. I nogat turis tu i stap long hap. Wanpela sain i stap long dua i tokim ol lain husat i kamap long dispela hap long noken mekim nois bilong wanem Blesed Sakramen i stap insait. Mi go insait na painim wanpela hap long

brukim skru na prea. Wanpela liklik kendel i wok long laip i stap long mekim ol lain i luksave olsem Jisas Kraism i stap insait long sakramen. Taim mi daunim het long prea, mi save wantaim olgeta tingting na bel olsem. Jisas i bin stap wantaim mi.

Bilong wanem yumi painim man i stap laip long ples bilong daiman? Jisas i no dai. Em i stap laip long hia, namel long yumi nau.

Yu laik bungim em? Yu noken go long Jerusalem long painim em. Em i isi long yumi pilim olsem em i stap klostu taim yu sanap arere long raunwara long Gailli. Em i tru, tasol em i stap klostu tu sapos yu go painim em long Soger i Vanimo, Mt Hagen o Vadavada. Yu ken painim Jisas long olgeta hap, em sapos yu lukluk wantaim bilip.

Tupela tausen yia i kam na i go pinis bihain long Jisas i kirap bek long matmat. Tude yumi save bungim Jisas i no olsem wanpela piksa insait long buk tasol em olsem man. Tru tru olsem yumi i no inap lukim pes bilong em, tasol yumi i ken pilim olsem em i stap klostu. Yumi i no inap harim nek bilong em wantaim iau bilong yumi, tasol em i save toktok insait long lewa bilong yumi, em sapos yumi putim iau, bai yumi harim em.



# Lons long program bilong sapatim skul bilong pikinini meri

Veronica Hatutasi i raitim

## Minista askim sapat bilong komyuniti

SALENS i go long olgeta grup insait long kantri husat i wari long skul bilong ol pikinini meri long wok bung wantaim na go hetim eksen plen bilong sapatim gels edukesen.

Edukesen Minista Michael Laimo i wrekim dispela tok tok taim ol bin lonsim "Plen ov Eksen bilong Hariapim na Strongim skul bilong ol Gels o ol meri."

United Nations International Childrens Fund (UNICEF) i go pas long dispela program wantaim sapat bilong Edukesen Dipatmen.

Bihain long planti toktok long sapatim na strongim edukesen bilong ol meri long ol yia i go pinis, samting i wok

long kamap nau long mekim dispela i kamap tru. Na namba wan hap bilong dispela wok em i kamap taim ol lonsim Eksen Plen long las wik Trinde long Pot Mosbi Nesenel Hai skul.

Ol bin kirapim pinis wanpela komiti husat em wok bilong ol em long karimaut ol wok i sut long PNG i mas strongim na go hetim Eksen Plen bilong Gels Edukesen. Ol i kolim dispela komiti long PNG Accelerating Girls Education Plan of Action (PNG AGEPA).

Minista Laimo i tok em i bikpela samting long olgeta manmeri na pikinini long kisim skul bikos dispela bai kamapim gut developmen bilong wan wan, famili,

komyuniti na kantri.

Tasol em i tok em i bikpela samting moa long ol pikinini meri i mas skul long wanem ol famili bai heliti moa, mak bilong ol pikinini long famili bai liklik na ol bai inap long lukautim gut olgeta samting.

Minista Laimo i bin tok kalsa o pasin tumbuna bilong yumi we i save pasim ol meri long planti samting na putim tasol man i go pas i mekim ol meri i luk olsem ol i sekon klas na ol i no go fowed. Na em i tok dispela em i wanpela bikpela salens yumi gat long kamapim gut skul bilong ol pikinini meri.

"As tru long mak bilong ol meri i stap long skul i stap daunbilo long PNG em long

bilip bilong kastom pasin olsem ol meri i stap daunbilo long ol man. Tok piksa em sapos famili i laik salim ol pikinini bilong ol i go long skul, ol bai putim ol pikinini man pastaim na i no ol pikinini meri. Wankain tu sapos famili i gat mani hevi, ol bai putim ol pikinini man long skul. Na ol pikinini meri bai stap long ples long mekim wok bikos long pasin kastom, wok bilong ol meri em long wok gaden, lukautim ol pikinini na famili, bungim paiawut na mekim ol kain wok olsem. Long sampela taim, ol i save rabisim ol meri bikos ol i meri. Na dispela i save mekim olsem ol meri i samting nating na i no ikwal olsem ol man. Tasol dispela ol pasin kastom i no soim olsem ol meri i stap daunbilo long ol man bikos long skul, planti meri i wokim gut winim ol man. Na sapos ol meri i gat sans, ol i wokim gut na kontribut long developmen bilong kantri, komyuniti na famili," Mista Laimo i tok.

Em i tok amamas long Wok Komiti i kirap pinis long lukluk long dispela hevi na givim wankain sans long ol pikinini meri long skul olsem ol man bikos dispela i stap insait long Mama Lo bilong yumi.

Em i salensim olgeta grup long komyuniti long sapatim Edukesen Dipatmen na wok wantaim long go hetim plen bilong kamapim gut skul bilong ol pikinini meri.

Em bin givim bikpela tok tenkyu na luksave long UNICEF bilong strongim dispela wok long helpim ol lain na grup husat i no kisim bikpela luksave insait long sosaiti na kantri.



Ol meri tu i wok long kamap strong

Linneth Bofkunim (longpela gras) na Ruth Palmah i winim JICA skolasip long skul long Japan. Ol bin lusim PNG wantaim narapela foapela man sumatin long las Fonde na go long Japan we ol bai skul long ol yunivesiti long hap. Linneth i eks Hoskins sekonderi sumatin na em bai stadim Ilektroniks na Ruth em eks Cameron Hai skul na Yunitek bai skul long Turisim na Hospitaliti. Lukim stori

## Save long ol Raits bilong yu

### Namba Faiv Hap

WOK bilong Komisn (Komisen long Stetus bilong ol Meri- CSW ) i bin helpim long autim planti eria long ples klia we ol meri i no bin kisim wankain luksave olsem ol man. Ol dispela wok long promotim ol meri i kamapim sampela gutpela samting na CEDAW em i bikpela long ol.

Ol lain i makim 30 kantri i bin bruk long ol grup na raitim dispela CEDAW ripot bilong ol meri long olgeta hap bilong graun. Planti long ol meri, long tu tets mak, em ol i bin kam long ol developng kantri we i gat wankain wok developmen long sait bilong wok mani olsem long ol Pasifik Ailan kantri.

Komisn i bin yusim Dekleresen bilong rausim olgeta pasin bilong rabisim ol meri we ol bin raitim long 1967, olsem beis o as long raitim kamap CEDAW deklereesen o ripot. Bikos deklereesen i nogat luksave olsem wanpela ligel ripot, ol i mas mekim kamap olsem wanpela intenesenel agrimen olsem Konvensen.



## BATAMILK SKONS

### Yu mas i gat:

- 3-pela kap self raising flaua 60g bata
  - /kap caster suga
  - 1-pela tispun skin bilong lemon sigirap pinis (lemon rind)
  - 1-pela tispun skin bilong orens sigirap pinis (orange rind)
  - /kap orens jus
  - 11/2 kap Batamilk
- Long putim ekstra topping: putim sampela moa caster suga na skin bilong lemon na orens long sait.

### We bilong Kuk:

Putim flaua long wanpela bikpela dis. Putim bata, suga na sigirap skin bilong orens na lemon long dis wantaim flaua na tanim. Mekim hol na kapsaitim orens jus na batamilk long mekim flaua miks. Putim sampela flaua long bod na tanim tanim flaua miks. Presim flaua miks na spredim long bod wantaim han. Katim flaua stail em long laik bilong yu tasol, raunpela o skwea. Putim liklik gris long beiking trei na laikim ol skon antap. Putim ol ekstra suga, na skin bilong orens na lemon antap long skon. Kukim long aven inap 15-20 minit inap em i tanim golden braun.



Sapos yu gat sampela we long kukim ol kaikai olsem saksak, taro or kaikau na yu laik serim wantaim mipela, salim i kam long mipela na mipela bai putim long niuspepa

## Asua bilong Husat?

WANEK SAMTING BAI KAMAP ABAL? TOMA IRO YUSIAI NONDOM... NENSDE LONG HAUS PAPA NA MAMA I ASKIM JENIFA WE EM BIN STAP LONG NAIT NA EM KAMA LONG HAUS...

JENIFA, YU TOKIM MI STRET, ASTE LONG NAIT YU STAP WE NA YU KAM LEBIT TRU, AHE

MI MI NO GO LONG NARAPELA HAP, MI IGAT WANTAIM ANTY NA KAM.

NOREN GIAMANIM MITUPELA! MI ASKIM ANTY BILONG YU NA EM! TOK YU NO GO LONG EM - NATU OL KANDERE I TOK OLSEM OL I LUKIM YU WANTAIM BOI PREN BILONG YU LONG PATI PLES!

SOB! SOB!

EM NAU, HAAAS TAMA MITUPELA I SANE TOKIM YU LONG NO-KEAI RAIN KWANTUM OL ANANGI YAH?

YU MAS PINIS NAU LONG RAIN ABABUT NOGT YU BUNGUA HEVI! STAP ISI LONG HAUS NA LUKAUTIM OL BRATA SUSA BILONG YU NA TINGIM SKUL BILONG YU TE?

SNIFF!

HEY, HELEN... SAROS YU NO LUKIM... ER, SIKAMUN BILONG LONG TUPELA EM I MIN OUE WANEAM?

SAROS MERI I NO LUKIM SIKAMUN BILONG EM, EM I MIN OUSEAU MERI IGAT BEL O EM I KISIM SAMPELA SIK!

PAPA NA MAMA I SAVE KROSIM EM TASOL LONG KAIN PASIN BILONG RAUN NA PAUL WANTAIM MANKI ... TASOL OL I NO GIVIM GUTPELA TOKSAVE LONG AS TRU BILONG OL KAIN PASIN NA HEVI ... TUPELA MUN BIHAIN NA JENIFA I NO LUKIM SIKMUN BILONG EM ... EM WARI NA ASKIM POROMERI BILONG EM LONG SETELMEN...

LUKIM MOA NEKS WIK

**Tok Tok Nating**  
Wantaim Fr  
Paul Liwun SVD



GUTNIUS bilong Jon 2: 1 - 12, i stori long Jisas i bin mekim wanpela "premature o em i no taim bilong em yet long kamap" mirakel long Kana, bikos; "taim bilong em i no bin kamap yet". Taim yumi ridim dispela gutnius, yumi painim wanpela bikpela na strongpela bilip bilong Maria. I luk olsem santu Maria i save olsem Jisas inap long mekim olgeta samting. Yumi inap save klia long taim em i askim Jisas taim ol papa bilong pati i no gat wain moa, na tu taim Maria i bin tokim ol man i redim pati na tokim ol long bihainim wanem samting Jisas bai askim ol long mekim".

I luk olsem Jisas i bin tok nogat long askim bilong Maria, tasol Maria i bin bilip olsem Jisas i bihainim tok bilong em. Wara i kamap wain bikos Maria, i kamap olsem namel man bilong Jisas na papa bilong pati.

Sapos yumi ritim gutnius bilong Jon gut, yumi bai painim aut olsem, Jon i bin tokaut tupela taim tasol, nem bilong Maria, mama bilong Jisas. Namba wan taim i bin kamap long Kana, taim Maria i bin askim Jisas long mekim wanpela samting. Na Jisas i bin mekim mirakel, tanim wara i kamap wain (Jon: 2: 1 -12). Bipo long mirakel long Kana, Jon i no bin tokaut nem bilong Maria.

Namba tu taim Jon i bin tokaut nem bilong Maria em taim Jisas i bin inapim olgeta wok bilong em long dispela graun. Taim Jisas i bin hangamap antap long diwai kros, Maria i bin kamap gen long Gutnius bilong Jon. Long dispela taim, Jisas i bin givim Maria long aposel Jon husat i kamap olsem pes man bilong olgeta bilip manmeri. Olsem na Maria em i Mama bilong yumi olgeta manmeri i bilip long Jisas.

Taim mi tingim dispela stori bilong Jon, i bin kamapim Maria tupela taim tasol long Gutnius bilong em, mi bin askim mi yet, wanem mak bilong Jon i sut long en? I luk olsem Jon i no wari tumas long Maria i bin stap wantaim Jisas taim tripela yia olgeta Jisas i bin kamap long pablik na mekim wok misen bilong em. O Maria i no wari long wok bilong Jisas? O Jon i no laik promotim wok bilong Maria? Jon i gat mak em i sut long en.

I gat sampela tok i bin kamap olsem, insait long Gutnius bilong Jon, Maria i bin kamap long taim Jisas i statim wok bilong em long pablik na taim Jisas i pinisim wok bilong em. I no min olsem Jon i lusim tingting olgeta long wok bilong Maria. Jon i laik tokim yumi olsem, "I gat spesel wok bilong Maria insait long wok misen bilong Jisas long bringim Gutnius na salvesen insait long dispela wol. Jisas i bin statim wok bilong em wantaim Maria, em i pinisim tu wantaim Maria". Yumi ken tokaut olsem: Maria, mama bilong Jisas em i "Co-Redemptor", em i wanpela aidia tasol inap long tude ol save man bilong sios i no bin kamapim wanpela tok yet. Ol i stap long paitim tok yet long dispela taitel.



**Jisas i go insait long Jerusalem olsem King**

Jisas i mekim dispela tok pinis na em i statim gen wokabaut bilong em, na i bihainim rot o go antap long Jerusalem. Jisas i kamap klostu long ples Betfage na Betani, long maunten ol i kolim Oliv, Yutupela go long dispela ples, na bai yutupela i lukim wanpela donki ol i pasim i stap. I no gat wanpela man i bin sindaun long en bipo. Lusim rop na bringim donki i kam long hia. Na spos wanpela man i askim yutupela olsem, "Bilong wanem yutupela i lusim dispela donki?" Orait yupela i mas bekim tok bilong em olsem, 'Bikpela i gat wok long en."

Luk 19: 28 - 31

# Kristen Buks Melanesia i opim nupela buk stua

...Baibel Sosaiti bai makim nupela eksekyutiv

**Veronica Hatutasi i raitim**

KRISTEN Buks Melanesia i opim nupela buk stua bilong em long Pot Mosbi las Fonde, Epril 1.

Dispela buk stua i stap insait long Baibel Sosaiti Haus long Koki long Pot Mosbi siti.

Baibel Sosaiti opis i tok sosaiti yet i bin pasim pinis buk stua bilong em na nau Kristen Buks Melanesia i kirapim buk stua we ol bai salim ol buk long en.

Kristen Buks Melanesia em i wanpela patna bilong Baibel Sosaiti bilong PNG na em i amamas long wok bung wantaim em na larim em i kam insait long Baibel Haus long Koki Baibel, na salim ol Kristen buk, ol musik na ol arapela Kristen buk.

Dispela em i namba wan taim Kristen Buks Melanesia i opim dispela stua long

Pot Mosbi. Na husat Kristen manmeri i laik baim ol lotu buk-samting we Kristen Buks Melanesia i kamapim, em i ken go daun long Koki Baibel Haus na sekim nupela buk stua ya.

Long ol arapela nius i kam long Baibel Sosaiti opis, ol bai makim nupela Eksekyutiv Seketeri bilong Sosaiti long Epril 18.

Long dispela wik, bikman bilong ol i stap long Rijinel opis long Brisben, Australia bai kam kamap long intevyuum tupela kendidet na tu, toktok wantaim ol lain long sosaiti.

Baibel Sosaiti long PNG i gat 30 kris-mas long karimaut wok long PNG. Pastaim, Baibel Sosaiti bilong Australia i bin lukautim olgeta wok long Baibel long PNG inap long 1975 taim PNG i kirapim

Baibel Sosaiti bilong em yet. Tude, i gat tupela han bilong Baibel Sosaiti long PNG. Het opis long Pot Mosbi i save lukautim tu Sauten rijen. Na Lae opis i save lukautim Momase, Hailans na Niugini Ailan rijen.

Wok bilong Baibel Sosaiti long PNG em long sevim olgeta Kristen komyuniti long kantri we i karimaut ol Kristen wok, trenlesen bilong Baibel na ol rilijes wok, tilim ol long inapim nit bilong ol Kristen komyuniti.

Em i save helpim tu ol sios long trenim ol trenseta o lain bilong tanim tok, kism tok orait long kamapim ol liklik buk i gat ol haphap o ves long Baibel na karimaut ol arapela wok moa i sut long wok Baibel na helpim long kamapim gut Kristen laip bilong ol manmeri long kantri.

## Bung laik strongim wok bilong kamapim gutpela sindaun

**Paulus Tali i raitim**

STRONGIM wok bung namel long ol sios na yut sevis em i wanpela samting we ol lida i bin stap insait long bung bilong Promotim Wol Pis i bin toktok long em.

Konfrens i bin kamap long Samoa we i bin stat long Mas 9 na pinis long de namba 11.

Tripela pipel i bin makim PNG long dispela konfrens. Em long Ledi Carol Kidu husat

i Komyuniti Developmen Minista, Ray Anere i Sinia Leksera bilong Yunivesiti bilong PNG na presiden bilong Evanjelikel Lutheran Sios long Papua Distrik em Reveren Somu Setu.

Minista Kidu i tok em i gutpela long ol sios i strongim yut, famili, komyuniti na gutpela wok developmen bai kamap.

Ol lain i makim Melanesia, Polinisia na Maikronesia i bin kamap long bung. Ol bin

prisenim ol program long ol wok i kamap i sut long wol pis o gutpela sindaun insait long ol wanwan kantri na eria bilong ol.

Insait long ol arapela sios nius, senisim laip na givim laip tru long Bikman long dispela taim bilong Lent em bikpela samting ol Kristen manmeri i ken mekim long redim gut ol yet long Ista, Pasto Newman Madu na Vincent Mafu i tok.

"Sapos yu Kristen manmeri i

laik givim laip tru long Jisas Krai, bai yu inap lukim senis i kamap long laip bilong yu.

"Sapos yu laik bihainim Krai, yu mas komitim yu yet i go na karim Diwai Kruse na bihainim em," tupela pasto i tok.

Ol i tok tu olsem hevi bilong graun i gat nogut i stap. Tasol sapos yumi bihainim Jisas na putim ol dispela samting long han bilong em, bai yumi no inap long pundaun.



**Wol Visen givim helpim**  
Wol Visen em wanpela NGO i helpim Jubili Katolik Sekonderi skul wantaim ol laibreri buk i gat ol lotu na arapela skul teks buk. Long piksa, Pasto Vincent Miria i sekan wantaim Prinsipel bilong skul Misis Bernadette Ove taim em i givim ol bokis buk we pe bilong ol inap long K35,000. Sampela sumatin i soim amamas na holim ol buk i stap. Foto: Paulus Tali.

## K60,000 plen bilong Erima peris projek

**Veronica Hatutasi i raitim**

OL WAN wan Katolik peris insait long Pot Mosbi Asdaiosis na tu, insait long kantri nau i save karimaut ol wok bilong pulim mani na sapotim ol yet.

Olsem ol arapela sekta bilong komyuniti, ol sios i bihainim rot bilong helpim ol yet (self reliance) na i no lukluk tasol long kism helpim long ol mama sios bilong ol.

Wankain tu long Sen Peter Sanel Erima Peris insait long Pot Mosbi Asdaiosis. Em i save karimaut ol fan resing na tu kism kontribusen bilong ol peris memba bilong em long sapotim sios na karimaut ol projek long peris.

Long dispela yia, mak we Erima peris i laik kamapim em K60,000.

Dispela mani bai peris i yusim long tripela eria. Em

long Lenskeping projek o mekim ples i luknais na dispela bai kamap taim ol i stretim graun na planim ol flawa na diwai samting.

Narapela em long stretim rot i go antap long sios na i go olgeta long haus pater na peris graun na tu stretim ples bilong putim ol kar.

Narapela eria em mentenens wok long sios bilding, putim peint gen, stretim kapa we wara i save kapsait long en na ol arapela wok moa we sios bilding i laikim.

Tu, wantaim dispela mani, ol bai karimaut mentenes long toilet ol sios memba i save yusim long en long taim bilong lotu sevis na tu, taim ol i karimaut ol wok long Peris Hol.

Erima Peris i gat ol komiti we i save lukautim ol wan wan eria. Na fainens o wok mani i gat komiti i lukautim na go pas long yusim mani long ol projek

na ol arapela wok bilong peris. Peris i gat ol wan wan lituji grup na rijinel grup we i save wok bung wantaim long ol wok. Na dispela wok bung em i kamap gut tru.

Insait long las 10 yias, sios i bin makim K400,000 long karimaut ol wok projek long kamapim gut peris.

Na em bin wokim ol fan resing na tu, kism ol helpim donesen long ol sampela sios, gavman na komyuniti lida, sampela ausait grup olsem embasi bilong Indonesia na ol arapela misin helpim grup long ovasis.

Plantil ol bikpela projek we peris i pinisim pinis em long rot bilong rausim wara o baret bilong wara i ron long em long sios eria, wokim banis raunim sios na peris eria, ples bilong lusim kar (tasol ol i mas stretim gut yet), penim gen sios bild-

ing, na ol sampela arapela wok moa.

Peris Pris Pater Paul Liwun SVD taim em i strongim ol perisina long wok wantaim na mekim ol wok kamap i tok em i luksave na amamas long gutpela wok bung i stap insait long peris. Dispela i mekim na peris inap long kamapim ol projek we em i sut long en. Tasol em i tok bikpela wok i stap yet na dispela wok bung i mas go het yet.

Long bungim dispela mani mak bilong dispela yia, peris bai karimaut ol fan resing na namba wan wok long dispela bai kamap long mun Jun. Narapela bai kamap long mun Mas neks yia. Namba wan fan resing wok em long Boubou. Ol wan wan grup bai resim mani na long taim bilong Boubou, ol bai bungim wantaim na givim i go long peris pris.

# Planti tausen tisa i no stap long wok

## 450 UOG tisa i no stap long peirol

TAIM sampela skul long kantri i sot long ol tisa yet, planti tisa i no bin ripot long wok taim skul i bin stat long dispela yia.

Ripot long Edukesen Seketeri Peter Baki i tok 6,500 skul tisa i no ripot long wokples bilong ol long dispela yia.

Em i tok ol bai painimaut we ol dispela tisa i stap long en nau na wanem as dispela i kamap. Na tu wanem ol skul i no op long dispela taim.

Long dispela yia, mak bilong ol tisa long olgeta level em 39,000. Tasol 32,500 tasol i stap long wok.

Mista Baki i bin tokaut long dispela samting taim em i askim

bekim long 450 tisa long Goroka Yunivesiti we ol i rausim ol long peirol bikos ol i no bin stap long ples bilong wok long stat bilong 2004 skul yia.

Mista Baki i tok i gat planti as watpo ol tisa i no ripot long wok. Wanpela em ol i go staidi na ol i no go long ol skul dipatmen i putim ol long en.

Bipo long 2004 skul yia i bin stat, Seketeri Baki i bin salim wanpela toksave i go long olgeta tisa long kantri olsem ol i mas stap long ol wan wan skul ol i wok long en wanpela wik bipo skul i stat. Sapos nogat, ol bai

givim mekim save long ol na wanpela bilong ol tu em ol bai rausim ol long peirol.

Mista Baki i bin tok ol tisa i kisim pe long mekim wok olsem tisa na sapos ol i no karimaut dispela, ol bai ino inap long kisim pe.

Long wankain taim ripot i kam long Goroka Yunivesiti olsem dispela ol 450 tisa i bin stap long staidi i tok olsem ol bai risain bikos ol i rausim ol long peirol.

Wantok i no bin inap long kisim moa toktok long dispela samting.

# Ol Edukesen opisel sindaun long Kopirait woksop

**COPYRIGHT** Lo o Kopirait Lo long Tok Pisin i min olsem Lo i banisim ol man i gat save long mekim samting long save na han bilong ol olsem ol musikman, ol atis, ol raita, ol lain i save wokim ol henkraf na ol samting bilong tum-buna. Na sapos of arapela lain i laik yusim ol samting i kamap long han bilong ol dispela savelain, ol i mas kisim tok orait pastaim. Na ol papa na mama bilong ol samting bai kisim luksave long en.

Insait long tupela de woksop bilong ol bikman bilong Edukesen Dipatmen i bin kamap long Mosbi las wik, bikpela luksave i bin kamap long kopirait i mas karamapim olgeta wok ol saveman na sumatin bilong ol i kamapim long yusim long ol skul.

Na narapela samting tu em ol lain i wok wantaim long Edukesen i mas klia gut long as bilong go hetim kopi-

rait lo na wanem samting bai kamap long edukesen na kamapim ol wok.

Edukesen Seketeri Peter Baki i bin tokim moa long 60 opisa bilong Edukesen Dipatmen husat i bin sindaun long woksop olsem i gat tupela sait long kopirait lo.

"Mipela i mas sekim ol metiriel we ol tisa na sumatin i yusim olsem ol samting long wok bilong kalsa, prinin na ilektronik o TV na Intenet em ol i klia long kopirait lo.


"Na bikos long gutpela wok o ol metiriel we Dipatmen i save kamapim, mipela i mas gat banis long lukautim ol samting yumi kamapim long save. Na i gutpela yumi mas putim banis long ol nupela metiriel bilong yumi long Edukesen we kantri na rijen i ken yusim long en," Mista Baki i tok.

Mista Baki i bin tok moa olsem em i laik bai ol lain i bin stap

long woksop i klia gut long lo bilong Kopirait, moa yet long sait bilong raitim kamap ol metiriel bilong yusim long ol skul insait long PNG.

Ol arapela bikman husat i bin toktok long semina em long Profesa Kalinoe em wanpela sinia Lo leksera long UPNG, Marsio Niding bilong Intenesenel Lo wantaim Ateni na Jastis Dipatmen, Dokta Jacob Simet em Dairekta bilong Nesenel Kalsereel Komisin na Sandra Ramamurthy husat i menesa bilong Datanets.

Ol lain i bin kamapim dispela semina i bilip olsem ol bikman bilong Edukesen long PNG bai i klia nau long Kopirait Lo we Palamen i bin tok oraitim long yia 2000 na wanem ol gutpela na nogut i ken kamap taim kantri i go hetim dispela lo.



• Minista Laimo wantaim sikspela sumatin long tok gutbai bung i bin kamap long nupela Daikoku Restron long Andesens Habasait Siti. Foto: VERONICA HATUTASI

## Ol sumatin i winim Japan skolasip i kisim salens

### Veronica Hatutasi i raitim

SALENS i go long ol nupela sumatin i winim skolasip long skul long Japan long wok hat na kam bek wantaim gutpela save long helpim go hetim PNG.

Edukesen Minista Michael Laimo i bin tromoi dispela salens toktok i go long sikspela nupela sumatin insait long wanpela seremoni we Embasi bilong Japan i bin holim long Pot Mosbi long tok gutbai long ol long las wik Trinde.

Ol i bin lusim PNG long Fonde las wik Epril 1 na flai i go long Japan. Foapela sumatin bai skul long tupela yia long ol wan wan yunivesiti long Japan na tupela meri bai wokim spesel trening long tripela yia.

Grup i gat foapela man na tupela meri long en. Nem bilong ol em Michale Loyave na em i bilong Fores Rises Institut long Lae.

Em bai stadim Laip Saiens skul long Tohoku Yunivesiti long tupela yia. Narapela em Kepo Pomat bilong Yunitek.

Em bai stadim Ilektroniks long Yunivesiti bilong Ilekto-Komyunikesen long Tokyo, Raphael Semel em wanpela hai skul tisa long Papitalai Sekonderi skul long Manus bai skruim staidi long Edukesen long Okayama Yunivesiti na William Tongamp i wanpela leksera long Yunitek bai wokim rises skul long Tohoku Yunivesiti.

Tupela yangpela sumatin meri em long Ruth Palmah em meri Misima na em eks Cameron Hai na tu, em bin skul long Yunitek long Lae. Em bai skul long Hotel menesmen.

Narapela em Linnetth Bofkunim bilong Is Sepik na em eks Hoskins Sekonderi. Em bai skul long Ilektroniks.

Long dispela yia, Embasi bilong Japan i bin kisim moa long 400

aplikesen long staidi long Japan fasol ol i kisim sikspela tasol.

Bikman long Japan Embasi i tok olsem aplikesen bilong neks yia i op pinis na ol i ken kisim long Embasi opis. Sapos yu laikim moa toktok long dispela, ringim ol lain long Pablik Rilesens na kalsereel Afeas seksen long telpon namba 3221520 o salim feks long 3212278.

Long dispela Sir Joseph Nombri husat i presiden bilong JARA em wanpela asosiesen bilong ol lain i bin skul long Japan aninit long skolasip, i bin tokim ol sumatin long wok hat taim ol i skul long Japan bikos mani na gutpela tingting bilong helpim bilong kantri (Japan) na pipel i sponsaim ol long skul.

Em i askim ol long kamap ol gutpela ambaseda bilong PNG na lainim ol samting long ol pipel bilong Japan husat em i tok em ol lain bilong hatwok na ol i gat gutpela pasin.

"Mi pilim olsem ol pipel bilong Japan i lainim pipel bilong yumi gutpela na narakain wei long wokim ol samting.

Ol i naispela pipel na lainim long ol. Tasol yupela i stap long hap long skul. Bikpela resis i stap na wok hat," Sir Nombri i tok.

Minista Laimo i bin autim ol wankain tingting tu.

Em i tok ol sumatin i gat bikpela na gutpela sans na yusim gut.

"I gat planti sans i stap long spot, musik na ol kain kain intres. Planti lain long Japan bai amamas long lainim samting long PNG.

Yusim sans long lainim planti samting we bai skruim save bilong yu.

Na taim yupela i kam bek long PNG, bai dispela save i helpim long go hetim strong kantri. Mi tok tenkyu long gavman bilong Japan i helpim long developim humen risos o save bilong pipel we i bikpela samting tru," Minista Laimo i tok.



## NESENEL KAPITOL DISTRIK KOMISIN

# PABLIK NOTIS

## TAIM BILONG BIA BAI PAS LONG ISTA WIKEN

Ol dispela de em ol pablik holidei:

Fraide, Epril 9, 2004  
Mande, Epril 12, 2004

Gud Fraide  
Ista Mande

Long luksave long ol dispela de, Nesenel Kapitol Distrik Komisin i putim tambu long sampela bisnis long bihainim NCD Lika Laisensing Lo long ol de mipela i makim antap.

Ol dispela bisnis bai i mas bihainim dispela lo:

1. Ol Stoakipa
2. Ol Botol sop o ples bilong baim bia na ol strongpela dring
3. Ol Dilas
4. Ol Tavens o hotel
5. Ol Pablik Ba (wantaim ol ba insait long ol Pabliken na Limited Hotels)
6. Ol cabaret pati na ol danis insait long ol hotel o klab tu i mas bihainim.

Nomel wok o sevis bai go het yet long:

1. Restron o haus kaikai we bia na ol arapela dring i save go wantaim kaikai.
2. Ol klab we ol memba na ol ges bilong ol i save kisim dispela kain sevis long ol taim bilong wok.
3. Ol Publicans na Limited Hotels husat i holim laisens we ol ges bilong ol inap kisim dring long ol ba o long rum sevis.

Komisin i askim long wok bung wantaim na wanbel bilong yupela.

**B. M. KARUNARATNE**  
Ekting Siti Menesa

# WANTOK KOMENTRI

## I hat long daunim Somare gavman

Palamen bai bung long Epril 18 dispela mun na vot i nogat bilip em wanpela bisnis bilong traime Somare gavman long dispela taim.

Praim Minista Sir Michael Somare i bin tokaut pinis olsem em i no surik long vot i nogat bilip sapos i kamap long gavman bilong em bikos em i gat inap namba bilong winim dispela vot na holim gavman yet i go inap 2007..

Ol pati long gavman tude em, Nesenel Alaiens (NA), Pipels Nesenel Kongres (PNC), Pipels Eksen Pati (PAC) Nesenel Pati, Pangu na hap Pipels Progres Pati (PPP), hap Yunaitet Risoses Pati (URP), Melanesian Alaiens pati (MA) Yunaitet pati na ol liklik pati bilong Peter Yama, Luther Wenge, Dokta Banare Bun na arapela moa.

Long Oposisen em PNG pati wantaim hap Yunaitet Risos Pati na hap lain bilong PPP.

Sans bilong kamapim vot i nogat bilip tu bai i hat liklik bikos nau yet sampela memba bilong Yunaitet Risos pati i no wanbel wantaim lida bilong ol Tim Neville. Gavana bilong Wes Nu Briten Clement Nakmai wantaim tripela memba i no amamas na i laik go joinim Sam Akotai Minista bilong Maining long sait bilong Gavman.

As bilong dispela bruk em olsem, Tim Neville tasol i save tromoi ol kain toktok we i no makim laik na tingting bilong ol pati memba na tu ol i ting em i no soim rispek long ol arapela olsem ol tu i lida na ol i mas tokaut long tingting bilong ol long ol bikpela toktok na hevi bilong kantri. Dispela piksa i soim olsem Somare gavman bai sanap strong yet wantaim inap namba bilong ol memba taim ol lain ya i kirap go joinim Sam Akotai.

Ol lain bilong Moses Maladina i amamas long kisim namba tu Praim Minista na ol bikpela wok ministri olsem Woks na Trensport na arapela moa.


Ol lain bilong PNC aninit long lida Peter O'Niell tu i amamas long kisim ministri bilong pablik sevis, spika bilong palamen na arapela moa.

Ol lain bilong Sir Moi Avei long Melanesian Alaiens tu i amamas long wok bilong ol. Ol em Ledi Carol Kidu, Sir Moi Avei na Anderson Vele.

Ol lain bilong Peter Yama ino mekim wanpela nois tumas taim Somare i rausim posisen bilong Leba na Emploimen long Peter Yama. Ol i stap isi tasol.

Tupela man tasol i wok long toktok long sensisim gavman em Gavana bilong Milen Be provins Tim Neville na Gavana bilong Morobe Luther Wenge tu i bin mekim sampela kain tok hat agensim gavman long kisim ol Australia wokmanmeri i kam.

# Yu tingim wanem long Ista? Pipel autim tingting bilong ol long taim bilong Ista



Chris Fae

Ista em i taim bilong tingim dai bilong Jisas Krai husat i bin dai long kruse long rausim sin bilong mipela na baim bek mipela long dispela graun.

Em i taim bilong lotu na tingim hevi Krai i bin karim long ol pasin nogut bilong yumi na i no taim bilong yumi long amamas.


Kantri bilong yumi PNG i wanpela Kristen kantri na yumi ol pipel i mas sensim pasin nogut bilong yumi olsem na nau Ista yumi mas go long lotu long dispela taim wantaim Krai Jisas i dai long Kruse.

Karuka Lahari

Ista em i taim bilong tingim Krai Jisas i bin dai long sin bilong mipela ol man long graun.

Em i taim we olgeta lain lotu bai mekim ol sampela ol samting long makim dispela taim we Krai i bin mekim long Baibel i go long dai bilong em long Kruse.

Em i taim we yumi ol manmeri i mas lukluk na skelim laip bilong mipela na sensim sapos yumi wok long mekim ol pasin nogut i stap.



Joe Tau


Ista em i min olsem em taim bilong tingim dai bilong Krai Jisas long diwai kros long rausim sin bilong mipela ol

manmeri bilong graun..

Wantok Niuspepa tu i tingim dispela bikpela de bilong Ista na em i laik salim Ista gritings i go long olgeta Kristen manmeri bilong Papua Niugini.

Ista em i taim bilong tingim dai bilong Jisas Krai long diwai kros na em i de bilong yumi olgeta Kristen manmeri i bung wantaim long lotu na tingim olsem yumi ol manmeri bilong sin na yumi save sindaun na raun long laik bilong yumi.

Tasol taim dispela dai i kamap, yumi olgeta i kam bung wantaim na em i tekewe sin bilong yumi na mekim yumi kamap wan famili olsem brata na susa bilong Krai.



William Fae

Ista em i taim long tingim wei Jisas Krai i bin dai long kruse long ol pekato bilong mipela ol manmeri.

Em i taim we ol Kristen manmeri bai bung na lotu long luksave long dai na kirap bilong Jisas.

Em i taim we ol manmeri i mas save olsem Jisas i bin dai long kruse long pekato bilong mipela.

Ista i no wanpela holid. Em i taim bilong sindaun wantaim ol wan lotu famili na ol poroman long tok tenkyu na amamas long bikpela papa Papa God long salim pikinini bilong em Jisas Krai i kam long graun long karim hevi na dai na kirap bek.

Yumi PNG i Kristen kantri olsem na yumi mas tingim dispela taim bilong Ista.



Morahori Oeka

Ista em i soim amamas, pis na wanbel pasin bilong yumi olgeta long wanem Jisas Krai i bin kam na dai long kruse long

ol pekato bilong yumi na bihain kirap long matmat.

Yumi ol pipel i mas tingim dispela taim na amamas long Papa God wantaim ol famili na poroman bilong yumi.

Mi amamas long Ista long wanem Jisas Krai i bin kisim pasin bilong laikim na pis i kam long wol na yumi ol pipel i stap laip nau.

Sapos yu wanpela manmeri i no tanim bel yet nau em i gutpela taim long yu tanim bel.



Lillian Philip

Ista em i gutpela taim long tingim dai bilong Jisas.

Em i tru olsem sapos Jisas i no bin dai long yumi bai yumi i no inap stap olsem.

Em i bin dai long sin bilong yumi na kirap bek bilong em i bilong baim bek yumi.

Dispela dei em i bikpela tumas olsem na yumi ol Kristen manmeri na ol narapela manmeri i mas go lotu long amamas na tok tenkyu long God.



Regina Ivau

Ista em i taim bilong ol pipel long skelim sindaun bilong ol na tingim dai bilong Jisas Krai antap long kruse long sin bilong ol manmeri.

Ol famili long kantri i mas tingim laip bilong ol na sensim laip nau long wanem planti birua i wok long kamap long ol.

Olgeta pipel i mas tanim bel nau bikos em i Ista na i gutpela tam nau long sensim pasin. Krai dai long rong bilong yumi.

# Tru tumas dispela em i pikinini bilong God.

Matyu 27: 54

Taim Jisas i dai, planti manmeri ol i bin go na lukluk istap. Long dispela bikpela lain planti manmeri ol i bilong Juda. Tasol sampela ol i arapela lain olsem Rom na Grik. Ol dispela lain ol i mas i gat kainkain tingting. Sampela i mas ting olsem i tru Jisas em propet o wanpela spesel lida man God i makim o nogat.

Baibel i tok sampela samting i bin kamap narakain stret taim Jisas i dai.

1. Tudak i karamapim graun olgeta long tripela au.
2. Laplap insait long tempel i bruk,
3. Graun i guria
4. Ol matmat i op
5. Sampela manmeri husat i dai pinis i kirap bek gen.

Ol dispela samting i soim Jisas em i mas wanpela spesel man. Tasol klostu long diwai kros bilong Jisas wanpela kepten bilong Rom wantaim soldia bilong em ol i sanap na lukluk long Jisas na ol i tingim gut pasin bilong dai bilong Jisas na ol i tok olsem, tru tumas dispela man em i pikinini bilong God. Dispela lain ol i no bilip man tasol taim ol i lukim Jisas i hangamap long diwai kros bel bilong ol i kirap na ol i litimapim nem bilong Jisas. Long dispela Gut Fraide i gutpela sapos yumi tu i ken litimapim nem bilong Jisas olsem kepten bilong ami bilong Rom.

# WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD Papua New Guinea

Telephone: 325 8527 (Temporary)

Fax: Out of order

Email: word@global.net.pg

Pe bilong wanpela yia 52 niuspepa


Ples:	Air:
PNG	K140.00
AUSTRALIA	US\$67.00
ASIA PACIFIC na JAPAN	US\$480.00
AMERICA na EUROPE	US\$150.00

General Manager Jeremy Burgess


Editor Yakam Kelo

Published by Jeremy Burgess and printed by Pacific Star-P.O. Box 6817 Boroko NCD at allotment 13 section 38 Waigani drive, Port Moresby

Word Publishing Company Limited is owned by the four major churches of Papua New Guinea- Catholics 50%, Lutheran 25%, Anglican 10%, United Church 10%. The company reverse the rights to accept or reject any advertisement or other material submitted for publication which it deems contrary to the public interest at its absolute discretion. The publisher general term acceptance are available at Word Publishing Company Ltd and are set out full on the display advertising form.



# Lukluk raun long Australia



Dispela taim yumi lukluk insait long wanpela bikpela siti em bikpela kapitol siti bilong Australia ol i kolim Australia Kapitol Teritori

BIK SITI bilong Australia em Kenbera na em i olsem senta bilong gavman na ol bisnis edministresen. Ol i kolim Australian Capital Territory we ol i bin kamapim long 1911 long sait bilong Nu Saut Wels we ol i makim olsem bihain bai ol i mekim kamap olsem kapitol siti bilong kantri Australia.

Kenbera i sanap klostu olsem 300 kilomita longwe long narapela siti ol i kolim Sidni na tu em i sanap olsem 650 kilomita longwe long Melbon siti.

Em i wanpela siti we i gat ol raun wara ol yet i mekim long kainkain hap bilong dispela hap siti. Dispela hap teritori o siti i bin sanap bilong em yet long ranim na lukautim sampela bikpela wok na ol senis bilong em yet long 1989.

Nesene gavman i bin sanap olsem bikpela hap bilong ol long kari-maut ol wok na kisim ol manmeri long wok tasol long sait bilong ol praiwet bisnis tu i bin kamap planti na kamapim moa wok na kirapim moa bisnis. Planti bilong ol dispela bisnis i sut long ol bikpela masin bilong wok wantaim long fektori na ol bisnis na kompyuta masin na arapela moa.

### Australian Capital Territory New South Wales

Kapitol bilong Nu Saut Wels em Sidni na em i wanpela olupela hap bilong kantri we ol ovasis lain long Yurop i bin kam sindaun long en long namba wan taim stret.

Em i gat planti kainkain manmeri i kam long planti kainkain kantri moa long 100 kainkain kantri olgeta. Ol manmeri i kam wantaim kainkain pasin na tumbuna pasin bilong ol.

Ol bikpela samting long dispela hap siti em bikpela kriket graun ol i kolim Sidni Kriket Graun (SCG) we ol i save pilai kriket na ol arapela spot long en na tu i gat bikpela haus ol i kolim Sidni Opera Haus.

Bikos em i olsem maus rot i go long Australia, olsem na ol i makim Sidni long lukautim bikpela spot pilai ol i kolim Olimpik



Lukluk raun long Australia  
Gems long yia 2000.  
(www.nsw.gov.au)

### Moa ripot insait long Australian Capital Territory

Recent Economic Indicators:  
2001-2002 2002-2003

Estimated population: 321,819 323,791

Real Gross State Product growth (%): 1.7 2.9

Real GSP per head growth (%): 0.8 2.2

GSP (current prices) (A\$m): 14,114 15,135

Proportion of Australian GDP (%): 2.0 2.0

Change in real final demand (%): 3.7 4.2

Unemployment rate (%): 4.6 4.2

Merchandise Trade: ACT's merchandise trade, 2002-2003

A\$m % Share Exports: 4 0.0

Imports: 217 0.2

Trade deficit: 213

Average annual export growth over the last

5 Years: -21.0%

ACT's major exports, 2002-2003: ACT's major imports, 2002-2003:

A\$'000 A\$'000

Optical instruments 1,625

Aircraft & parts 212,866

Internal combustion piston engines 651

Tulles, lace, ribbons etc 733

Civil engineering equipment 580

Other woven fabrics 708

Computers 413

Televisions 461

Tobacco, manufactured 378

Artwork, collectors' pieces, antiques 453

Telecommunications equipment 364

Telecommunications equipment 263

Heating & cooling equipment 285

Printing & bookbinding machinery 199

Radio-broadcast receivers 36

Arms & ammunition 174

Other optical goods 6

Photographic equipment 57

Crude vegetable materials 5

Musical instruments 49

Trade Relationships:

ACT's principal export destinations, 2002-2003: ACT's principal import sources, 2002-2003:

A\$'000 % Share

A\$'000 % Share

United States of America 1,365 31.4

United States of America 212,925 98.3

Solomon Islands 651 15.0

India 1,489 0.7

Japan 486 11.2

China 931 0.4

Philippines 378 8.7

United Kingdom 314 0.1

Germany 366 8.4

Germany 259 0.1

Services Trade: ACT's international trade in services, 2002-2003:

Exports: 740 2.3

Imports: 1,002 3.0

Trade deficit: 262

Ol dispela infomesen em mipela i kisim long Maket Infomesen na Analysis Seksen bilong Dipatmen bilong Foren Afeas na Treid



## ISTA HOLIDEI SPESOLS

### Telikad Intanesinol Kol Diskaun

Kantri	Stendad Prais	Spesol Prais	Diskaun Pesen (%)
Australia	K2.45	K1.00	59%
Canada	K4.00	K1.00	75%
China	K4.00	K1.00	75%
Hong Kong	K2.75	K1.00	63%
Indonesia	K2.75	K1.00	63%
Fiji Islands	K2.45	K1.50	38.8%
France	K4.00	K1.50	62.5%
Germany	4.00	K1.50	62.5%
India	K4.00	K2.00	50%
Japan	K4.00	K1.00	75%
Malaysia	K2.75	K1.00	63%
New Zealand	K2.45	K1.00	59%
Pakistan	K4.00	K2.00	50%
Philippines	K4.00	K2.00	50%
Singapore	K2.75	K1.00	63%
South Africa	K4.00	K2.00	50%
South Korea	K4.00	K1.00	75%
Sri Lanka	K4.00	K2.00	50%
USA Alaska & Hawaii	K4.00	K1.00	75%
United Kingdom	K4.00	K1.00	75%

### Telikad Domestik Kol Diskaun

Oi Telepon Kol	Stendad prais Wan wan minit	Spesol prais	Diskaun %
Telepon kol long Sem Zon (Lae i go long Wau)	30 toea	10 toea	66.66%
Adjoining Zon Kol (Lae i go long Boroko)	60 toea	20 toea	66.66%
Non-Adjoining Zon Kol (Lae i go long Daru)	90 toea	30 toea	66.66%
Oi telepon kol i go long mobail pon	75 toea	50 toea	33.33%

Olgeta telepon kol i go long ol Intanesinol na Domestik destinesin bai i stap aninit long diskaun i stat long *Fonde (Thursday) namba 8 de bilong mun Epril 2004 i go inap long Mande (Monday) namba 12 de bilong mun Epril long 12 kilok long nait, 2004.*

Olgeta telepon kol insait long PNG bai karim wan ted (1/3) hap bilong ol stendad sas, wantaim VAT, (bikpela tru) long wan wan minit i go long olgeta destinesin o hap.

Ol telepon kol inap long kam long ol telepon long ol hap insait long PNG olsem telepon bilong ol poroman o hauslain i stap klostu, telepon long wok ples, blupela ekse telepon o long pablik telepon.



Kastoma Sevis Namba: 323 4444

### Ami bilong Indonesia i laik kotim raits grup

Jakarta, Indonesia:

WANPELA humen raits grup o grup we i save pait long rait bilong ol manmeri i tokaut las Fonde olsem militeri bilong Indonesia i laik kisim ol i go long kot long wanem ol i wok long tok olsem ol soldia bilong ol i bin kilim tupela man Amerika bilong Ogas 2002.

Dispela humen raits grup ol i kolim Elsham i tok olsem militeri i wok long askim long kisim 50 bilien rupiah (mani bilong Indonesia we bai inap long US\$5.8 milien) olsem kompensesen long toktok ol i bin mekim na i laik ol i mas tok sori tu long lokel na intanesenel nius.

Las Trinde wanpela witness long dispela keis i tok olsem Elsham i bin grisim em wantaim mani long tok olsem ol Kopasus spesel fos bilong ami bilong

Indonesia i bin kilim tupela man Amerika.

Dispela witness, Decky Murib, i bin tokim kot long Jayapura olsem Elsham i bin mekim ol tok promis olsem ol i bai givim em mani na baim tiket bilong em long raun i go long ol narapela kantri sapos em i tok olsem em i lukim ol soldia i kilim ol tupela man Amerika.

"Mi pilim olsem ol i bin giaman mi olsem na mi tokaut nau long wanem samting ol i bin mekim," Mista Murib i tok.

Tupela tisa bilong Amerika na wanpela man Indonesia i bin dai taim sampela man i bin sut long gan long ol. Nogat man i save husat tru i bin ol dispela man husat i bin sut wantaim gan.

Elsham i tok olsem em i no bin givim mani o mekim ol gris toktok long Mista Murib.

### Australia na NZ givim tok lukaut long go long Turkey

Turkey:

AUSTRALIA na Nu Silan las Fonde i givim tok lukaut long ol pipel bilong ol long noken i go long Turkey long ANZAC De long soim rispek long ol soldia bilong ol husat i bin dai long long hap long wanem i gat sans olsem ol teroris inap long bagarapim ol.

Foren Ministri bilong Australia i tok olsem ol i no harim wanpela toktok stret we i tok olsem ol teroris bai makim ol ANZAC (Australian and Nu Silan Ami Korps) taim ol i bung long makim dispela de tasol i gat bikipela sans olsem ol teroris bai traim long kamapim sampela birua long dispela taim.


### Man bomim em yet

La Paz, Bolivia:

WANPELA man husat i save wok long wanpela main long Bolivia i bin kros taim em i no bin kisim pinis mani bilong em na bomim em yet long wanpela bikipela haus bilong kantri las Trinde.

Dispela man i bin taitim dainamait raunim bros bilong em, i go insait long dispela bikipela haus we ol lida i save stap na bomim em yet. Dispela birua i bin kilim tupela polis opisa na bagarapim 10-pela arapela tu.

Dispela man i wok long askim long kisim pinis mani bilong em bipo long em i pinis wok long wanem ol i no save kisim bikipela mani, na taim ol lida i no harim toktok bilong em, em i rausim belhat bilong em long ol.



### Pati rausim politisen long wanem em i simuk long Palamen

Dublin, Ireland:

LIDA bilong wanpela politikel pati long Ireland i rausim namba wan mausman bilong jastis bilong oposisen bilong ol, John Deasy, bihain long em i bin simuk long Palamen bilong ol na brukim nupela lo bilong kantri we i stopim ol pipel long simuk long ol ples bilong wok, ol klap, ol haus kaikai o insait long ol kar bilong kampani.

Enda Kenny, lida bilong dispela politikel pati, Fine Gael, i bin rausim Mista Deasy bihain long em i bin sumukim sampela sigaret las Tunde nait long klap bilong ol bipo na nau memba bilong Palamen.

Mista Kenny i tok olsem em i sore long rausim Mista Deasy tasol em i mas mekim.

### Sekim Chavez

Venezuela:

OL LOYA i askim Intanesenel Kriminal Kot (ICC) long lukluk i go insait long laip na wok bilong Presiden bilong Venezuela, Hugo Chavez, husat ol i bilip i bin kamap ol rong olsem kilim na bagarapim ol man long helpim politikel wok bilong em.

### Mal Meninga les long sanap long kot

Canberra, Australia:

BIPO ragbi lig pilaia bilong Australia, Mal Meninga, i no bin kamap long kot long bihain long em i bin kisim sas bilong paitim man. Taim jas i askim loya bilong em, Rod MacDonald, long wanem as tru na em i no stap long kot, em i tok Mista Meninga i wok long painim ol narapela we long stretim dispela hevi.

### Woa bilong ol raskol kisim laip bilong 23 pipel nau

Melbourne, Australia:

WANPELA bikipela bos bilong ol raskol long Melbourne, Lewis Moran, husat i bin dai long han bilong wanpela birua bilong em, i bin traim long ronawe long dispela man bipo long em i bin sutim em wantaim gan long ai bilong ol pipel insait long wanpela klap las Trinde nait.

Ol piksa we wanpela vidio kemera i kisim i soim olsem dispela birua i bin tanim ken na sut wantaim gan long Herbert Wrout, wanpela poroman bilong Mista

Moran.

Asistent polis komisina bilong Victoria, Simon Overland, i tokim ol nius manmeri las Fonde, olsem ol piksa we wanpela sekyuriti-kemera long dispela klap i kjsim i soim dispela birua i kam insait long klap na wanpela poroman bilong em i wet ausait.

Piksa i soim olsem Mista Moran i bin traim long ronawe tasol i bin pundaun taim bulet i bin kisim em, Mista Overland i tok.

"Birua i ronim Mista Moran i go na kilim em. "I luk olsem Mista Moran i

bin save olsem wanpela man i wok long traim long kilim em bilong wanem taim dispela birua i kam insait long klap em i bin traim long ronawe," Mista Overland i tok.

Piksa i soim tu olsem bihain long em i bin kilim Mista Moran, birua i tanim gan long poroman bilong em, Mista Wrout, na sut.

"Em i bin sutim long gan long em tasol em i no kilim em, em bagarapim em tasol na ron i go ausait long klap, bungim poroman bilong em na tupela i ronawe," Mista Overland i tok.

## Yangoru Saussia bai ileksen i gat ol olupela kendidet

Dia Edita

Mi laik raitim dispela pas na tok kros i go long dispela bai ileksen bilong Yangoru-Saussia olsem nau yet em ol kendidet i sanap em ol bipo kendidet na giaman gris lida.

Nau yet mi tu wanpela kendidet tasol ol politikel pati bilong PNG i wok long trikim mi long 1997 i kam inap nau na mi givap long politiks.

Ating 2007 bai mi painim mani bilong mi

na ron olsem inden- den kendidet.

Mi no amamas long olgeta politikel pati bilong Papua Niugini. Planti bilong ol politikel pati bilong dispela kantri em ol kusai pati tasol husat i save sapotim ol wan dring poroman bilong ol tasol.

Mi bai mekim bikpela salens agensim olgeta politikel pati long 2007 nesenele ileksen.

**JOHN KRIOSAKI  
WEWAK  
IS SEPIK PROVINS.**

## Trausis bilong ol meri o man

Dia Edita

Mi wanpela susa long Popondetta, Oil Pam provins. Na dispela komplek long "sikis poket trausis" mi ritim long Wantok Niuspepa long Februari 4, 2004.

Mi yet mi wanpela meri wei mi save sem long werim sikis poket trausis. Olsem na mi laik sapotim J. Haea bilong Kimbe, Wes Nu Briten provins long tok bilong em.

Brata em orait sapos meri tru bai harim wanpela toktok na werim sket tasol olsem yu yet tok pinis em paia rais olsem na poket trausis tasol.

Mi laik tok olsem olgeta meri insait long PNG werim sikis poket trausis olsem na yupela yet kirapim ol tingting bilong man long wokim pasin nogut i kamap bikpela tumas insait long PNG.

Ol meri tru bai werim sket na lusim trausis bilong man.

Mi yet sapotim tupela brata long tok bilong sikis poket trausis em Remecus Noupura bilong Wewak na J. Haea bilong Kimbe.

**ROCKS MEUWO  
POPONDETTA  
ORO PROVINS**

## I gat gavana bilong Oro o nogat?

...Maski long slip na opim ai.

Dia Edita

Mi wanpela manki long Oro na mi laik autim wari bilong mi long olgeta rida long ritim na skelim.

Mipela ol pipel bilong Oro i nogat Gavana. Ating Gavana bilong mipela mas dai pinis mi ting olsem.

Nogat nois na pairap bilong em, em i stap we nau?

Maski long slip tumas opim ai bilong yu na traim developim provins bilong yumi liklik nau.

Taun bilong yumi nau em i pulap long plastik na bus i karamapim pinis.

Na wanem taim bai yu mekim wok long kirapim provins?

Ating taim bilong ileksen bai yu mekim olsem na nau maski lus tingting long mipela na bai mipela i stap olsem tasol.

Mipela i no makim yu long go long palamen na slip tumas na ama-

mas raun nating i stap. Mipela harim olsem Gavana bilong mipela em pasto olsem na mi laik lukim wok bilong em long sevim mipela ol sipsip bilong em.

Mi ken tok olsem i gat ol pasto i bin go long palamen haus bipo na ol i go pundaun long amamas bilong mani, naispela haus na kaikai na ol gutpela samting na meri.

Olsem na yu mas tingim yu yet gut na tingim mipela pipel bilong Oro provins.

Mista Bani Hoivo yu bin mekim planti gutpela tok gris long taim bilong ileksen olsem na karimaut ol dispela tok promis bilong yu.

Em tasol belhevi bilong mi na husat laik rait na sapotim mi rait tasol kam long Wantok Niuspepa.

**NEREX KUSE  
DOBUX VILES  
ORO PROVINS**

## Kondom kirapim moa pamuk pasin

...Yumi gat banis pinis olsem na nogat wari, mekim tasol.

Dia Edita

Mi laik bai yu givim mi spes long Wantok Niuspepa bai mi rait na autim belhevi bilong mi.

Mi save em bai i no tingting bilong mi wanpela. Mi save planti Papua Niugini manmeri bai ful sapot long tingting mi gat.

Mi bin ritim long Post Courier olsem ol polis i salim sampela pamuk lain ol i kaikai kondom na winim olsem balun long Mosbi.

Wai na yupela ol polis i mekim olsem? Mi no ting ol dispela lain i komitim rong o brukim lo long wanem ol i yusim kondom long gutpela rot.

Yupela yet ol lo man na gavman i tok sapos yu laik slip wantaim rarapela man o meri yusim kondom.

Na bilong wanem tru yupela i mekim save long ol gen?

I no yu gavman yu kamapim dispela pamuk pasin. Kondom i stap na pamuk i kamap bikpela.

Sapos polis i no laikim pamuk pasin orait rausim kondom. Ol man save tok

yumi gat banis pinis olsem na nogat wari moa yumi wokim tasol.

Gavman yupela yet bai i mas kisim blut bilong ol dispela ol pamuk lain long wanem yu yet yu putim ol dispela kondom.

Bikpela tingting bilong mi ol dispela polis i mas sanap long kot.

Mi askim Minista bilong Sosel Welfea long lukluk na kotim ol dispela polis.

**WARREN TULE  
KIMBE**

# The Courts Price The Lowest Price Anywhere!

**LOWEST CASH PRICES** ✓


**LOWEST CREDIT PRICES** ✓

**WE CHECK PRICES - DAILY** ✓

**WE'LL BEAT ANY PRICE** ✓

**COURTS WILL NEVER BE**

**BEATEN ON PRICES - EVER** ✓



*You have my word for it!*

**Paul H. Fletcher**  
Managing Director

For more details on the COURTS PRICE GUARANTEE see our friendly staff in all Courts stores nationwide

SWITCH ON TO  
**POWERHOUSE**  
STIMULATE YOUR SENSES

**COURTS**

**First for Furniture**

PAPUA NEW GUINEA'S FAVOURITE FURNITURE & ELECTRICAL SUPERSTORES

COURTS GORDONS	COURTS GOROKA	COURTS LAE	COURTS MADANG	COURTS HAGEN
Ph: 302 5808 • Fx: 325 4149	Ph: 732 2033 • Fx: 732 2063	Ph: 472 4800 • Fx: 472 4621	Ph: 852 3711 • Fx: 852 3612	Ph: 542 1401 • Fx: 524 3517



*Pablik Sekta  
Rifom o senis  
bilong  
strongim wok  
gavanens i  
wok long  
kamap long  
planti level  
na long kain  
kain rot.*

*Yumi olgeta  
inap long  
mekim ol  
ogenaisesin  
bilong yumi  
i wok gut  
moa.*

*Planti samting  
tru i kamap  
pinis long sot-  
pela hap taim,  
tasol i gat  
planti wok yet  
i stap long  
mekim.*

**Dipatmen bilong Praim Minista na Nesenel Eksekutiv Kaunsol  
Pablik Sekta Rifom Menesmen Unit  
Stretjik Plen Long Strongim Pablik Sekta Rifom  
Insait Long Papua Niugini**

**As tingting bilong dispela plen**

A Strategic Plan for Supporting Public Sector Reform in PNG 2003-2004 em i tok klia long wok we i mas kamap long luksave long gutpela wok bilong gavman. Em i wanpela long tripela as tingting we streteji o rot bilong wok bilong strongim bek ekonomi na wok developmen bilong Gavman. Em bai soim rot bilong olgeta hap bilong pablik sekta long kamapim ol wok plen bilong ol yet long kamapim gutpela senis.

Pablik sekta rifom na senis long kamapim bek gutpela wok gavanens i wok long-kamap long planti level na long kain kain rot:

- Ol rifom bilong strongim wok bilong kamapim gutpela gavman na bilip long wok politiks.
- Ol rifom bilong provinsel na lokol level gavman.
- Ol rifom bilong karim edukesen sevis i go long olgeta lain.
- Ol rifom long ol benk na arapela opis i lukautim na bringim wok mani.
- Ol progrem long sekta, ejensi, provinsel na lokol level long kamapim gutpela sevis na wankain taim daunim mani i go long ol.
- Strongim ol bikpela Dipatmen o sentrel ejensi bai ol i wok strong long go pas na sapotim olgeta wok bilong gavman.
- Strongim wok bilong Ombudsman Komisin na Pablik Sevis Komisin, bai ol i ken mekim wok ol i stap long mekim.
- Bikpela senis long wok insait long Fainensel Menesmen Impruvmen Progrem.
- Kamapim senis long wok bisnis bilong Gavman aninit long komeselaisesin na praivetaisesin.

Long dispela taim yet planti long yumi i gat tingting olsem, dispela rifom em ol save man tasol i ken kamapim senis. Dispela tingting i no stret. Olgeta wok manmeri long gavman i ken mekim ol wok i kamap strong long ol ogenaisesin o dipatmen bilong ol. Gutpela rot long mekim yet dispela senis i wok, em long kisim dispela stratejik plen i kam insait long ol plen bilong wan wan dipatmen.

Strateji Plen bilong gavman i lukluk ken long sampela rot o wei em i ken helpim gavman long luksave long ol objectiv o bikpela tingting bilong mekim ol rifom i wok. Wanem rot o we wan wan dipatmen i bihainim bilong lukim olsem sevis i go long ol pipel, bai tokaut yet long ol gutpela wok i kamap pinis.

Ol wok bilong lukluk gen long ol strateji i kamap bihainim bikpela wok i go insait long ol rivi bilong mekim rifom i wok. Ol i lukluk long ol wanem gutpela samting i kamap pinis stat yet long yia 2000, bihainim ol toktok na diskasen wantaim ol stekholda insait na ausait long pablik sekta long wei bilong mekim na lukautim na rot bilong bihainim long bihain taim long go het long ol rifom.

Ol rifom insait long pablik sekta, i no samting bai kamap wanpela taim tasol long yia. Em i wanpela rot em bai i mas i go het, na wan wan dipatmen i mas kisim na raitim bai i go insait long ol plen we bai i gat kaikai long en. Planti wok i kamap pinis insait long dispela sotpela taim. Tasol bikpela wok i stap yet. Dispela plen i kamapim 2003 i go long 2007, tasol bai ol i lukluk long en long wan wan yia, sapos i gat sampela senis ol i laik raitim o kamapim.

Emi bilong lukim olsem olgeta bikpela as tingting na ol wok bilong ronim dispela rifom i stap-wankain long ol senis yumi lukim nau yet bai ol wok i ron bihainim tasol.

**Ridim namba 2 hap toktok bilong Streteji Plen long  
namba 22 de long mun Epril, 2004**





**PUBLIC SECTOR  
REFORM ENA  
GAUKARA BE  
GABU MOMO  
BONA DALA IDAU  
IDAU DEKEDIAI IA  
GAUKARA NOHO.**

**PUBLIC SER-  
VANT GAUKARA  
TAUDIA IBOUNAI  
ESE EDIA  
GAUKARA KARA-  
IA DALANA IDIA  
HANAMOA DIBA**

**INAI NEGA SISI-  
NA LALONAI  
GAUKARA  
BADADIA MOMO  
IDIA KARAIA  
VADAINI TO  
GAUKARA  
BADAHEREA IA  
DO NOHO**

## **Praim Minista ena Dipatmen bona Nesinel Eksekutiv Kaunsol Pablik Sekta Rifom Menesmen Unit Lagani 2003 ia lao 2007 Pablik Sekta Rifom durua ena Palani**

### **\* Strategic Palani ena Gaukara Badana:**

Lagani 2003 ia lao bona 2007 edia huanai Public Sector Reform ena senisi abia mai gaukara durua henia palani ena gaukara badana ta be Gavamani ena gaukara karaia namo namo daladia do ia hedinarai vadaia Gavamani ese ena gaukara ia hatubua lou bona tubudaekau gaukara idia havara-ia diba.

Inai palani ese Gavamani ena gaukara oreadia ia durua diba vadaia inai oreadia ese sibona edia gaukara karaia palani do idia haginia Reform o senisi gaukara karaia namo namo totona.

Public Sector reform ena gaukara be gabu momo bona dala idau idau dekediai ia gaukara noho. Inai gaukara daladia haida be;

- Senisi abia mai Politics gaukara lalonai bona Politics orea idau idau haboua tamona.
- Senisi abia mai Provincial bona Local Level Gavamani edia gaukara lalonai.
- Senisi abia mai Education ena gaukara lalonai.
- Senisi abia mai Banika bona Moni gaukaralaia oreadia dekenai.
- Gavamani gaukara oreadia, Province bona Local Level oreadia edia gaukara karaia daladia hanamoa vadaia moni idia halusia kava lasi.
- Gavamani ena gaukara gunalaia orea badadia o Central Agencies edia gaukara dekenai goada henia vadaia Gavamani ena gaukara ibounai idia gunalaia bona durua namo namo.
- Gavamani ena gaukara naria oreadia hegeregere Ombudsman Commission bona Public Service Commission edia gaukara hanamoa.
- Moni gaukaralaia namo namo dalana o Financial Management Improvement Program ia hatubua namo namo.
- Gavamani ena moni karaia oreadia edia Bisinesi gaukara idia hanamoa.

Taunimanima momo idia laloa Public sector ena senisi abia mai gaukara o Reform be diba momo taudia edia gaukara. To inai lohada be ia maoro lasi badina Public servant gaukara taudia ibounai ese edia gaukara karaia dalana idia hanamoa diba.

Inai Reform o senisi abia mai gaukara aheaua namo namo dalana ta be Gavamani oreadia edia gaukara palani ibounai lalonai Reform ena palani danu idia atoa vareai.

Inai palani gaukaralaia daladia ese Gavamani do ia durua henia diba bona Public Sector Reform ena henunai Gavamani ese ia laloa karaia gaudia do ia karaia diba. Inai palani henunai Gavamani oreadia ese gaukara idia karaia dalana bona taunimanima dekediai Gavamani ena durua ia abia mai dalana amo Reform gaukara ena kwalimu toana do ia hedinarai.


Lagani 2000 amo ia mai bona hari nega, senisi abia mai gaukara palani be Gavamani ena orea bona Gavamani muri muri kahana amo mai oreadia ese idia itaia lou bona herevalaia noho. Inai hereva lalonai be gaukara aheaua dalana bona vaira nega lalonai edena bamona gaukara hanamoa daladia idia herevalaia danu

Public Sector Reform o senisi abia mai gaukara be hari nega sibona ena gaukara lasi. Inai senisi abia mai palani ena gaukara be do ia heau noho diba ia lao bona Gavamani ena gaukara oreadia ibounai ese inai palani tamona idia gaukaralaia hebou. Inai nega sisina lalonai gaukara badadia momo idia karaia vadaia to gaukara badaherea ia do noho.

Inai gaukara palani be lagani 2003 ia lao 2007 totona idia makaia to lagani ta ta lalonai gaukara dalana do idia itaia lou bona hatubua goada diba.

**Ialoaboio lasi Stretjik ena Plen ena siri ta be Thursday 22  
April lalonai do ia rakalasi lou.**






Rijinol memba bilong Sauten Hailans, Hon.  
Hami Yawari, MP na Sauten Hailans  
provinsel gavman i laik tok

## *Hepi Ista*

Hon. pinel bilong Sauten Hailans provins na pinel bilong  
Papua Niugini.  
A... gu... sta Wiken bilong yu na blesing bilong bik-  
men i stap wantaim yumi olgeta.



*Welkam long olgeta manmeri!*  
**Namba wan Sauten Hailans Kalsarel So**

Gavana bilong Sauten Hailans Hon. Hami Yawari na Sauten Hailans So Komiti na ol pinel bilong Sauten Hailans Provins i tok welkam long yupela olgeta long namba wan Sauten Hailans Kalsarel So 2004.

**Ples: SUMIA JANKSEN SO GRAUN, MENDI, S.H.P.**

**Det: NAMBA 9 I GO INAP LONG 11 DE BILONG MUN EPRIL, 2004**

Kam na amamasim ol stail kalsa bilong dispela naispela provins. Bai i gat planti samting bilong lukim na mekim. Bai yu i gat sans tu long lukluk na toktok wantaim ol Huli Wigmen husat i gat nem long wol pinis.

**I GAT PLANTI SAMTING BILONG MEKIM LONG DISPELA TRIPELA DEL OLSEM.**

Ol singsing tumbuna; Tumbuna pasin bilong mekim paia; Resis bilong katim diwai; Sita long binara resis; Kalapim gris diwai; Ronim gris pik; Tag ov woa o pulim rop resis; Ol laip ben; na namba wan resis bilong Miss Traditional Southern Highlands 2004.



Gutpela sindaun bilong PNG long taim bihain i stap long han bilong yumi

Dia ol Papua Niugini wantok bilong mi,

Planti long yupela i ritim pinis long niuspepa long sampela wik i go pinis toktok bilong Minista bilong Fores na Fores Industris Asosiesen (FIA) long wok bilong Greenpeace insait long Papua Niugini. Nau yupela i mas save long sampela samting.

Greenpeace i stap insait long PNG long autim toktok long envaromen i wok long bagarap na long toksave long ol lain i kisim bagarap olsem i gat arapela rot bilong bihainim long stretim hevi bilong ol. Ol manmeri bilong Papua Niugini i no inap long sindaun tasol na lukim ol diwai bilong ol i bagarap.

Ol industriel loging operesin na wok pasin nau i stap long ol Independen riviu bihain long ol papagraun na ol non-gavman oge-naisesin i autim sampela hevi bilong ol. Ol wok painimaut bilong Riviu long ol Loging Projek i stap Nau (2003/2004) em i tok klia long wok fores menesmen insait long Papua Niugini, we PNG gavman i no tok klia long pablik yet.

Riviu Tim, we ol sinia Papua Niugini manmeri i tok klia long tingting bilong Greenpeace olsem i gat planti wok pasin i no bihainim PNG Logging Code of Practice (LCOP). Ol i toktok gen long as tingting bilong 2003 Riviu ov Disputed Allocations olsem ol timba pemit bilong sevenpela loging kampani i ekspia pinis o ol i no bihainim lo na kisim. Ol arapela kaikai bilong ol wok riviu i soim olsem ol loging kampani i no bihainim lo bilong lukautim ol wok manmeri na i soim olsem i gat ol wokas bilong ol arapela kantri i holim wok bilong ol Papua Niugini manmeri. Ol dispela ripot i strongim toktok olsem Gavman i no menesim gut dispela sekta olsem na em i wok long larim ol loging kampani long katim ol diwai bilong PNG na ol i no tingim envaromen na bihain taim bilong ol pikinini bilong Papua Niugini.

Greenpeace i gat nem long planti kantri long wol olsem ol lain bilong sanap strong agensim ol samting i save bagarapim envaromen. Mipela i save kisim mani i kam long wan wan manmeri olsem na mipela i no stap aninit long wanpela gavman o bikpela kampani. Long hap mipela i sanap long en, mipela inap long agensim ol lain husat i save bagarapim envaromen na sindaun bilong ol pipel.

Greenpeace i nogat hait pasin. Wanpela wok tasol em long ol pipel bilong PNG, fiutsa o taim bihain bilong ol PNG pikinini na envaromen we bai i lukautim ol long taim bihain olsem i lukautim ol tumbuna bilong yumi long taim bipo. Dispela wok i stap aninit long Namba 4 Nesenol Gol. Greenpeace i laik lukim ol fores onas na Papua Niugini olsem wanpela nesen i kisim inap kaikai o benefit long diwai bilong ol na i luksave olsem ol lo i lukautim envaromen i stap strong bilong longpela taim. Nau yet, ol ovasis kampani na sampela biknem manmeri long Pot Mosbi siti i wok long kisim kaikai long industriel loging taim ol papa graun na envaromen i wok long kisim bagarap.

Long sampela yia i go pinis, Greenpeace i bung wantaim ol papa graun long singaut long Papua Niugini gavman long klinim fores sekta long hevi bilong ol konsesen olsem Kiunga Aiambak na Wawoi Guavi we nau ol papa graun i wok long pait hat long kot long stopim loging long graun bilong ol. Tupela Praim Minista na Sief Sekreteri i strongim toktok olsem Kiunga Aiambak projek i no bihainim lo tasol Fores Minista i stap nau i wok long agensim ol dispela toktok (tasol em i bin tok pinis olsem em i no wanbel olsem ol diwai insait long PNG i wok long sot [PC.26 Mas]). Mipela i gat bikpela wari long ol ruel komyuniti bikos bikpela wok loging long ol diwai bilong ol bai i no inap long sevim ol. Loging bai i no inap long pulim rausim Papua Niugini Gavman long hevi bilong em long sait bilong mani; em i save mekim 4 pesen tasol long GDP.

Long wok bilong salim ol samting ol i mekim long diwai bilong PNG long ol intanesinol maket, envaromen na sosol nem em i bikpela samting. Olgeta forestry i mas bihainim Forest Stewardship Council

(FSC) we em i wanpela setifikesen sistem long wol. Tok piksa em olsem, wok bilong Rimbunan Hijau long Nu Silan i stap aninit long lukaut bilong FSC, olsem wanem na em i no inap long mekim wan kain samting long PNG? Sapos mipela i no strongim ol standad o wok mak bilong lukautim envaromen, ekspot timba bilong PNG bai i bagarap sapos ol kastoma i les long baim ol 'undesirable' prodak.

Greenpeas i no agensim daunstrim prosesing o pasin bilong kisim ol netserel risoses bilong helpim ol pipel. Mipela i bilip olsem fiutsa o taim bihain bilong forestri sekta insait long Papua Niugini i no bilong ol bikpela wok loging we i no bihainim lo na i bagarapim diwai bilong salim go ovasis, nogat. Em i stap wantaim ol liklik na midium skel operesin we i save karim bikpela kaikai tru bilong ol papa graun na i lukautim bek fores ikosistem bilong ol lain long bihain taim.

Greenpeace i luksave olsem i mas i gat gavman na forestri sekta we i save wok bung wantaim komyuniti. Komyuniti developmen i save stat long insait, wantaim lokol oge-naisesin, plening na kontrol long kamapim self-rilains na enteprais developmen.

Greenpeace i save wok long:

Promotim sastenabol menesmen long ol netserel risoses bai i gat liklik hevi long envaromen na i no kilim planti samting bilong bus, wara na graun bai i ken i stap bilong ol lain long taim bihain.

Strongim pipel long developim ol risos bilong ol yet long rot we i lusim sampela bilong bihain taim, rausim ol wok pasin i stap tudè na holim bek ol kaikai na win mani bilong ol yet bai tru tru pesenol na ruel developmen inap long kamap.

Helpim ol pipel long painim ol arapela rot bilong katim diwai.

Greenpeace i wok long sapotim komyuniti eko-timba prodaksen na ekspot i go long Nu Silan na Australia, na wanpela nesenel komyuniti fores menesmen na setifikesen sapot-progrem (FORCERT). Mipela i bilip olsem ol dispela rot em ol rot bilong go het long larim ol kaikai na mani i stap long han bilong ol ruel komyuniti.

Nau tasol Praim Minista i tokaut long ol plen long givim samting olsem 32 nupela loging konsesen. Ol dispela diwai em bilong ol komyuniti long ples na ol risos onas. Gavman i soim pinis olsem liklik mani tasol long nupela mani i kamap bai i go bek long ol papa graun.

Tasol wanpela senis long sastenabol fores menesmen na lukaut bilong baiodaivesiti i mas i gat sapot bilong Intanesinol Komyuniti. Olsem na Greenpeace i bin pait strong wantaim ol noten gavman long wanpela Konvensen long Baiololjikel Daivesiti long putim US\$25 milien long wan wan yia long helpim ol nupela ekonomi long lukautim na banisim ol diwai na solwara bilong ol.

Las tru, Industri i trajm long kamapim dispela lukluk olsem planti NGO insait long PNG i wok wantaim Greenpeace. Dispela em i giaman toktok. I gat planti NGO insait long PNG husat i wok long wok hat long sevim ol fores o diwai. Wan wan long ol dispela NGO i independen na i gat misen na mendet o konstityusen bilong em.

Wanpela strongpela na gutpela fiutsa o taim bihain bilong Papua Niugini i stap insait long han bilong ol manmeri bilong Papua Niugini na nau em i taim bilong kisim bek kontrol long ol netserel risoses na bihain taim bilong mipela. Mipela i sinauf long gavman long bung wantaim mipela long kamapim wanpela sastenabol na gutpela fores sekta we i karim kaikai bilong ol tru tru Papua Niugini manmeri na i no ol ovasis kampani na sampela biknem PNG manmeri tasol.

Tenkyu Tru,

Dorothy Tekwie Greenpeace Forests Kempena

CATHOLIC RADIO schedule

Table with 3 columns: Time, Station Name, Program Name. It lists various Catholic radio programs and their broadcast times across different stations like ANGLUS, WATCAN ENGLISH PROGRAM, etc.

# Singsing Kuasisi bai kukim lewa

Joe Ivaharia i raitim

OL LAIN husat i save idai kirap long musik bilong PNG mas was gut long wanpela nupela musik meri bilong hap Hagen na Simbu husat i wok long rekot i stap wantaim CHM.

Bungim Dorothy Siune husat i gat 19 krismas. Em i bin pilai musik

long tripela yia pinis olsem wanpela solo atis na nau i kamap long Mosbi na rekot i stap. Taim *Wantok Niuspepa* i toktok wantaim em em i tok olsem em i no save pilai wantaim wanpela ben tasol long nek bilong em na wanpela wokman bilong CHM John Toea i harim na askim em long kam na rekot wantaim studio.

Dorothy i tok olsem em i bin hat tru long

rekot tasol mi mas tok tenkyu long JT long kisim mi kam na rekot.

Dorothy i tokim *Wantok* olsem nau dispela singsing "Kuasisi" we i bin rekot insait long wanpela

nupela albam "PNG Nupela Hits" bai kukim stret lewa bilong ol musik man meri. Toktok bilong em tu i kisim sapot bilong JT.

Em i tok olsem mining bilong singsing ya i

olsem pisin i palai antap na singsing long painim lewa bilong em i stap.


Meri Hagen miks Simbu i tok em i fes taim bilong em long singsing na rekot tasol long bihain taim em i tingting long mekim wanpela kaset albam we em bai rekotim wantaim CHM John i tokim *Wantok* olsem em i bin harim nek bilong meri na taim em i wok long salim buai i stap mi askim mama

bilong em Mama Las wantaim ol anti Paula na Anna i nap mi kisim Dorothy long rekotim wanpela singsing. Taim ol i givim tok klia mi kisim em na rekotim dispela singsing "Kuasisi".

Dispela kaset albam "PNG Nupela Hits" em i wanpela sariti albam we mi laik askim ol pipel long baim na sapotim wok sariti o helpim ol lain trangu insait long kantri JT i tok.

# Katolik pater stori long song em i raitim - 'Stap Laip long

James Kila i raitim



• Pater Joachim, Katolik pater husat i raitim dispela singsing na husat i bin singim long makim bung bilong ol Katolik rilijes. Ol foto: JAMES KILA

ol misa na ol bikpela bung bilong sios.

Dispela song tu i save kamap planti taim long ol EMTV program bilong Rilijes Televisen Asosesin (RTA) insait long program ol i kolim Signs of the Times. RTA em wanpela pater Fr Mlak i save go pas long en.

Ol ves bilong dispela naispela song em:

*Yumi Sios em pipel blong God  
Stap laip long Krai i Rot, Tok Tru na i Laip,*

*Yumi Sios i bodi blong Krai i stap Laip wantaim em i Rot, Tok Tru na i Laip*

*Yumi bihainim rot bilong Jisas  
Olsem brata na susa bilong*

em  
*Krais em i rot bilong yumi i bringim yumi long God.*

Pater Joachim Rego i bin stap olsem wanpela memba bilong komiti long dispela taim bilong redim dispela jenerol asembli we i bin kamap long Fatima taim em i bin raitim dispela song.

Pater Joachim i tokim *Wantok Niuspepa* olsem em i bin raitim dispela song long 2002 taim ol i wok long redim ol samting na program bilong dispela jenerol asembli.

"Em i bin kisim samting olsem 3-pela wik olgeta long traim stretim dispela song na putim wantaim musik. Mi bin kisim het-tok bilong jenerol asembli na bungim wantaim ol tok i stap insait long Baibel na putim wantaim musik long

kamap wantaim dispela song.

"Long fes taim em i bin hat liklik tasol mi bin beten na askim Papa God long givim mi gutpela tingting long kamap wantaim dispela song em ol Kristen manmeri bai amamas long en."

Pater Joachim em wanpela pater husat i stap wantaim rilijes oda bilong Pesionet, dispela oda i gat prea haus bilong ol i stap long Wewak long Is Sepik provins.

Pater Joachim em bilong kantri Burma long Saut Is Esia, tasol em wantaim famili bilong em nau i stap long Australia na i kamap olsem sitisen bilong Australia. Em i stap wok long PNG klostu 18-yia nau.

Las wik tasol Pater Joachim i bin lusim kantri na go long Australia long kisim liklik malolo bilong em.



• Apostolate Nuncio bilong Katolik sios i stap long Roma, Adolfo Tito Yilana i bin go pas long lotu bilong bung bilong ol rilijes long Goroka we ol i bin singim singsing Pater Joachim i raitim. Foto: William Natara

MOA long 1000 Kristen manmeri bilong Katolik Sios long Goroka i bin lukim pes na harim wanpela pater i singim dispela bikpela song "Stap Laip Long Krai" insait long bikpela misa bilong ol rilijes bilong PNG na Solomon Alfan.

Dispela song em het-tok bilong bikpela selebresin bilong Katolik Jenerol Asembli we i bin kamap long Fatima long Westen Hailans long yia 2002. Dispela pater we i singim song em Pater Joachim Rego, na em yet i bin raitim dispela song.

Stap Laip Long Krai em wanpela naispela singsing nau i kamap strong tru insait long ol Katolik haus lotu insait long kantri. Planti ol Kristen manmeri i save singim song ya long

## Sande Nait Muvi: King Of Kings

Dispela Sande em i Ista Sande. Sande nait muvi long EMTV long 8.30 long nait em 'King Of Kings'. Yu ritim stori bilong wanpela piksa biknem ekta Mel Gibson i mekim long stori long dai bilong Jisas Krai. King Of Kings em wanpela piksa ol i mekim bipo we i soim laip bilong Jisas.



## NATIONAL WEEKLY HIT PARADE

Twisties i sponsa  
Sarare, Epril 10, 2004

Singsing	Musik Atis	Las Wik	Dispela Wik
Bulmo Road	Camp 7	1	1
Kalivurur	Patti Potts Doi	7	2
704 (a lokdok NCR)	Jnr Insects	3	3
Nasa	D2 Band	4	4
Papua New Guinea	Hollie Maea	12	5
Upengi	Wembis Of Lae	8	6
Sunshine	O-Shen	13	7
K-Town	Jnr Insects	19	8
Hanua Maurina	Q-Shen	2	9
Raitman	Niu Age Band	5	10
Muimui	Zong Hits	18	11
Nellien	Uralom Kania/Moses Tau 0		12
Mr Boombastic	Slim Buda	0	13
Tsomi Alla	Niu Age Band	6	14
Kange Kantri	Eskimo Band	15	15
Hagen Meri	Spectators	16	16
Gutsomi	Niu Age Band	10	17
Pita Pidik	Jnr Insects	14	18
Kela Musmus	Sagothorns	0	19
Bul Tairos	Patti Potts Doi	9	20

## EMTV GAID

### Fonde 08/04/04

- 5.30 JOYCE MEYER MINISTRY
- 6.00 TODAY SHOW
- 9.00 CREFFLO DOLLAR
- 9.30 DR PHIL
- 2.30 HERE'S HUMPHREY
- 3.00 HI-5
- 3.30 JUSTICE LEAGUE
- 4.00 SNOBS
- 4.30 PICK YOUR FACE
- 4.57 EMTV TOKSAVE
- 5.00 FRESH PRINCE OF BEL AIR
- 5.29 NEWS BREAK
- 5.30 THE PRICE IS RIGHT
- 6.00 EMTV NEWS
- 6.30 A CURRENT AFFAIR
- 6.57 TOK PISIN NEWS UPDATE
- 6.59 LOTTO DRAW
- 7.00 CHM SUPERSOUND
- 7.57 EMTV TOKSAVE
- 8.00 SPORT SCENE
- 9.30 THE FOOTY SHOW
- 11.00 AFL FOOTY SHOW  
Brisbane v Collingwood
- 1.30 NIGHTLINE
- 2.00 EMTV NEWS REPLAY
- 2.30 EMTV CLASSIFIEDS

KING OF KINGS A classic story on the life of Jesus Christ. Stars: Jeffrey Hunter, Siobhan McKenna, hurd Hatfield, Ron Randell.

- 10.27 EMTV TOKSAVE
- 10.30 NEWS REPLAY
- 11.00 IN TOUCH
- 11.00 IT IS WRITTEN
- 12.00 PRAISE
- 1.00 EMTV CLASSIFIEDS

### Mande 12/04/04

- 4.30 2004 US MASTERS GOLF
- 9.00 MALOLO CLUB
- 11.00 CREFFLO DOLLAR
- 11.30 JOYCE MEYER: ENJOYING EVERYDAY LIFE
- 12.00 DR PHIL
- 1.00 MOVIE: EASTER PARADE
- 3.00 HI-5
- 3.30 COURAGE THE COWARDLY DOG
- 4.00 SNOBS
- 4.30 PICK YOUR FACE
- 4.57 EMTV TOKSAVE
- 5.00 FRESH PRINCE OF BEL AIR
- 5.29 NEWS BREAK
- 5.30 THE PRICE IS RIGHT
- 6.00 NATIONAL EMTV NEWS
- 6.30 A CURRENT AFFAIR
- 6.58 TOK PISIN NEWS UPDATE
- 6.59 LOTTO DRAW
- 7.00 PRAISE
- 8.00 INSAIT PNG
- 8.30 WHO WANTS TO BE A MILLIONAIRE
- 9.27 EMTV TOKSAVE
- 9.30 JAG
- 10.30 CHM SUPERSOUND
- 11.30 EMTV NEWS REPLAY
- 12.00 NIGHTLINE
- 12.30 EMTV CLASSIFIEDS

### Fraide 09/04/04

- 5.30 JOYCE MEYER MINISTRY
- 6.00 2004 US MASTERS GOLF
- 9.00 CREFFLO DOLLAR
- 9.30 DR PHIL
- 10.30 EASTER SPECIAL: THE PUZZLE CLUB EASTER ADVENTURE
- 11.30 MOVIE: OVO VADIS
- 1.30 EASTER SPECIAL PROGRAM
- 3.00 SPECIAL: EASTER IN BUNNY LAND
- 4.00 SNOBS
- 4.30 PICK YOUR FACE
- 4.57 EMTV TOKSAVE
- 5.00 FRESH PRINCE OF BEL AIR
- 5.29 NEWS BREAK
- 5.30 THE PRICE IS RIGHT
- 6.00 NATIONAL EMTV NEWS
- 6.30 A CURRENT AFFAIR
- 6.58 NEWS UPDATE
- 6.59 LOTTO DRAW
- 7.00 TOK PIKSA
- 7.30 RENOVATION RESCUE
- 8.27 RABAUL GAME FISHING
- 8.30 FRIDAY NIGHT FOOTBALL  
Sydney Roosters v Brisbane Broncos
- 10.57 EMTV TOKSAVE
- 11.00 FRIDAY NIGHT MOVIE: MAJOR LEAGUE: BACK TO THE MINORS
- 1.00 EMTV NEWS REPLAY
- 1.30 NIGHTLINE
- 2.00 EMTV CLASSIFIEDS

### Tunde 13/04/04

- 5.30 JOYCE MEYER MINISTRY
- 6.00 TODAY SHOW
- 9.00 MALOLO CLUB
- 11.00 CREFFLO DOLLAR
- 11.30 DR PHIL
- 2.30 HERE'S HUMPHREY
- 3.00 HI-5
- 3.30 COURAGE THE COWARDLY DOG
- 4.00 SNOBS
- 4.30 PICK YOUR FACE
- 4.57 EMTV TOKSAVE
- 5.00 FRESH PRINCE OF BEL AIR
- 5.29 NEWS BREAK
- 5.30 THE PRICE IS RIGHT
- 6.00 NATIONAL EMTV NEWS
- 6.30 A CURRENT AFFAIR
- 6.57 TOK PISIN NEWS UPDATE
- 6.59 LOTTO DRAW
- 7.00 HAUS & HOME
- 8.00 REPORT
- 8.27 EMTV TOKSAVE
- 8.30 SURVIVOR: All Stars
- 9.30 STINGERS
- 10.27 EMTV TOKSAVE
- 10.30 THIRD WATCH
- 11.30 EMTV NEWS REPLAY
- 12.00 NIGHTLINE
- 12.30 EMTV CLASSIFIEDS

### Sarare 10/03/04

- 6.00 2004 US MASTERS GOLF
- 8.00 PLANET FANTA
- 9.30 2004 US MASTERS GOLF
- 10.00 SO FRESH
- 11.30 SURFSPORT
- 12.30 WAVE RIDER
- 1.00 18 FOOT SKIFF
- 1.30 SOME CALL IT SPORT
- 2.00 SATURDAY AFTERNOON MOVIE: WHAT'S UP DOC?
- 4.00 THE CAR SHOW
- 4.30 THE BOAT SHOW
- 5.00 ESCAPE WITH ET
- 5.30 THE BIG FISH Mahi Mahi off Savu Savu in Fiji
- 6.00 NATIONAL EMTV NEWS
- 6.30 AUSTRALIA FUNNIEST HOME VIDEO SHOW
- 7.30 POSTCARDS
- 7.58 RABAUL GAME FISHING
- 8.00 SOUTH PACIFIC MUSIC
- 8.57 EMTV TOKSAVE
- 9.00 XENA: WARRIOR PRINCESS
- 10.00 HERCULES
- 11.00 AFL Essendon v West Coast
- 2.00 NEWS REPLAY
- 2.30 EMTV CLASSIFIED

### Trinde 14/04/04

- 5.30 JOYCE MEYER MINISTRY
- 6.00 TODAY SHOW
- 9.00 MALOLO CLUB
- 11.00 CREFFLO DOLLAR
- 11.30 DR PHIL
- 2.30 HERE'S HUMPHREY
- 3.00 HI-5
- 3.30 ED EDD N EDDY
- 4.00 SNOBS
- 4.30 PICK YOUR FACE
- 4.57 EMTV TOKSAVE
- 5.00 FRESH PRINCE OF BEL AIR
- 5.29 NEWS BREAK
- 5.30 THE PRICE IS RIGHT
- 6.00 NATIONAL EMTV NEWS
- 6.30 A CURRENT AFFAIR
- 6.58 TOK PISIN NEWS UPDATE
- 7.59 LOTTO DRAW
- 7.00 BACKYARD BLITZ
- 7.30 MCLEOD'S DAUGHTERS
- 8.27 EMTV TOKSAVE
- 8.30 WEDNESDAY NIGHT MOVIE: MR ACCIDENT Comedy - A very clumsy man and his UFO - obsessed girl friend discover a plan made by his boss to market eggs laced with nicotine.
- 10.30 SOUTH PACIFIC MUSIC
- 11.30 EMTV NEWS REPLAY
- 12.00 NIGHTLINE
- 12.30 EMTV CLASSIFIEDS

### Sande 11/04/04

- 4.30 2004 US MASTERS GOLF
- 9.00 SUNDAY
- 11.00 SIGNS OF THE TIMES
- 12.00 NRL FOOTY SHOW
- 1.00 SUNDAY AFTERNOON AFL
- 4.00 SUNDAY FOOTBALL  
Melbourne Storms v Penrith Panthers
- 6.00 NATIONAL EMTV NEWS
- 6.30 SEVENTH HEAVEN
- 7.30 SIXTY MINUTES
- 8.27 RABAUL GAME FISHING
- 8.30 CHIT CHAT
- 8.35 SUNDAY NIGHT MOVIE:



## MINISTRY OF TRADE AND INDUSTRY

# WELKAM TOKTOK I GO LONG OL PASIFIK ACP TRED MINISTA NA OL OPISEL

Mi amamas long tokaut long makim Papua Niugini olsem hap bilong holim dispela Pasifik ACP Tred Minista na Opisel miting long 5 - 7 Epil 2004 na Forum Tred Minista na Opisel long Epil 2004 long Holiday Inn, Pot Mosbi.

Ol Tred Minista na Opisel bilong 13 Pasifik Ailan kantri (Papua Niugini wantaim na opisel bilong Pasifik Ailan Forum Sekreteret bai kam long dispela bikpela bung.

Dispela miting bai lukluk long kamapim rodmeap bilong Pasifik rijon taim Afrika, Karibien na Pasifik (ACP) grup i bung wantaim Yuropien Yunion (EU) long Madang insait long dispela yia long lukluk insait long ol toktok nau i stap pinis namel long tupela Ekonomik Patnasip Agrimen aninit long Cotonou Agrimen.

Long makim Gavman, Ministri bilong Tred na Indastri na ol pipel bilong Papua Niugini, mi amamas long welkamim ol dispela Minista, ol deligesen bilong ol, ol wokman bilong

Pasifik Ailan Forum 7. Sekreteriet na ol arapela bik-lain husat tu bai i stap insait long dispela miting.

1. **Hon. Sebastian Anefal** - Secretary for Foreign Affairs, Federated State of Micronesia,

2. **Hon. Otoichi Besebes** - Minister for Commerce & Trade, Palau,

3. **Hon. John Silk** - Minister of Resources and Development, Republic of Marshall Islands,

4. **Hon. Trevor Olavae** - Minister for Commerce, Industries & Employment, Solomon Islands,

5. **Hon. Dr Masasso Paunga** - Minister Labour, Commerce & Industries Tonga,

6. **Rt Hon Bikenibeu Paeniu** - Minister for Finance, Economic Planning & Industries, Tuvalu,

7. **Hon Willie Jimmy** Tapanga Rarua - Minister for Trade Development, Vanuatu,

8. **Hon Hans Joachim Keil** - Minister for Commerce, Industry & Labour, Samoa,

9. **Hon John Tiakia** - Associate member for Trade, Niue,

10. **Hon Teremoana Taio** - Minister for Finance, Cook Islands,

11. **Hon Kaliopate Tavola** - Minister for Foreign Affairs & External Trade, Fiji,

12. **Hon Ioteba Redfern** - Minister for Commerce, Industry & Cooperatives, Kiribati.

Mi save olsem long dispela miting bai yu inap kisim gut ol samting na tu yu inap amamas long sotpela taim bilong yu wantaim mipela.

## Hap Hap Nius

### Ol vanila fama long Buka i kros

OL VANILA fama long Buka i belhat long raskol pasin bilong stilim ol vanila bin.

Dispela nogut pasin i wok long kamap long planti hap long Buka we ol yut i wok long stilim ol bin long putim i go insait long hombru ol i save mekim long spak.

Wanpela mausman bilong ol fama, Nicholas Katun, nau i wok long askim gavman long kamapim wanpela lons projek o projek we ol i ken kisim dinau mani, we ol fama i ken kisim helpim long baim ol timba o kain samting olsem long mekim ol banis raunim ol fam bilong ol.

"Pasin bilong stilim vanila i kamap wanpela bikpela hevi nau, moa yet long hap bilong Buka," Mista Katun i tok.

### Kopi kamap bikpela long Gazelle

OL KOPI fama long distrik bilong Gazelle long Is Nu Briten provins i wok long bihainim stret ekspot driven ikononik rikaveri polisi bilong nesene gavman.

Dispela polisi i lukluk long salim ol kes krop olsem kopi, kakao o vanila i go long ol narapela kantri long kisim mani long helpim ikononim bilong Papua Niugini.

Long nau yet wanpela kopi aweanes kempen i wok long kamap long Gazelle na Memba bilong Gazelle na Minista bilong Nesene Plening na Monitaring, Sinai Brown, i wok long givim gutpela sapat long dispela projek na i givim pinis K62,000 i go long helpim kempen.

Mista Brown i bin givim dispela mani long Interim Aweanes Komiti bilong Kopi Promosen bilong Is

# Australia na Nu Silan save mekim hait pasin

OL GAVMAN bilong ol kantri insait long Pasifik i mas lusim ol hait pasin bilong ol na stat long tokim ol pipel stret long ol treid na politikel agrimen o wanbel ol i bin kamapim wantaim ol arapela kantri.

Pasifik Netwok bilong Globalaisesen (PANG) i bin mekim dispela toktok long Mande taim ol i bin lonsim wanpela ripot wanpela save-meri i bin mekim long Pasifik Agrimen bilong Klosa Ikononik Rilesens (PACER).

Dispela agrimen o tok wanbel i lukluk long strongim ol treid rilesens o wok bilong treid namel long ol Pasifik Ailan kantri.

Olsem wanpela non gavman ogenaisesen (NGO), PANG i save mekim wok long olgeta hap bilong rijen na i save stadim na sekim ol agrimen o toktok i go kam long ol Pasifik gavman na Pasifik Forum i save mekim na lukim sapos em bai gutpela o nogut bilong ol pipel long nau, na bihain taim tu, i no wanbel long dispela agrimen.

Wanpela mauseri bilong PANG husat i bin kam long

...Yusim pawa bilong ol long kamapim PACER agrimen

hetkota bilong ol long Fiji, Claire Slatter, i bin stap long Pot Mosbi long dispela wik long givim ripot bilong dispela save-meri, Profesa Jane Kelsey, long ol Pasifik treid opisal husat i bin stap long kepitel bilong kantri bilong bung bilong ol.

Ripot i tok olsem ol gavman bilong Australia na Nu Silan i bin mekim ol giaman toktok na strongim sait bilong ol long kamapim dispela PACER agrimen.

Ripot i tok ol Pasifik Ailan kantri i no bin laik sainim dispela agrimen tasol i bin go het na sainim long wanem ol i no bin klia gut long ol hait pasin Australia na Nu Silan i wok long mekim long mekim ol i tok orait.

Dispela agrimen Australia na Nu Silan i bin kamapim wantaim ol Pasifik Ailan kantri i karamapim na daunim agrimen bilong ol Pasifik Ailan kantri yet ol i kolim PICTA o Pasifik Ailan Kantris Treid Agrimen, ripot i tok.

PICTA i bin wanpela gutpela agrimen namel long ol Pasifik Ailan kantri we bai kamapim ol gutpela treid rilesen tasol PACER nau bai lukim planti ol

*Ripot i tok olsem ol lida bilong ol Pasifik Ailan kantri i no bin laik sainim dispela agrimen, tasol i bin go het na sainim long wanem ol i no bin klia gut long ol hait pasin Australia na Nu Silan i wok long mekim long kisim tok orait bilong ol.*

treid agrimen bilong ol Pasifik Ailan kantri i mas i go long Australia na Nu Silan tu na dispela i no gutpela, ripot i tok.

Profesa Jane Kelsey, save-meri husat i bin raitim dispela ripot, em yet i bilong Nu Silan,

na gavman bilong em i no inap amamas long em long ol tok-tok em i mekim, tasol dispela em i tru, Mis Slatter i tok.

Mis Slatter i tok olsem em i kam long Pot Mosbi long givim dispela ripot long ol Pasifik treid opisal long bung bilong ol we ol i ken sindaun na skelim.

"Ripot bai i ken helpim ol long save long wanem mak ol i laik sanap long en taim ol i bung gen wantaim ol opisal bilong Australia na Nu Silan long toktok long dispela agrimen," Ms Slatter i tok.

Em i tok dispela ripot bilong Profesa Kelsey i gutpela long wanem em i tokaut long ol we long kamaut long dispela ol treid banis Australia na Nu Silan i bin putim long ol kantri na i no tokaut long ol hevi bilong dispela agrimen tasol.

Long PNG, PANG i wok long wok bung wantaim Senta bilong Environmenta Lo na Komyuniti Raitis (CELCOR) long tokaut long ol lida na ol pipel bilong kantri long dispela agrimen na hevi bilong em.



Ol wok manmeri i kisim skul long wok wantaim sampela masin long woksop bilong Lihir Gold long Kavieng, Nu Ailan provins.

Foto: RIO TINTO 2003 ANNUAL REVIEW.

## Mani mas go long ol ruel hap

PAPUA Niugini Kakao Groas Savings na lons Sosaiti i gat nupela menesmen nau bihain long em i bin stap aninit long wanpela administreta inap long 12-pela mun. Dispela nupela menesmen i tok promis pinis long kamapim ol gutpela senis we bai helpim ol groa.

Long stat bilong las wik long wanpela liklik bung, nupela menesa, Pearson Long, i tok promis long givim ol fainensel sevis i go long ol memba husat i stap long ol ruel hap bilong kantri.

Mista Long i tok olsem ol bai kamapim wanpela edukesenel aweanes progrem long ol ruel hap long toksave long ol pipel long wok bilong sosaiti, wanem we ol i ken kisim helpim long ol na ol rot long kamap memba.

Em i tok wok bilong sosaiti em long helpim ol ruel fama, moa yet ol dispela husat i stap insait long bisnis bilong groim na salim kakao.

Em i tok sosaiti bai helpim ol fama

long sevim mani na kisim dinau mani long mekim wok bisnis bilong kakao bilong ol o long wok bilong ol yet.

Long wok bilong ol long lainim ol fama long sosaiti, ol i kamapim sampela pepa we i toksave long wok bilong ol.

Toksave long wok bilong sosaiti i tok olsem sosaiti i stap long:

- Promotim savings namel long ol memba bilong em;
- Lainim ol memba bilong em long yusim mani gut;
- Kisim ol savings bilong ol memba olsem ol kontribusen; na
- Givim dinau mani long ol memba bilong em.

Long kamap memba bilong sosaiti yu ken i gat kakao bisnis pinis o i laik kirapim kakao bisnis, o yu ken kamap wanpela wokman bilong wanpela kampani o dipatmen bilong gavman we i save wok wantaim kakao.

Long statim savings akaun, stat mani em K50 na fi bilong kamap memba em K2.



**BANK OF PAPUA NEW GUINEA**

**PRESS RELEASE**


## KINA FACILITY RATE FOR APRIL 2004

In light of the continued stability in the exchange rate in the first quarter of 2004, the expectation for a further decline in inflation rate and to stimulate private sector activity, the Central Bank has announced a reduction in the Kina Facility Rate (KFR) for April 2004 by 1.0 percentage point to 11.0 percent, effective from Monday 5 April 2004.

**Benny Popoita MBE**  
Acting Governor







## Ista Toktok bilong Praim Minista Hon. Sir Michael Somare GCMG CH

### Pipel bilong Papua Niugini,

**I**sta i givim gutpela sans bilong mi long toktok long yupela olgeta na autim tingting bilong mi long sampela wok gavman i wokim.

Tasol pastaim mi laik toktok long kamap bilong Ista long kantri bilong yumi. Ailan bilong mipela i joinim ol arapela kantri long wol moa long 100 yia i go pinis taim ol Kristen Misinari i kam long hia long autim tok bilong God. Ol i no tanim bel bilong ol pipel bilong mipela tasol, ol i givim ol sevis olsem helt na edukesen tu.

Ol misinari i no bin save wanem samting bai kamap taim ol i kam long hia, tasol ol dispela strongpela manmeri i bin putim laip bilong ol long han bilong God na ol i lusim kantri bilong ol long arapela sait long wol long kam long hia. Nau long Ista, mipela i tingim ol dispela strongpela misinari husat i bin kam long hia na senisim laip bilong mipela olgeta.

Planti long ol i bin mekim bikpela ofa tru bikos planti long ol i no go bek long kantri bilong ol. Long wankain pasin na mipela i amamasim Ista na tingim bek bikpela ofa tru Krai i bin mekim bilong mipela.

Mipela wanpela Kristen nesen na mipela i mas mekim ofa tu long kamapim gutpela sindaun bilong pipel na kantri bilong mipela. Mi singaut long yupela long wok bung wantaim dispela gavman bai developmen na ol sevis bilong gavman i go long olgeta hap kona bilong kantri bilong yumi.

Long taim mipela i kisim independens inap nau mipela i gat planti gavman pinis. Sampela long ol dispela gavman i bin asua na i bagarapim gro bilong mipela olsem wanpela nesen. Mipela i mas kisim skul long ol dispela asua na-go het yet.

Long wankain taim tu, ol "wan tausen pisin" o ol pipel bilong dispela nesen i save daunim wok developmen tu taim ol i save bagarapim ol samting we i stap bilong helpim ol manmeri i stap long dispela kantri. Mipela i mas lusim pasin bilong tingim mipela yet na tingim wanem samting mipela olsem wan wan manmeri i ken mekim bilong kamapim moa developmen long kantri bilong yumi.

Tasol ol "wan tausen pisin" bilong dispela nesen i wok bung wantaim long tripela ten (30) yia i go

pinis long sanap olsem wan pipel. Yuniti bilong mipela em i wanpela bikpela kaikai tru we mipela i ken amamas long en tude. Planti kantri we i gat planti kain kain manmeri i stap long en i no inap long sanap strong olsem mipela i mekim long dispela sotpela taim.

Insait long spirit bilong Ista, mipela i mas lainim long mekim ofa bilong gutpela sindaun bilong nesen. Maski long pasim rot we bai i stopim ol sevis i go long ol arapela, yumi i mas paitim toktok wantaim gavman long painim rot we bai olgeta manmeri inap long kisim wankain kaikai. Sapos mipela i laikim developmen, mipela i noken bagarapim infrastraksa o rot na bris na mipela i mas bihinim lo.

Yupela i save olsem i gat sampela gro insait long ekonomi bilong mipela, tasol mipela i kisim taim long sait bilong mani yet. Yu bai lukim ol nius man na meri i wok long sekim olgeta samting gavman i traim long mekim long kisim moa mani bilong ekonomi bilong mipela.

Mi laik toksave long yupela ol pipel bilong dispela nesen husat i votim dispela gavman long skelim strong bilong mipela long wok mipela i mekim i kam inap long tude. Yupela i mas gat bilip long mipela long kamapim moa gro na apim mak bilong laipstail bilong olgeta manmeri bilong PNG. Em i no wanpela liklik wok na yumi olgeta i mas wok bung wantaim.

Mipela i wok long lukluk long kisim dinau mani long ausait, tasol mipela i wok long mekim wok insait long kantri tu long mekim mani bilong strongim ol gavman sevis olsem helt, edukesen, polis, na infrastraksa developmen wantaim ol arapela sevis tu.

Ol ovasis na lokol bisnis i luksave long wok bilong mipela na i luk luk gen long kamapim bisnis bilong ol insait long kantri. Tasol mipela i no inap sanap strong sapos mipela i lus tingting long politikel stabiliti.

Mipela i holim inap namba bilong stap insait long gavman inap long 2007 ileksen, tasol mipela i mas i gat sapot bilong planti moa memba bilong Palamen sapos mipela i laik karim aut ol bikpela lo senis. Long dispela as tasol, mipela bai wokim ol senis long Ogenik Lo long Intekriti bilong ol Politikel Pati na Kendidet na Seksen 145 bilong Nesenel Konstityusen o Mama Lo we i givim pawa long

gavman bilong stap long opis inap long 36 mun bai i nogat seksek i kamap long olgeta 18 mun.

Pablik sekta rifom o senis i wok long ron stret. Ol gavman ejensi bilong mipela i wok long wok hat long stretim wok bilong makim ol provinsel administreta na bihain ol bosman bilong ol wok bilong ol gavman bisnis olsem Telikom MVIL, PNG Power. Ol dispela senis bai lukim ol bosman i mas mekim gut wok bilong ol. Ol lain husat i wok hat bai kisim luksave tasol ol lain husat i no mekim gut wok bai kisim mekimsave.

Sampela hap bilong ol dispela rifom o senis bai sevim mani tasol em bai i no inap long mekim nupela mani bilong ekonomi bilong mipela. Long dispela as, ol samting dispela gavman i laik mekim long kamapim mani i bikpela samting tru.

Long wankain taim, mi wok long singaut long olgeta Papua Niugini manmeri long wok wantaim gavman na praivet sekta bilong karim developmen i go long graun bilong ol. Nau yet, bekim bilong ol papa graun insait long kantri i gutpela. Em i soim olsem mipela i les pinis long ol banis i stap long developmen bilong yumi.

Mipela olgeta i laik go het wantaim ol arapela kantri long wol long givim gutpela sindaun bilong pipel bilong mipela.

Nogat wanpela gavman em i gutpela tru olgeta, tasol mi laik tok stret long yupela olsem dispela gavman i mekim komitmen long kamapim gutpela sindaun bilong olgeta manmeri na givim moa beta sevis i go long ol komyuniti bilong yumi.

Mi singaut long olgeta sitisen na manmeri i stap insait long Papua Niugini, ol Non-Gavman Ogenaisesin, pablik na praivet sekta long wok bung wantaim long kamapim gutpela sindaun bilong pipel bilong mipela.

***Hamamas bilong Ista i go long yupela olgeta na lukautim yupela yet long dispela longpela wiken.***

**M T SOMARE GCMG CH  
Praim Minista**

**WANTOK****TREID DAIREKTRI**

Sapos yu laik putim nem o sevis bilong kampani bilong yu long Treid Dairektri, ringim BONNER HUI long Ph: 325 8527 or Fax: Nogat yet EMAIL: wordadvertising@global.net.pg

**BAIM GOL****Gol Baia - Metals Refining Operations**

Givim gutpela prais insait long kauntri bilong yumi. Ino namel man ibaim long yu. Kam na salim gol bilong yu stret long opis bilong MRO.

MRO istap long Seksen 451, Alotment 2, Kuila Estate, Kameron rot, Waigani  
P.O. Box 3980, Boroko, NCD  
Papua Niugini

Phone: 325 2647 or Fax: 325 2959

**GOL BAIYA****KVDC GOLD LIMITED**

1. Would you like to own a Gold Company that makes Money for you today?
2. Do you need money now? We believe you do. We can certainly help you repay all your loans if you join us today.
3. How about your current job? Is it secured and are you making money that you deserve? Call us now.
4. Is your future Financially secured? We don't think so. Call us now, do not delay.

We Specialise in:

- Buying & Selling Gold in PNG and Overseas using stronger currencies
- International Gold & Commodity Trading
- International money transfers
- Establishing OD Limits for PNG Rural people to do business
- Assisting PNG Rural People Start up Small Business

CALL US NOW!

Ph: 311 3445, 311 3444 or 311 3446

Fax: (675) 311 3447

PO Box 3183, BOROKO, NCD

Email: natwolaptru@datec.net.pg

**FRESH SAGO AND VANILLA****EAST SEPIK FRESH SAGO - K20Kg Bag**

Wewak / Madang Wewak / Hagen  
Wewak / Lae wewak / Goroka  
wewak / Moresby

Contact: Peter Devis - Ph/Fax: 856 2743  
Email: pdevis@datec.net.pg

**VANILLA VINE CUTTINGS**

for sale, nearly to all destination in the country.

For price list contact Peter Devis on Ph/Fax: 856 2743, email: pdevis@datec.net.pg or postal address: P.O. Box 89 Wewak, ESP

how to make a good quality cured beans.

Book also Available

We also can be agents for vanilla bean buying companies.

**MENESMEN SEVISES****MANPOWER**

Management Services Limited  
(Fast and Efficient Service)

- Training & Localisation programs
- Work Permits
- Visas
- Company Incorporations
- IPA Certifications  
(Reminders automatically remitted)

Contact: Helen, Liz,  
Telephone: 321 5491 / 321 5492  
Facsimile: 321 5493  
Email: manpower@daltron.com.pg

**ISLANDS HR MANAGEMENT SERVICES LTD**

A bridge to your future career  
Specialise in the following activities

- HR Management
- Business development
- Rural / NGO Funded projects
- Training & Localisation
- Recruitment & Labour Hire
- Passport & Work Permits
- Secretarial Service

We are located at  
Suit 8 Level 1 Garden City, Angau Drive, Boroko

Email: islandshrmc@datec.net.pg  
PO Box 889, Boroko, NCD  
Ph: 323 4955; Fax: 323 4799

**PISIN TANIM TOK****TRANSLATION**

WORD PUBLISHING IS OFFERING  
TRANSLATION SERVICES,  
TRANSLATE ENGLISH TO  
TOK PISIN & MOTU

FOR MORE INFORMATION CALL BONNER HUI ON

PHONE 325 2500 OR FAX 325 2579.  
email: wordadvertising@global.net.pg

**REKODING STUDIO**

**GMA**  
RECORDING STUDIO

**WE CAN OFFER**

- Digital Recording
- High Speed Dubbing
- Album & Demo Production
- Commercial Audio Jingles
- Hire of Studio Equipment
- Public Address System
- Bulk Cassette & Compact Disk Orders
- In-house DJ Music
- Live Bank Entertainment

For any of the above services please contact Douglas on Tel/Fax: 326 1523 or write to: Manager, PO Box 339, UPNG

**INSURANCE****PABLIK NOTIS  
HIH INSURANCE  
(PNG) LTD**

Ol Dairekta blong HIH Insurance (PNG) Limited ("HIH PNG") (pastaim ol i save kolim MBf Assurance na FAI Insurance) i laik toksave long pablik olsem Kampani i kam klostu nau long pinisim ol wok blong em insait long PNG.

Olsem tasol, HIH PNG (wantaim MBf Assurance na FAI Insurance) i askim sapos husait man o meri i bilip olsem em i gat kleim we kampani i no stretim yet, orait em i mas salim kleim o wari blong em i kam long dispela adres; HIH Insurance (PNG) Limited, Level 2, Mogoru Moto Building, Champion Parade, Port Moresby, P O Box 507, Port Moresby o long Fax namba 321 2780 o long email [kpmgpng@kpmg.com.pg](mailto:kpmgpng@kpmg.com.pg) kwik taim tasol.

Bod of Dairektas blong HIH PNG i autoraisim

**SEKENHAN KLOS****FRIENDTEX LTD**

P.O. BOX 5049 BOROKO

PHONE: 323 1471

FAX: 323 1479

Dealers & Wholesaler Secondhand Clothing  
SPEND LESS FOR BEST

PRE CHRISTMAS... Specials

A Visit is a Must

**ALL IN BALES OF 50KGS**

- K595 Jean Trouser, Child Jean, Beach Shorts, Bedsheets, Skirts, Colour Jean Pants, Child Pants, Boy colour Jean, L/Tank Tops, S/Less Dress, 3/4 Disco Pants, Nylon Rummage, Sports Shorts, Hemmed Shorts, L/Zip Jackets, Boy Jeans, Ladies Tights, M/Tank Tops, L/Sleeve Polo, Capre, Blue Jean Jackets
- K770 Cotton Pants, Kids/TShirts, Denim Shirts
- K630 Child Mix, Collar T/Shirts, BS/PCK
- K550 RN Plain T/Shirts, Skirts Pants, Jean Shorts, Mix Shorts, Floppy Pants, Socks, Skirts, Tropical Pants, Pillowcases, S/Less Blouse, Flannel Shirts
- K880 Towels, Jean 100 PCs.

**AVAILABLE & NEW STOCKS**

Cargo Shorts, Cargo Trousers, Hunting Jackets, Rugby Polo, Jersey, Cotton Blouse, Mix Jersey, Ladies Bra, Ladies Suit, Denim Bermuda Shorts 3/4. Mixed Bales AA Supreme & special price. Special discount for bulk buyers.  
Location: Kenmore Trade Centre  
Unit 11 off Cameron Road  
Next to Arnotts Biscuits Factory - Gordons

**TREID NA EKSPOT****FAIRFAX EXPORTS LIMITED**

LICENSED CROCODILE SKIN  
TRADERS AND EXPORTERS

**We buy Crocodile Skins**

**MON - SAT**

BURNS H OUSE

STANLEY ESPLANADE, PORT MORESBY

**Tel: 321 4755**

**Fax: 321 4751**

**SURGEON ON CALL**

**If you want a second opinion, a surgical advice or any other medical assistance then we are happy to help you.**

**Give us call.**

**Phone: 311 - 3440**

**BH Mobile:**

**683 8585 AH**

**We are located at the top floor Johnson's Pharmacy at the back.**

**Ringim Bonner Hui sapos yu laik advatais insait long Treid Dairektri bilong mipela.**

**Ph: 325 8527 - Email: word @global.net.pg**

# WIKEN EKSEN POTOS


wantaim Joe Ivaharia



• Ragbi eksen long wiken .



• Netbal fainel eksen long wiken



• Volibal eksen long wiken.



• Pilaia bilong Pom Souths i mekim stail bilong em long soka eksen long wiken.



**DIPATMEN BILONG FOREN AFEAS NA IMIGRESIN**  
*Opis bilong Sekreteri*

## PABLIK NOTIS

Dispela toksave i go long ol Aplikens (lain husat i aplai) long Sauten Rijon na Nesenel Kapitol Distrik husat i bin aplai bilong kisim Papua Niugini Sitisensip long rot bilong Netserelaisesin long go long wanpela Intaviu wantaim Sitisensip Advaiseri Komiti long Fonde (Thursday) Namba 1 de bilong Epril, 2004. Ol Aplikens i mas kamap long dispela kibung wanpela aua pastaim

long taim bilong intaviu.

Ples bilong intaviu i stap long Dipatmen bilong Foren Afeas na Imigresin-Konfrens Rum, Seken Floa, Somare Faundesin Biding, Waigani, NCD. Plis toksave long Sitisensip Sekreteriet sapos yu bai go o nogat. Ol Aplikens long Momase, Hailans na Niugini Ailans Rijon


bai kisim toksave long taim na dei bilong ol intaviu bilong ol.

Long kisim moa toksave, plis ringim ol dispela wok man-meri bilong Sitisensip Sekreteriet: Ms Morivetta Eka, Ms Delilah Madao, Ms Jemimah Sarei na Ms Helen Sanny long telefon 301-4195 o 301-4222.

**OL SITISENSIP APLIKESIN BILONG SITISENSIP ADVAISARI KOMITI HIARING - FONDE, NAMBA WAN DE EPRIL 2004**

NAMBA	NEM	KANTRI	PLES	TAIM
1	CHOW, Joseph Martin Sun Yau	Australian	NCD	9.20 am
2	CHOU, Shin Kong	Chinese	NCD	9.40 am
3	RESSERI, Angelo Renato	Australian	NCD	10.00 am
4	CHAN, John Francis	Australian	NCD	10.20 am
5	DE WITT, Byron Hendrik Charles	Australian	NCD	10.40 am
6	GOH, Say Beng Simon	Chinese	NCD	11.00 am
7	HSU, Chou Yuen Ying	Chinese	NCD	11.20 am
8	HSU, Tzong Yaw	Chinese	NCD	11.40 am
9	HIZON, Felix Villacorta	Filipino	NCD	2.00 pm
10	HOLLAND, Conrad	Australian	MBP	2.20 pm
11	JASMIN, Bonifacio G. Jr	Filipino	NCD	2.40 pm
12	MANESIKIA, Clement Deve	Solomon Islander	NCD	3.00 pm
13	ORTEGA, Ernesto	Filipino	NCD	3.20 pm
14	POWLEY, Douglas Preston	British	NCD	3.40 pm
15	ROCERO, Albert	Filipino	NCD	4.00 pm
16	ROCERO, Corazon	Filipino	NCD	4.20 pm
17	WONG, David Choi Leung	Australian	NCD	4.40 pm
18	SZETO, Wing Kai	Chinese	NCD	5.00 pm
19	TOUA, Geethanjali Mary	Malaysian	NCD	5.20 pm
20	YEUNG, Tony To-Chen	British	NCD	5.40 pm

Gabriel K. Pepson  
Sekreteri



# Broncos bai skelim pilai bilong Panthers

KEPTEN bilong ol Brisbane Broncos, Gordon Tallis i tok olsem ol bai kisim liklik skul long ol Penrith Panthers pastaim long ol i brukim bun wantaim ol Sydney City Roosters long Fraide nait.

Las wiken ol Panthers i kilim dai lam bilong ol Roosters 22-6.

Long Fraide nait, Brisbane bai bungim Sydney City long statim raun 5 bilong Nesenel Ragbi Lig (NRL) resis.

Tallis i tok olsem ol bai lukluk long gem namel long Penrith na Roosters las wik bilong glasim pilai bilong ol Panthers agensim Roosters.

"Taim yu go aut na pilai agensim ol Roosters yu noken poretim ol," Tallis i tok. "Ol i wanpela strongpela tim tru husat i save wok hat na bai yu i mas go aut na pilai strong long stat i go inap long pinis."

Ating bai Brisbane i traim strong bilong ol Roosters bikos sampela biknem pilaias bilong ol bai i no inap long pilai.

Man Ingran Adrian Morley ating bai i stap aninit long saspensen na tes fowet Craig Fitzgibbon i kisim bagarap long skru bilong lek bilong em na bai i no inap long pilai.

Tasol Tallis i lukim gem bilong ol long las wiken na em i save olsem ol Roosters bai inap long pilai strong yet.

Panthers i bin kisim olgeta strong bilong Roosters long stat bilong gem bilong long las wiken na bihain ol liklik spit man bilong olsem Rhys Wesser, Preston Campbell, Craig Gower na Luke Priddis i opim ol gep na kilim ol.


Tallis i bin kirap nogut long lukim Panthers i kilim ol Roosters namba tu taim gen bihain long ol i kilim ol long gren fainol bilong NRL long las yia.

"Penrith i save pilai wanpela kain gutpela stail bilong ragbi. Ol i no save bun slek taim ol arapela pilaia i takolim ol," Tallis i tok. "Mi bin amamas long lukim ol i go aut na daunim ol Roosters."

Tasol Tallis tu i tok olsem ol Roosters bai i no inap long amamas long ol i lus long las wiken na bai ol i kamaut wantaim strong.

Em i tok bikpela samting ol i mas mekim long winim ol Roosters em ol i noken dropim bal tumas.

Tallis i tok em i amamas long lukim ol tes pilaia bilong Broncos i soim kala bilong ol olsem ol i mekim long las wiken.



• Skipa bilong Brisbane Broncos Gordon Tallis bai traim long karim olgeta strong bilong Roosters bihain bai ol i traim long bihain stail bilong Panthers long daunim ol.

"I gutpela tru long lukim Darren Lockyer i sindaun gut long faivet.

Shane Webcke i wok long memeim ol bikpela man na Brent Tate i soim olpela stail pilai bilong em gen."

Yu bai inap long lukim gem namel long Broncos na Roosters long Fraide nait long EMTV long hap pas 8.

## Ropati bai no inap pilai agensim Knights

JEROME Ropati bai i no inap long pilai agensim Newcastle Knights long dispela wiken bikos em i brukim bun long maus bilong em.

Olgeta narapela pilaia insait long lainap bilong Warriors bai stap yet.

Ropati em i wanpela long tripela pilaia husat i stap long haus sik long kisim eksrei we i tok em bai i no inap long pilai ragbi inap long 10-pela wok olgeta.

Warriors ful bek Brent Webb i brukim pinga bilong em na Tevita Latu i paitim het bilong em tasol tupela i stap insait long tim yet.

Ol Knights i gat sampela hevi tu. Kepten Ben Kennedy husat i senisim Andrew Johns bihain long em i bagarapim masol long skru bilong lek tu i gat hevi long wanpela bun long han bilong em i bruk.

Em i wok long kisim bagarap long ol masol long baksait bilong em yet.

Nau ol i wetim ripot i kam bek long ol trena bilong skelim sapos prop Matt Parsons (paitim het bilong em), ful bek Robbie O'Davis (masol bilong lek) na winga Timana Tahu (masol baksait long lek).

Faivet Steve Witt na seken rowa Clint Newton bai pilai.

Ol arapela biknem pilaia bilong Knights husat bai i no inap long pilai klostu em kepten Andrew Johns, ful bek David Seage, senta Mark Hughes, winga Anthony Quinn, seken rowa Steve Simpson na ol bekap pilaia olsem Luke Quigley, Reegan Tanner na Josh Smith.

Tasol ol Warriors i les long tok olsem ol bai inap long winim daunim ol Knights.

Kosa bilong ol, Daniel Anderson i tok olsem em i no wari long mekim senis bikos olgeta pilaia i bin pilai strong agensim ol Sea Eagles long las wik.

## Hopoate kisim wan mun malolo



• Hevi bilong bodi bilong em i orait, tasol spit bilong em tasol i no stap long mak bilong em bipo.

SENTA bilong Manly, John Hopoate bai malolo long pilai long fes gret inap long wanpela mun long stretim strong bilong em.

Hopoate i bin bung wantaim kosa bilong Sea Eagles Des Hasler na ol i tok em i mas wok hat long trening long apim mak bilong strong na spit bilong em.

Klab i tok wan mun malolo bilong em i no kamap bihain long refri i bin sin binim em las wik bikos em i wok long bekim toktok bilong refri.

Dispela i bin kamap taim ol i pilai agensim New Zealand War-

riors.

Sea Eagles klab i tok klia olsem, "Bihain long mipela i toktok wantaim kosa Des Hasler na klab dokta, mipela i skelim olsem Hopoate i mas strongim bek lek bilong em bai em inap long pilai gut."

"Hopoate i brukim lek bilong agensim Parramatta las yia na em i wok hat long op sisen long pilai gen. Hevi bilong bodi bilong em i orait, tasol spit bilong em tasol i go daun. Olsem na mipela i givim taim long em i mas tren hat long dispela wanpela mun."

## Panthers na Roosters kros gen

KROS namel long tupela gren fainol tim bilong las yia i kamap ples klia long dispela wik taim kosa bilong Roosters, Ricky Stuart i tok Penrith i wok long pilai nabaut wantaim bagarap Luke Swain i kisim las wiken.

Swain i lusim fopela tit na maus bilong em i bin bruk bihain long huka bilong Roosters Suat Webb i mekim wanpela hai takol long em.

Webb i bin kisim mekimsave inap long tripela wik saspensen.

Stuart, husat i no wanbel wantaim mekimsave Webb i kisim i tok olsem em i bin harim kain kain ripot long bagarap bilong Swain.

"Mipela i harim kain kain ripot olsem Luke Swain bai pilai long dispela wiken sapos em i kisim wanpela spesol maut gad. Bihain mipela i harim olsem Penrith i redi long salim ol medikel ripot i go long NRL sapos mipela i tingting long apil long sas Webb i kisim.

Sief Eksekyutiv bilong Roosters, Brian Canavan i bin bung wantaim mets rivi komisina Greg McCallum long toktok long sas Webb i kisim.

McCallum i tok i tru olsem ol i makim mekimsave bilong Webb long mak bilong bagarap Swain i kisim, tasol na sapos Swain inap long pilai o nogat i no wanpela bikpela samting.

Sief Eksekyutiv bilong Penrith, Shane Richardson i kros tru long toktok bilong Stuart.

Em i tok em i no wanbel olsem Stuart i wok long tok olsem Swain i orait.

"Namba wan samting, mipela i no giaman. NRL i bin



Kosa bilong Roosters i no wanbel long kain kain toktok em i harim i kam long Penrith Panthers klab.


ring long Mande na ol i askim long medikel ripot bilong Swain. Mipela i no ringim ol. Ol i ringim mipela. Luke Swain bai i no inap long pilai long dispela wik. Ol dokta i katim em tupela taim pinis," Richardson i tok.

Em i tok olsem em i gat bikpela ona long Stuart, tasol ol kain toktok em i mekim i no gutpela.

"Bikpela samting em pilaia bilong ol i asua, ol lain bilong NRL i sekim na NRL i askim mipela long medikel ripot. Mipela i no traim long apim mak bilong mekimsave bilong Webb," em i tok.

**Strong bilong ol tim i sanap olsem bihain long pilai bilong ol long Raun 4:**

<b>Ol namba wan tim bilong brukim difens bilong arapela tim</b>	<b>Ol tim we difens bilong ol i winim ol arapela</b>
Broncos Panthers Roosters Knights Eels	Rabbitohs Roosters Cowboys Wests Tigers Panthers



# Lockyer kisim namba wan trai olsem faivet

DARREN Lockyer i skorim fes trai long faivet posisen long las wiken.

Long hap taim, ol i bin 18-10 tasol Lockyer i bin mekim wanpela wan man trai long 67 minit bilong gem. Bihain tasol long em kepten Gordon Tallis i abrusim 4-pela pilaia bilong Melbourne Storm long skorim narapela trai gen na Brisbane i win 34-26.

Lockyer i bin kisim planti kain toktok taim Kosa Wayne Bennett i makim em long pilai long faivet posisen.

Planti i bin tok olsem Brisbane bai i no inap long pilai gut bikos Lockyer i gat nem pinis olsem namba wan ful bek long ragbi lig long wol.

Tasol nau NRL resis i stap long raun 5 na Lockyer i wok long pilai long faivet posisen na las wik tasol em i skorim namba wan trai bilong em.

Dispela i soim olsem Lockyer i wok long sindaun gut long dispela posisen nau.

Gem bilong Broncos na Storm i bin kamap long hom graun bilong Brisbane long Suncorp stadium.

Na taim yangpela wiriga bilong Storm, Steve Turner i bin kisim bagarap long skru bilong lek bilong em na ol opisel bilong NRL i salim kar i




• **Ol sapota bilong Broncos i no wanbel taim Melbourne Storm i bin gat 14-pela pilaia long fil.**

go insait long karim em i kamaut, ol sapota bilon Brisbane i singaut na ol i no wanbel bikos man i senisim em i bin stap long fil pinis.

Ol sapota bilong Brisbane i no bin wanbel bikos wankain samting i bin kamap long raun tri taim Broncos i bin pilai agensim Wests Tigers. Shane Webcke i bin kisim taim long wanpela bikipela takol na taim em i wok long wokabaut i go aut, man i senisim em, Corey Parker i bin ron i go insait long fil na em i skorim wanpela trai.

NRL i bin lukim dispela na ol i tok ol bai rausim tupela poin long ol Broncos.

Olsem na taim Ryan Hoffman, man i senisim Steve Turner i ron i go long fil ol sapota i singaut nogut tru bikos ol i skelim olsem Melbourne i bin gat 14-pela pilaia long fil long wanpela taim. Melbourne i bin statim gem gut, na ol i bin lid



• **Winga Stuart Kelly taim em i skorim trai bilong em egensim Melbourne Storm.**

18-4. Wanpela trai long fes hap i bin kam long winga bilong Broncos, Stuart Kelly.

Tasol bihain long hap taim siren i karai, Lockyer i salim wanpela sip kik i go na bal i abrusim Storms ful bek Billy Slater na i pundaun stret long han bilong narapela winga bilong Broncos Michael De Vere husat i go skoa. Konvesen kik

bilong De Vere i kam long saitlain i kilim stret Storms.

Long seken hap Brisbane i taitim bun na kamaut.

Senta Brent Tate i brukim difens na salim bal i go long De Vere long putim namba tu trai bilong em.

## Raun 5 NRL Dro

Fraide, April 9

7.30pm, Aussie Stadium  
 Sydney Roosters V Brisbane Broncos

\*Lukim dispela gem long EMTV long Fraide nait long hap pas 8.

Sarere, April 10

7.30pm, Toyota Park  
 Cronulla Sharks V NQ Cowboys

7.30pm, Ericsson Stadium  
 New Zealand Warriors V Newcastle Knights

Sande, April 11

2.30pm, Telstra Stadium  
 West Tigers V St. George Dragons

3pm, Penrith Football Stadium  
 Penrith Panthers V Melbourne Storms

\*Lukim dispela gem long EMTV long 4 klok long apinun na putim lau long FM 100 sapos yu laik harim laip brodkas bilong dispela na ol arapela gem tu.

4.30pm, Telstra Stadium  
 Canterbury Bulldogs V Manly Sea Eagles

Mande April 12  
 Parramatta Eels V South Sydney Rabbitohs

Canberra Raiders - Malolo

## Tigers win tasol ol biknem pilaia kisim bagarap

WESTS TIGERS i bin win long las wiken taim ol i daunim ol North Queensland Cowboys 18-8.

Dispela i makim namba win bilong ol long dispela yia.

Tasol nau ol bai i mas wok hat long dispela wiken long Raun 5 bilong NRL resis bikos planti long ol biknem pilaia bilong ol i kisim bagarap na bai no inap long pilai.

Paia lait uutiliti beklain pilaia bilong ol, Benji Marshall i bin kisim bagarap long sol bilong em bihain long las wiken.

Marshall em i wanpela yangpela pilaia tasol, 17 krismas na planti man husat i save bihainim gem na lukim em pilai long op sisen sevens resis i tok olsem em

i wanpela paia lait pilaia tru we stail bilong pilai bilong em ating bai i winim Andrew Johns.

Long sevens resis em i bin kukim stret.

Kosa bilong ol Tigers, Tim Sheens i tok i luk olsem Marshall bai i no inap long pilai long taim liklik.

Em i tok Marshall bai stap wantaim kepten bilong Wests Tigers, Darren Senta na tupela arapela ki pilaia bilong ol Pat Richards na Michael Buettner long saitlain. Olgeta ol dispela biknem pilaia bilong ol Tigers i kisim bagarap na stap.

"Mipela i kisim tupela poin, em gutpela, tasol nau mipela i sot long

ol gutpela pilaia na ol i no kisim bagarap we ol bai no inap long pilai long wanpela wik tasol. Nogat. Ol bagarap ol i kisim bai lukim ol i sindaun long saitlain moa long wanpela wik," Sheen i tok.

Marshall i bin kisim bagarap long sol bilong em long namba 16 minit long fes hap taim em i takolim bikipela prop bilong Cowboys, Paul Rauhihi. Em i kam aut na go stret long senis rum na em i no kam bek.

Bihain long em i lusim fil, ol Tigers i senisim bek lain bilong ol na bihain ol i kilim ol Cowboys long seken hap.

Winga Tom Moodie i skorim wanpela long tupela stail winga trai taim em i ron 30 mita i go daun long wing bilong em.


Tigers i bin lid 8-2 long fes hap taim Shane Elford i saitstep na skorim narapela trai.

Ol i skorim tripela trai na Cowboys i skorim wanpela tasol. Sheens i tok em i amamas wantaim difens bilong ol mangi bilong em.

Em i tok difens bilong ol i wok long strong tru long olgeta pilai bilong ol long dispela yia.

"Mipela i senisim stail bilong difens bilong mipela. Mipela i no pilai olsem las yia," em i tok.

Sheens i tok long sait bilong atek, ating bai ol i kisim taim liklik bikos em bai i mas senisim ol pilaia bilong em bikos ol arapela i kisim bagarap.



• **Ol Tigers pilaia i holim pasim Paul Bowman bilong Cowboys.**

Tasol long sait bilong difens, ol i wok long pilai strong.

Em i tok bikos planti pilaia i wok long kisim bagarap, nau ol i wok long lukluk long ol wan wan pilaia long soim rot.

Moodie i bin mekim dispela las wiken. Em i skorim tupela trai long kilim stret strong bilong Cowboys.

Kosa bilong ol Cowboys, Graham Murray i tok sait bilong em i no strong tumas bikos ol i no kontrolim gut bal.

Em i no amamas tumas bikos ol i lusim pinis tripela gem long stat bilong dispela sisen.

Mitchell Sargent i bi skorim wanpela trai taim gem i klostu pinis. Dispela gem i bin wanpela stail gem tru na i luk olsem ol narapela gem long dispela sisen bai bihainim wankain stail olsem dispela rait gem.

Namba	Klab	P	W	D	L	B	PF	PA	PTS
1	Roosters	4	3	0	1	0	109	58	6
2	Panthers	4	3	0	1	0	112	66	6
3	Broncos	4	3	0	1	0	112	66	6
4	Rabbitohs	3	2	0	1	1	69	54	6
5	Raiders	4	3	0	1	0	84	76	6
6	Bulldogs	3	2	0	1	1	72	69	6
7	Dragons	4	2	0	2	0	82	67	4
8	Storm	3	1	0	2	1	86	76	4
9	Tigers	4	2	0	2	0	70	63	4
10	Knights	4	2	0	2	0	92	126	4
11	Eels	4	2	0	2	0	90	126	4
12	Cowboys	3	0	0	3	1	46	61	2
13	Warriors	4	1	0	3	0	80	96	2
14	Sharks	4	1	0	3	0	66	92	2
15	Sea Eagles	4	1	0	3	0	74	118	2

P: Pilai, W: Win, D: Dro, L: Lus, B: Bye o malolo, PF: Poin Fo, PA: Poin Agens, PTS: Poin

# Pasin bilong stap strong long pilai

...Ol toktok i kam long Dr Liz Applegate bilong Yunivesiti bilong California, Amerika

### Paul Zuvani i raitim

#### Kaikai

LONG Papua Niugini gaden kaikai olsem taro, banana, yam, tapioka na ol kumu olsem aibika, tulip na narapela gutpela ol kumu em i orait o gutpela tasol long ol spotmanmeri long kaikai.

Long sait bilong abus pis long solwara i gutpela abus bilong kaikai. Pis yet em i gutpela o helti abus. I nogat gris long em.

Ol frut olsem mango, pawpaw, pineapple na narapela gutpele frut i gutpela tu long kaikai.

Kaikai bilong waitman i narakain.

Sapos spotmanmeri i stap long wanpela taun o stap long narapela kantri em i ken kaikai ol kaikai em ol saveman i tok long kaikai long lukautim bodi.

Fruit bagel, bret o lo fet mafin.

Sapos i gat ol pilai i go moa long tupela aua orait long strongim bodi manmeri i ken kaikai dispela ol kaikai.

Ol drai kaikai olsem yogat, lo fet sis, na bisket.

Abrusim ol dispela kaikai sapos pilai i kamap klostu taim- fet kaikai, ais krim na fraim samting.

Hai protin kaikai olsem mit, milk na ol samting i gat mit long en.

#### Protin o abus

Kaikai abus em i as bilong gro na i stap namba wan long olgeta kaikai. Ol narapela em zink, faiba, vitamin na planti arapela moa samting. Tenpela namba wan samting em Dr Applegate i tok long em:

1. Tuna,
2. Lentils na rais,
3. non-fet yogat,
4. clams,
5. lin bif,
6. skinless kakaruk bres,
7. pinto bins na torillas,
8. Salmon,
9. Dak Turki mit na
10. Totu & bek potato.

#### Vestabol o grins

Abika, aupa, kapis, sako, Brokoli, bin, kespikum, tomato na planti arapela sior i gutpela. Tasol ol i no ken ol kain kumu we i bagarapim man.

#### Fet

Fet em i wanpela bikpela samting long laip. Fet i helpim bodi long no ken drai na tu strong long bodi long stap. Tasol em i wanpela samting we man i kaikai bai bodi isi isi tru long kisim i go insait long sistem bilong em.

Em i ken stap long bodi inap 72 aua o tripela de bipo long bodi i rausim.

#### Ol kaikai bilong kaikaim bipo long resis

Taim bilong spotman o meri i redi bipo long resis i kamap em long wanpela wik bipo long resis i kamap. Kaikai samting olsem 2500-4000 deili calories. Dispela i givim olsem 450+ grem ol kaboaidrets na 80 grem protin. Taim de bilong resis i kam klostu makim bilong kisim kaikai i mas kamdaun.

Stap insait long ol wei yu save kaikai long spot laip bilong yu. Noken harim gris toktok bilong ol man na kisim ol samting we yu no mas kisim. Kaikai 2-4 aua bipo long resis i kamap. Kisim kaikai olsem bagel na jam, banana, spot drink, rais na bek potato.

#### Pasin bilong kisim bek strong

Taim spotmanmeri i tren na pilai bodi bilong i kisim na lusim planti strong. Na olsem bodi i laikim taim bilong malolo tu.

Ol spotmanmeri husat i no kisim bek strong i ken painim bagarap isi o i no inap long mekim gut olsem ol i mas mekim.

Long dispela as ol i mas kaikai inap na kisim inap taim bilong malolo.

#### Lusim planti tuhat

Planti ol ekasesais na pilai i save mekim ol manmeri i lusim planti tuhat.

Ol smat spotmanmeri i save kisim kaikai long was long ol na i save larim inap taim bilong ol long malolo.

#### Aian

Planti ol spotmanmeri inap lusim aian long bodi bilong ol long taim bilong tren na pilai. Dispela em long wanem ol i no save kisim inap ol samting we bai sapatim aian. Ol spotmeri husat i stapim ol kaikai long lusim hevi bilong ol i ken lusim aian tu.

Kaikai liklik na kisim sampela dring i gutpela long strongim spotman na meri i go moa yet.

#### Taim bilong kisim malolo o silip

Spotmanmeri husat i no kisim malolo long dispela nait bipo long ol go resis i ken mekim em i skin idai long pilai spot.

Silip em i gutpela long spotmanmeri wanem em i taim bodi i gro na rop bilong bodi i traim long kamap orait bihain bodi i yusim em.

Ol krismas na ol aua em ol manmeri i mas kisim long malolo: nain (9) yia manki em 10 / aua silip, 10-11 yia krismas i mas kisim 9 fl silip, 12 yia krismas 9 / silip, 13 + yrs 9 na 16-20 yia krismas em 8-9 aua.

#### Tren tumas

Tren tumas i ken mekim bodi i pilim les. Dispela i ken soim tu olsem bodi i no bin kisim inap taim bilong kisim bek strong.

Planti taim ol trening program bilong ol spot i planti tumas we i lukim bodi i no inap long kisim olgeta na olsem em i sot long go moa yet.



• Marcus Bai long kala bilong Leeds, nupela tim bilong em long Inglan.

Taim yu pilim olsem bodi bilong yu i pilim les sekim blut reit bilong yu long taim yu kirap long bed. Sapos yu pilim olsem blut bilong yu pam planti orait yu mas givim bodi bilong yu taim bilong malolo.

#### Ol rong samting long kisim long strongim bodi

Wankain olsem olgeta manmeri i save mekim long wan wan de ol spotmanmeri i ken abrus long kisim ol samting we ol i no mas kisim.

Ol kain samting olsem kaikai planti, i no kaikai planti na laik kaikaim kaikai yu laik tasol na i no ol arapela kaikai. Dispela em Dr Applegate i tok i ken givim hevi long spotmanmeri.

Ol pikinini i mas kaikaim moa ol kainkain, gutpela kaikai. Disepla em long gro bilong ol, long ol i ken kisim strong long lainim ol samting na pilai na sapos ol i kamap gutpela dispela bai i helpim ol long i gat strongpela bodi bihain.

Stadi i-soim olsem ol man i ken gro moa yet taim i kisim 20 krismas na ol meri i kamapim get yet taim ol i kisim 20 krismas.

Strong i save kam long kaikai. Na sapos manmeri i no kisim kaikai orait bodi i nogat strong long mekim wok. Abus tu i save givim strong tu. Sapos i nogat inap kaikai orait manmeri i mas kisim abus o sampela fet long givim ol strong.

Olgeta manmeri i mas kaikai long stap laip. Sapos nogat bai laip i lus. 4-10 yia krismas i nidim inap kaikai long stap. Sapos nogat ol bai i no inap kamap gut.

Bikmanmeri i orait em i ken strongim skin inap long taim sapos kaikai i kamap o i redi.

Bodi i nidim kaikai na abus long taim bilong gro na long taim bilong sikmun.

Gutpela piksa bilong spotmanmeri em biknem ragbi lig pilaia Marcus Bai, kickboksing sempion Stanley Nandex, skwas Naluge Guy, Osi Rul Mal Michael, swimming Ryan Pini, wettlifting Dika Toqua na atletik Mae Koime. Ol dispela lain i save bihain na stap long ol pasin we i lukim ol i stap strong long pilaim spot bilong ol.

Sapos ol i abrus sampela we bilong ol long pilai bai lus.

## Marafi bihainim lekmak bilong Mal Michael

### Spot Profail

**Nem:** Jessie Marafi  
**DOB:** 26/4/89  
**Krismas:** 15  
**Hevi:** 47 kg  
**Longpela:** 166 sentimita  
**Ples:** Hap kas Markham, Morobe na Galp provins  
**Skul:** June Valley Komyuniti Skul  
**Pilai:** Aussie Rules (osi rul)  
**Stat pilai:** 2000  
**Klab:** University Bulldogs  
**Kompetisen:** Pot Mosbi Aussie Rules  
**Posisen:** ful bek  
**Kosa:** Joe Maggio  
**Bikpela pilai:** Stap insait long Anda 14 PNG Binatang tim long go pilai long Queensland sempionsip las yia, 2003. Dispela bai namba tu taim bilong em long go pilai long Mackay, Australia.

**Driman:** Bihainim lekmak bilong Mal Michael

**Kaikai i laikim:** Rais na stiu (stew)

**Dring:** wara

Spot laipstori bilong yangpela Marafi i go olsem: Em i bin stat pilai soka taim em i yangpela manki long Bomana Polis trening Koles we papa bilong em polisman long hap.

Em i pilai soka tasol sampela poroman bilong em i save pilai Aussie Rules. Taim em i lukim ol em laik bilong em long Aussie Rul i stat gro.

Bihain ol poroman bilong em i helpim em na em i save pilai Pot Mosbi Aussie Rul kompetisen.

Taim em i pilai gut na krismas bilong em i go antap em i joinim Yunivesiti Bulldogs. Em i wanpela bilong ol pilaia husat i helpim tim bilong em long winim gren fainal bilong klab long krismas bilong ol.



• Yangpela Jessie Marafi husat i stap long AFL PNG 16 Binatang tim.

Wantaim gutpela pilai bilong em AFL PNG i kisim em long Binatang skwat bilong em.

PNG Binatang skwat long dispela wokabaut em Isaac Anaga,

Simon Kanasa (Kila Kila Sekendori), Morris Marai (Badihagwa), Sydney Musi (De La Salle), Gabriel Kani (Taurama), John Vincent (Don Bosco),

Douglas Banimbi (Sacred Heart), Jesse Marafi (June Valley), Ula Lui, Graham Nuga (Fisherman Ailan), Kei Haro (Gereka), Emmaus Wartovo (Gerehu Sekendari), Paul Philip (Mobil Oil), Junior Wano (Hohola Youth), Desmond Waluka, Justin Meta, Joe Dende, Gold Masep (WNB), Nick Polosi, Vaibi Fagu (Lae) na Lucas Tumbe (Goroka).

Ol pilaia i stap baksait em Vele Kilaveu, Donald Kelly (Fisherman Ailan), Philip Katmale (Hagara), Gabriel Baki (WNB), Eugene Tovue (Bavaroko), Sebasco Bar na Desmond Garap (Badihagwa).

Tim menesmen em Joe Maglio (Kosa), Gia Iga na Overa Gibson (Asisten Kosa), Tua menesa em Pater Moses Kar, Graham Pati em Tim menesa na Paul Banimbi em mausman bilong ol papamama.

Marafi i bin save pilai stail Aussie Ruls Futbol stret na planti manmeri i luksave long em.

# Nupela ol spot long Arafura Gems



Ol opisa bilong PNG Arafura Gems komiti em Thomas Tabel (lephan), siaman Thomas Kahai (namel) na bipo PNG 100 mita sempion Takale Tuna i lukluk long 2005 Arafura Gems program. Foto: JOE IVAHARIA.

## Joe Ivaharia i raitim

OL NUPELA spot long go insait long 2005 Arafura Gems program em wetlifting, taekwondo na fustal.

Dispela ol pilai bai kamap long Darwin, Australia long Mei 14-21, 2005.

Las yia ol pilai i no bin kamap tasol bikos long hev'i bilong sik SARS.

Arafura Gems i save kamap long olgeta tupela yia.

"Long biknem bilong wetlifting insait long rijon mipela i givim tok orait long wetlifting. Tasol taekwondo na fustal i bin askim long kamap long dispela ol pilai na olsem mipela i givim tok orait long em." Spot Minista bilong Noten Teritori John Ah Kit i tok.

Fustal pilai em wankain olsem soka tasol i gat foapela o faivpela pilaia i save stap insait long tim. Ol i save pilai insait long haus.

Wanpela open man divisen bai stap insait long fustal pilai.

Long soka em ol yangpela o yut divisen bai kamapim ol pilai.

Kriket i bin stat long 1999 tasol i no moa kamap inap dispela yia we Australia i pilai wantaim Bangladesh dispela i mekim na ol oganaising komiti i askim long ol pilai long kamap gen.

Ol oganaising komiti i tok ol bikipela pilai long Noten Teritori bai lukautim ol pilai i kamap aninit long ol long taim bilong gems.

Tasol bipo long wan wan spot i kamap i gat mak we olgeta pilai i mas bihainim bipo long ol i kisim tok orait long kamap.

Ol spot o pilai we bai kamap em atletiks, Aussie rul, badminton, besbal, boksing, kriket, saikling o baisikol, dragonbot, golf, gymnastik, hoki, intenesenel laipseving, lon bouls, netball, sepaktakro, sut-ing, soka/fustal, sofbal, skwas, swimming, tebol tennis, taekwondo, tennis, tenpin bouling, tas futbal, triathlon, bis volibal, indo volibal, watapolo na wetlifting. PNG bai i traim hat long mekim gut long ol pilai em i stap long en.

## Bung wantaim long spot - Sinai Brown

### Paul Zuvani i raitim

NESENEL Memba bilong Gazelle na Minista bilong Nesenel Plening na Monitaring Sinai Brown i askim olgeta manmeri long Gazelle insait long Is Nu Britan long ol i mas givim sapot long ol pilai i kamap long provins.

Brown i mekim dispela toktok taim provins i redi long holim Gavana Sofbal Kap tonamen we bai kamap long dispela lsta wiken.

Long taim em i tok amamas long Tomadir Spot Yut na Rikriesen Faundesen insait long Gazelle distrik long holim ol pilai Brown i askim ol femili long kamap we moa long dispela ol papamama i mas kam bung na sapotim ol pikinini bilong ol long taim bilong lsta.

Em i tok Is Nu Britan i gat nem pinis long kamapim gut ol pilai na kamapim ol gutpela pilaia husat i bin makim pinis na makim yet provins na kantri long ol bikipela pilai.

"Spot i save brukim ol paul tingting i save stap insait long komyuniti long

dispela i save kamapim wanbel pasin we pasin bilong laikim narapela narapela em bikipela samting," Brown i tok.

Long dispela em i askim long moa ol pilai long kamap long ol distrik na provins.

"I luk olsem planti ol nius nogut bilong paul pasin i wok long kamap long provins na kamapim nem nogut.

Mi nogat we long pasim kain pasin olsem tasol mi save Devil i win long grisim ol manmeri long kamapim pasin nogut."

Em i tok dispela pasin nogut namel long ol femili i kamap bikipela long ol kot long Is Nu Britan.

Em i tok kain pasin na ripot tu i save mekim femili i bruk daun.

Brown i givim sampela mani long oganaising komiti long holim dispela Gavano Kap.

Tonamen bai kamap long Seken Wol Woa Eastrip long Tomariga na bai stat long tumoro na pinis long Mande na bai i lukim planti gutpela pilai i kamap.

## Lokel kampani givim sapot long golf sempionsip

LOKEL kampani long Mt Hagen i givim K20,000 long helpim na kamapim nesenel gol sempionsip long Mt Hagen.

Dispela sempionsip bai stat long tumoro na pinis long Mande.

Banz Kofi Limited i givim dispela mani long las wiken we jenerol menesa Patrick Kiloran i tok ol i mekim tok orait long givim helpim inap long tripela yia olgeta.

Presiden bilong Mt Hagen Golf Asosiesen Tom Mah i tok em i amamas long dispela

helpim i kam long kampani.

"Mipela i no askim kampani long helpim

*120 pilaia bai kamap long dispela sempionsip.*

mipela tasol long kampani i gat kain tingting na helpim mipela i bikipela samting," Mah i tok.

Em i tok dispela mani em ol bai yusim olsem praismani na tu long lukautim golf kos.

"Sampela ol balus kampani i givim 20 pesen diskaun long go long Mt Hagen na sampela ol lodg na ples bilong slip i tok long sasim liklik mani long ol pilaia i yusim ples bilong ol.

Em i tok olsem 120 pilaia bai kamap long dispela sempionsip. Na i tok fi bilong ol pilaia i sanap olsem manmeri K100, sinia K80 na junia K40.

Em i tok bihain long dispela ol bai lukluk long holim Ela Motors tonamen long Julai.

## Toua brukim 9-pela rekot

PAPUA Niugini na Saut Pasifik 53kg divisen sempion Dika Toua ibrukim nain-pela rekot taim em i apim ol aian long rijonal inta-klab tonamen long Osenia Wetlifting Institut Long Sigatoka, Fiji long las Fraide.

Dispela yangpela meri nogut bilong Hanuabada i brukim wanpela Osenia sinia rekot, tupela Osenia junia rekot na siksipela Saut Pasifik rekot.

Toua nau i stap long Fiji long redim em yet long dispela Osenia sempionsip we bai kamap long Suva long Mei 5-8.

Meri ya bai traim yusim dispela tonamen long traim kwalifai long Olimpik Gems we bai kamap long Gris long Ogas.

Toua i brukim Osenia sinia na junia klin na jek rekot long 53kg divisen bilong em we em i apim olgeta 98kg hevi.

Bipo rekot em meri Australia Natasha Barker husat i bin apim 97.5kg we em i kamapim long Manchester Komenwel Gems long 2002 na kisim silva medol.

Gol medol long dispela taim i go long Chanu bilong India we em i apim 100kg hevi olgeta. Bronze medol em wantok bilong Barker, Seen Lee i kisim taim em i hapim 87.5kg wet.

Toua husat i kisim 2003 SP Spotmeri taitel i wok long lukluk long kisim gol medol long narapela Komenwel Gems we bai kamap long Melbon, Australia long 2006.

Toua husat i apim 75kg hevi we em i kamapim nupela Saut Pasifik junia rekot we long sinia divisen Lee i bin hapim 78kg hevi. Dispela i soim olsem em tripela kilogrem tasol bipo long Toua i hapim kain hevi olsem.

Toua i kamapim nupela rekot long hapim narapela 10kg hevi ken antap long 2003 SP Gem mak bilong em. Nau long dispela taim em i hapim olgeta 172.5kg hevi long kamapim dispela nupela rekot.

Dispela rekot tu i winim rekot bilong Osenia sempionsip.

Narapela wantok man bilong Toua, Jeffery Robby i stap tu long dispela skul i wok long mekim gut tu ol mak long hapim ain.

Robby i stap long 59kg divisen. Em i apim 90kg na long klin na jek i hapim 122.5kg we bungim wantaim i kisim 212.5kg hevi.

I olsem em i hapim 2.5kg moa long em i bin hapim long SP Gem we em i kisim gol medol long en.

Em i redi tu long was long taitel bilong em long dispela Osenia Sempionsip.

## Noten Jon Volibal tonamen i paia long Wewak

### Edward Meata i raitim

MOA long 30 tim bai kamap long namba 7 Noten Jon Volibal tonamen we bai kamap long Wewak stat long tumoro na pinis long Mande.

Ol dispela tim bai kam long Morobe, Madang, Sandaun, Manus na as ples yet Is Sepik.

Dispela Noten Jon tonamen em wanpela tonamen olsem Hailans, NGI na Sauten Jon tonamen.

Long dispela i gat save olsem PNG Volibal Asosiesen i bin askim wan wan ol jon long holim sempionsip bilong ol yet bipo long ol i kamap long nesenel sempionsip long Pot Mosbi long Septemba.

Dispela jon sempionsip bai kamap long taim Wewak i holim 25 yia aniveseri bilong em.

Nesenel Minista bilong Spots Ledi Carol



Pilaia bilong Vailama i setim bai bilong pawa hita bilong em long NCD Volibal kompetisen. Dispela ol pilai i save kamap long Murray Barracks volibal kot. Foto: JOE IVAHARIA.

Kidu na presiden bilong PNG Volibal Federesen Reatau Rau bai kamap long dispela pilai we Ledi Kidu bai opim ol pilai.

Long ol pilai long Wewak oganaising komiti siaman Andrew Warisan i tok olgeta

samting long graun i redi na olsem asosiesen bilong em i redi tasol long holim ol pilai.

Em i bilip dispela tonamen bai wanpela hatpela tonamen tru na i ting olsem ol tim long lukaut em long

Markham long Morobe, Madang taun na Wewak taun.

Tasol em i no lukdaun long ol tim bilong Manus na ol tim bilong Vanimo.


Ol tim i kamap pinis long aste na nau.

Husat tim i no kamap yet bai i gat las minit long kamap long tumoro.


Em i bilip tu olsem presiden bilong PNG Volibal. Federesen Reatau Rau husat bai kamap long dispela ol pilai bai luksave long strong bilong pilai insait long rijon na givim gutpela sapot long em.

Long ol sponsasip Warisan i tok Provinsol Gavman bilong Is Sepik i givim gutpela sapot pinis na i redi long givim moa helpim taim ol pilai i kamap.

Gavana bilong Is Sepik na patron bilong NJVL Henry Ariro i givim sampela mani long lig.



# WANTOK Spots



## Pini pasim tingting long Olimpik Gems

### Paul Zuvani i raitim

SAUT Pasifik na PNG 50m, 100m na 200m sempion Ryan Pini I lukluk tasol long mekim gut long ol swim bilong em.

Na em i no laikim planti tingting long dispela taim taim em i wok long redi long Olimpik Gems.

Pini i mekim dispela toktok taim em i amamas long ol swim bilong em we em i mekim gut long las wik Telstra Australia Nesenel sempionsip long Sydney, Australia.

Dispela 22-ya PNG manki i bin brukim ol rekot bilong em long dispela ol swim tu.

Long 50m bekstrok Pini i kamap namba tu long Australia na Wol namba wan 50m sempion Matt Welsh taim em i swim 26.13seken. Welsh i swim na kamap long 25.49 seken.

Presiden bilong PNG Swimming Inc Liz Wells i tok dispela strok em Pini i no save gut long em tasol long dispela taim olgeta samting i kamap narakain.

"Pini i mekim gut na mipela i amamas. Em i no swim long nem bilong em yet tasol i kamapim nem bilong kantri," Wells i tok.

Em i tok dispela resis em non-Olimpik iven we ol swima bilong narapela kantri i swim tu long em.

Long ol narapela iven Pini i swim i go inap long semi fainal tasol i no go moa long gren fainal long wanem dispela ol iven em Australia i holim long painim ol swima long Olimpik tim bilong em.

Long wanpela bilong ol dispela iven Pini pastaim i bin wilwilim gut Welsh na kamap

namba wan.

Long 100m bataflai Pini i bin swim wantaim 53.73 seken we em i brukim olpela rekot we i sanap 53.90 sekens.

Long narapela iven Pini i winim tupela Australia sempion em Geoff Huegill husat i kamap wantaim 53.85 sekens na Michael Klim husat i kamap wantaim 54.51 sekens.

Long 100m bekstrok Pini i winim bipo biknem man Matt Welsh husat kamap namba tu ples.

Long 200m Individual Medley Pini i swim wantaim 2 minit 08.35sekens.

Bihain long dispela resis Pini i tok em i bilip em i gat strong yet long mekim gut moa long mak we em i swim nau long em long dispela taim.

Papa bilong em Kevin tu i stap long dispela taim na givim sapot we em i lukim Pini i kamapim ol gutpela mak bilong swim.


Narapela PNG swima husat i stap tu long dispela ol iven em Anna-Lisa Mopio Jane.

Mopio na bai go long Perth long stap insait long Australia Olgeta Krismas grup sempionsip bipo long em i go long Osenia sempionsip.

Bihain long dispela ol iven Pini na Mopio Jane wantaim narapela PNG swima bai go long Osenia sempionsip long Suva, Fiji long Mei.

Narapela swima em Krystle Babao. Ol iven we bai kamap long Osenia sempionsip em 50m na 100m bataflai, bekstrok, brestrok, fristail na 200m individual medley.

Wells i tok Pini i kwalifai pinis long Olimpik Gems tasol Mopio Jane na Babao i no yet.



### 8-pela tim bai resis long Nesenel Sofbal sempionsip

EITPELA tim long faivpela senta bai kamap long nesenel sofbal sempionsip we bai kamap long Lae long Ista wiken.

Bai i gat tupela manmeri tim long Pot Mosbi. Mt Hagen, Madang na Bialla. Lae yet bai kamapim foapela tim tupela man na tupela meri tim.

Presiden bilong PNG Sofbal Federesen Francis Nambon i tok narapela

tupela strongpela sofbal senta olsem Rabaul na Kavieng i tok ol bai i no inap kamap long hevi bilong mani.

Tasol bihainim as bilong tupela Nambon i tok dispela i no gutpela eskus.

"Ol opisa i gat 12-pela mun long redi long kamapim inap mani long salim tim bilong ol. Na long tupela senta i tok ol i no inap salim tim bilong ol

i no gutpela rison. Sapos Bialla inap kamap wantaim mani olsem wanem long tupela?" Nambon i askim.

"Taim tupela i mekim olsem ol i no givim jastis long ol pilaia bilong ol. Tupela senta i gat nem long dispela pilai na sapos ol i no salim tim bilong ol olsem wanem bai ol i save sapos standet bilong i stap antap?"

"Mi no amamas long dispela rison. Mi askim ol opisa long salim tim bilong ol long kamap long kain pilai olsem," em i tok.

Long sait bilong sempionsip em i tok dispela pilai bai i antap moa. "Wan wan ol senta i redi gut tru long dispela pilai i hat long tokaut long husat tru em i gat strong long win. Fainal bilong pilai yet bai kamapim sempion tim.

Holim em, em go

nau • Man nogut bilong ol Roosters Anthony Minichiello i no bin inap long mekim rot agensim ol Penrith Panthers las wik taim ol i lus 22-6. Tumora nait (Fraide) ol bai pilai agensim Brisbane Broncos. Taim ol Roosters i save lus, ol i save kam bek wantaim paia lait. Kepten bilong Broncos, Gordon Tallis i tok pinis olsem ol i wok long skelim pilai bilong Panthers taim ol i daunim ol Roosters bai ol inap long pilai wankain tumora. Sapos ol i banisim gut Minichello, ating bai ol inap long win.

Lukim moa long pes 28 na 29.

**Brian Bell & Co. Limited**  
Shop with a friend  
**SPORTS**

For THE LARGEST Range of SPORTING EQUIPMENT in Papua New Guinea.

We sell Genuine Brands

• PORT MORESBY • LAE • MT HAGEN • GOROKA • MADANG • KOKOPO



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.